

萬 有 文 庫

第二集七百七種

王 雲 五 主 編

九 國 志

附 拾 遺

路張邵周錢  
振 唐 晉 夢  
英 涵 棠 熙  
撰 補 錄 文 校

商 務 印 書 館 發 行



九 附 拾 國 志

撰 補 錄 次 校  
英 函 編 祚  
振 唐 晉 棠 熙  
路 張 邵 周 錢

書 叢 本 基 學 國

編主五雲王  
庫文有萬  
種百七集二第

志 國 九  
遺 拾 附

中華民國二十六年三月初版

發	印	發	校	編	錄	補	撰
行	刷	行	者	次	者	者	者
所	所	人	者	者	者	者	者
商	商	王	錢	周	邵	張	路
務	務	上	上	熙	夢	晉	唐
印	印	雲	熙	夢	晉	唐	
書	書	河南	河南	棠	涵	英	振
館	館	五	祚	棠	涵	英	振

朱

中E七六五

# 九國志總目

## 卷一

吳臣傳二十二首

## 卷二

吳臣傳十八首

## 卷三

吳臣傳四首

## 卷四

南唐臣傳一首

## 卷五

吳越臣傳五首

## 卷六

前蜀臣傳十八首

## 卷七

後蜀臣傳二十七首

九國志 總目

卷八

東漢臣傳五首

卷九

南漢臣傳八首

卷十

閩臣傳八首

卷十一

楚臣傳十九首

卷十二

北楚臣傳一首

按宋史路振傳。振字子發。永州祁陽人。淳化中。以卮言日出賦擢甲科。真宗時。知制誥。嘗探五代僭僞。吳南唐吳越前後蜀東南漢閩楚九國君臣行事。作世家列傳。未成而卒。王應麟云。書凡四十九卷。其孫綸增入荆南高氏。于治平元年六月辛酉上之。詔付史館。實十國也。陳振孫書錄解題則云。末二卷爲北楚。張唐英補撰。合五十一卷。宋藝文志及馬端臨經籍考。總題爲路振九國志五十一卷。俱不及其孫。蓋綸雖經增輯。而當時所傳播者。則唐英補撰也。書仍路氏之舊。故不改舊名。其書向無刊本。惟散見永樂大典中。邵二雲太史摘錄散篇。欲爲編輯。因

闕軼過半。不果成。乙未冬。二雲南旋。留稿于孔荭谷農部處。今年夏。荭谷出底本屬子編次。雖卷帙殘缺。而所存諸傳。俱首尾完善。可補五代正史之遺。因爲分國類敍。得列傳一百三十六首。釐爲十二卷。並補世家目於卷首。且於目下略注始末。以便檢閱。吉光片羽。當亦嗜古者所同珍也。乾隆四十一年歲在丙申十二月二十六日。有香周夢棠識于宣武門內貝璽街。因居是日立春。

九國志卷一

宋路振撰

吳太祖以唐景福元年再入揚州至睿帝天祚三年為南唐所篡蓋晉天福三年也歷傳四主凡四十六年

世家

太祖姓楊名行密初名行愨字化源廬州合肥人唐中和三年起兵為亂光啓三年入揚州自稱淮南留後景福元年七月再入揚州唐以為淮南節度使乾寧二年封宏農王天復二年進

爵吳王天祐二年十一月庚辰薨年五十四諡曰孝武王廟號太祖乾貞元年追尊為武皇帝陵曰興陵

烈祖名渥字承天行密長子唐天祐二年冬嗣位五年五月戊寅為張顥徐溫所弑年二十三諡曰威武義初改諡景王廟號烈祖乾貞元年追尊為景皇帝陵曰紹陵

高祖名隆演初名瀛又名渭字鴻原行密第二子唐天祐五年五月己卯嗣位十六年建吳國改唐天祐為武義元年二年四月己丑薨年二十四諡曰宣乾貞元年尊為高祖宣皇帝陵曰

肅陵

睿帝名傳行密第四子武義二年六月戊申嗣位改元順義乾貞元年稱帝天祚三年禪位南唐昇元二年十月辛丑薨年二十八追諡曰睿皇帝葬平陵凡改元四順義六年乾貞二年太

和六年天祚三年

列傳

- 袁襲 劉威 陶雅 李神福 臺濛
- 張訓 李遇 劉金 秦裴 馬珣



劉存

李簡

柴再用

陳璋

侯纘

朱景

張崇

王綰

王稔

李厚

陳知新

朱虔祐

袁襲

襲廬江人。少好學。善屬文。洞明緯象。秦畢之亂。高駢辟行密為行軍司馬。俾率所部赴難。行密猶豫不行。襲言於行密曰。高駢倦於政事。聽惑妖妄。彥等雖以誅呂用之為名。觀其事。乃以暴易亂耳。寧知非天將贊於公耶。行密善其言。乃移檄諸州。誘集徒眾。將兵數萬。長驅至廣陵。秦畢害駢。襲勸行密縞素舉哀於城下。眾皆義之。及破賊入城。招輯編戶。會孫儒兵至。行密問計於襲曰。今城壁未完。賊且盛。若儒至。圍城是重擾民也。不如且避之。先是海陵將高霸擁眾來附。行密將令以兵屯天長。扼儒來路。襲謂行密曰。霸擁大眾。心持兩端。若使居天長。是自扼也。可因犒其士卒。擒而斬之。行密遂斬霸。而併其兵。行密聞孫儒至。復欲遁歸海陵。襲曰。不若歸合淝。繕甲兵。再議攻取。今稽諸乾象。公必再來。及孫儒逼城。行密果自天長返。謂襲曰。無子吾幾不得歸。行密平宣州。獲趙錕。留與其弟同館。錕與梁祖有素。果遣使來求錕。時襲寢疾。行密使人問襲。襲曰。但斬首送之。必無慮也。未幾卒。襲剛忍好克。每欲殺人。必折節下之。行密哭之曰。吾每恤刑。而襲好殺。享年不永。深可哀也。

卷一萬八千一百三十四第二頁

劉威

威廬州慎縣人。少為小吏。豪爽有志節。與田頴陶雅俱為行密奔走之舊。行密起淝上。及平秦畢有功。表

頽竇州刺史。大順初，與安仁義敗孫儒別將劉建鋒於武進。其後儒兵益集，威與頽屢爲所敗。行密將歸銅官，威曰：「今衆寡勢殊，殆難與爭。然儒焚室掃壘，絕後而來，糧若不繼，何從供饋？公宜勿與戰，堅壁以禦之，坐待其弊。」行密然之。儒果敗，乾寧初，表授廬州刺史。及行密承制封拜，就遷淮南節度副使、行軍司馬。東西行營副都統，未幾加使相。天祐三年，授鎮南軍節度使，撫州危全諷率虔吉撫信之衆十餘萬將復鍾傅舊地。時州兵無多，士庶大駭，威獨傲然，日縱酣飲，全諷屯象牙潭，不敢輕進。及周本破全諷，四州初平，渭令威巡視四境，撫諭而還。先是行密疾病，問周隱以後事，隱以威爲請，威初聞不能無意，及移鎮鍾陵，復多專刑。徐溫請討威，威聞之沮喪，計無所出。有幕客黃訥謂威曰：「公受謫雖深，反本無狀，能挺身入覲，必解前疑也。」威曰：「善。」遂遣訥爲先容。渭果復令之鎮。天祐十一年卒於鎮，年五十八。卷一萬八千一百三十四第三百

### 陶雅

雅，字國華，合淝人。本儒家子，儀形魁偉，眉目甚秀。乾符中，天下將亂，始投筆和門，會西蕃入寇，徵四方兵防秋。靈夏雅與行密淝上軍偕往，未幾改隸諸葛爽，征沙陁有功，從爽鎮河陽，還補廬州衝山指揮使。行密據合淝，遣雅平鄉盜，秦定過修己等，遷八營主將。光啓初，破桐城，吳迥擊李本於柳子山，乘勝攻舒州，下之。以雅爲舒州刺史，爲蔡盜許勅潛兵夜至，雅奔歸。文德初，從行密破趙錙，授池州刺史。大順中，破孫儒軍於人頭山，儒平，授常州刺史。遷池州團練使，田頽攻歙州，時給事中裴樞守新安，將歸款於行密，以宣州副使魯郃往代之。是時諸將授郡，鮮不以虐斂爲事，惟雅寬厚，人多便之。樞因遣問政山人聶師道往說頽曰：「苟得池陽，陶牧爲守州人，孰不承命。頽驛報行密，因令雅治新安，入見樞，盡州郡禮，樞奇之。及

樞至京師。奏雅爲歙州刺史。天復三年。田頽以宣州叛。雅以州兵助臺濛伐之。頽出戰。橋陷墮馬。爲帳下小卒許渥王綬所殺。宣州平。兼西南面招討使。先是順義軍使汪武聚盜據婺源。行密以爲滁州刺史。婺源歙屬邑。武恃險未嘗謁雅。及頽叛。武多行剽劫。至是雅移檄。聲言討洪饒。由婺源往。武引弟姪十餘人。就路迎謁。雅顧左右擒殺之。緩轡入其營中。無敢動者。天祐初。陳詢以睦州歸款。吳越遣萬衆攻詢。雅率兵救之。軍士夜驚。多踰營遁去。將吏白雅。欠伸不應。乃下令曰。明旦有軍士不在營者。俱斬。遞相傳告。未頃而定。明年破婺州。虜越州刺史沈夏。以功遷衢睦團練使。江南都招討會宣州王茂章叛奔越。雅虜茂章。伏兵斷其歸路。乃令大將軍金師會領睦州事。遂班師新安。而越兵大至。衢睦婺三州復沒。八年移鎮武昌。雅利黟川殷阜。上書請之。遂遙領武昌軍節度。加同平章事。知歙州團練觀察等事。十年八月卒。於任年五十七。雅性沉靜。好讀書。手不釋卷。雖臨陣敵常褻衣博帶。自幼年戲弄。未嘗有錐刀傷手。及爲大將。每矢石交飛。終莫能中。接賓佐有禮。事父兄以孝敬。非公宴不舉音樂。疎財重士。人以此歸之。典黟川二十餘年。民感其化。生男女或以陶爲字焉。卷一萬八千一百三十四第三頁

李神福

神福。涖州人。幼執親喪。哀毀過瘠。鄉里異之。及長。沈厚勇敢。唐末。四境交募勁兵。因逮上黨軍籍。時高駢兼諸道行營都統。神福從州將王重屯淮海。因投於行密。中和中。同安賊陳儒攻刺史高澧。遣使來告。行密未能救。謀於神福。對曰。此羣盜烏合。易與耳。公但聲言赴援。可不勞尺刀。爲公解之。乃請本軍旌旗。間道以入。旣夕。引州兵出外。各持旌旗入。列大陣之狀。儒果夜遁。行密大奇之。光啓二年。壽州張勳叛。寇淝

上神福率兵與戰。敗之於楮城。秦畢之亂。高駢召行密。因遣神福諭曲谿劉金。盱眙賈令威。各以義兵來附。破秦畢軍。神福功居多。會選卒爲黃頭軍。遷神福爲左右黃頭都尉。龍紀中。涇縣王賞。太平嵇常滿。俱聚盜剽鄉里。神福引兵破之。但誅其首惡。餘皆不問。大順二年。孫儒前鋒兵屯溧水。行密遣神福將兵禦之。神福謂諸將曰。兵倍不戰。況儒衆十倍於我。當且避其銳以驕之。乃退舍。而儒衆果怠。神福乃選銳卒。躋險夜襲之。果大潰。又擊儒要山寨破之。擒其將李宏。以功改左游奕將。銅官鎮。遏使田頵爲孫儒所敗。行密欲退守銅官。神福諫曰。儒掃境而來。利在速戰。宜堅壁清野。以老其師。神福願以本軍據險結柵。時出輕騎抄其糧運。彼前不得戰。退無儲糧。此送死之道。行密曰。善。因以神福爲宣池兩路都游奕使。是夏。儒食盡果敗。以功奏授左千牛衛將軍。景福二年。廬州刺史蔡儻叛。遣何瓌來寇。神福迎擊於青斗山。大破之。遂傅城下。賊平。遷左衛都校。未幾授舒州刺史。天福元年。與呂師造攻臨安。錢鏐使顧全武來援。神福退師。令羸老行。又令師造設伏青山路。自將一軍殿後。夜未半。全武果盡銳來追。神福僞北走。伏軍發。前返夾攻。越軍大敗。擒全武。復攻臨安。久不克。先是神福遣使護鏐先塋。禁其樵採。及獲全武。又遣通家問。越人皆感之。因納其犒賂而返。二年。改昇州刺史。行密以女妻其子。承鼎三年。攻杜洪於鄂州。大敗洪軍。時城中積荻山上。神福謂將軍曰。今夜焚此。諸將皆不測。是夕遣人乘舟載火炬。至溝口。分焚樹。僞爲梁軍來援之狀。城中焚荻應之。諸將伏其智。梁祖遣將韓勅率步騎萬餘屯溝口。又令荆南以舟師赴援。成汭盡衆浮江而下。神福登岸望之曰。舟人雖盛。然首尾懸絕。宜急擊之。乃迎戰大別山。汭果敗。溺水死。勅亦引衆遁去。自是洪勢益孤。會宣州田頵叛。襲昇州。劫神福與帳下妻子。俱歸宛陵。厚養之。以誘神福。

行密急書召神福覽書卽袖之揚言曰。鄂州尙未下。又令急取荆南。因號令諸軍。速開順流而下。頽遣將王壇汪建以舟師援洪。又別遣人遺神福書。約分地而治。神福斬其使。擊壇建破之。復戰於皖口。又敗其衆。浮尸棄舟蔽江而下。壇建以輕舟遁去。四年以兵屯田梁。加西面行營招討使。光州團練使。疾甚求醫於江都。卒年五十。卷一萬八千一百三十四第八頁

臺濛

濛字頂雲。廬州合肥人。少爲金牛鎮將。行密據合肥。始來歸。從征秦畢趙鎰。俱破敵有功。大順中。馬敬言爲孫儒敗於廣德。初儒與李從立乘勝至東谿。時城守未固。軍士大恐。濛以一旅巡谿西。會天晦。詐令士卒傳諭往返者數四。謂大衆屯集中夜皆遁去。及儒柵陵陽。濛於魯江五堰作輕舟饋糧。終儒之世。軍無饑色。從行密歸廣陵。以功遷楚州刺史。乾寧三年。破蘇州。以濛守之。越人水陸大至。濛擊敗之。錢鏐親率舟師至。會糧盡。濛拔衆遁歸。光化二年。行密初得朐山。以濛爲海州刺史。在任貪殘。爲郡民所訴。又爲田頽所譖。降爲漣水制置使。天復三年。田頽叛於宣州。行密歷數諸將無敵頽者。乃謂濛曰。非公莫可。濛曰。頽不守富貴。自取滅亡。濛今仗大王威武。以順剪逆。往必擒頽。願王無慮。行密大悅。濛初入其境。卽翻陣以往。軍士俱笑其怯。濛曰。頽宿將多謀。當自過防。翌日果遇陣於廣德。濛欲奪其銳。先以行密書遺頽將校。皆下馬拜受。因其擾亂。濛麾衆擊之。頽兵大敗。乘勝遂圍宣城。冬十月。頽出州外求戰。登橋馬墜。爲外軍所殺。宣州平。行密承制加濛檢校太保。宣州觀察使。天祐元年。卒於治所。年五十。卷一萬八千一百三十四第九頁

張訓

訓字克明。潞州清流人。身長八尺餘。腰帶十圍。中和三年。歸行密於合淝。行密訪以方略。悅之。令從石令言攻同川。克其城。從田頵擊張翱於褚城。因入擊趙錕。昌山兵破之。克宣州。訓功居多。遷左右黃頭指揮使。以所部戍廣德。拒孫儒於黃池。從李神福襲歷陽。下滁州。孫儒焚廣陵。悉銳攻宣州。行密命訓潛軍入廣陵。滅其餘燹。獲軍儲數十萬。以賑饑民。行密令馬爽守廣陵。爽叛。爲諸將所殺。城中大驚。訓整師以出。衆乃定。孫儒之起也。毘陵守將劉建鋒從儒俱西。土豪陳可兒據毘陵。訓率兵奄至城下。可兒倉卒出迎。訓於馬上。手刃殺之。奪其兵入城中。又率兵絕儒糧道於安吉馬頭。儒敗。訓論功爲最。景福元年。從行密歸江都。路經毘陵。行密顧左右曰。毘陵大城也。訓以一劍下之。不亦壯哉。卽授温州刺史。乾寧二年。屯兵漣水。以備梁師。劉知俊聚糧石碣。戍守皆潰。盡焚其儲積。訓歸路出東海。爲知俊所邀。訓擊大破之。青口之役。吳師悉起。訓帥所部迎行密。行密喜。以兵千人令爲前鋒。會朱瑾假梁人兵鋒。先入其壘。訓登岸疾戰。踰柵而入。遂破龐從軍。以功授淮海游奕使。天福三年。王茂章平密州。以訓爲刺史。會梁祖以大軍至。訓謂諸將曰。城孤師少。何以待之。皆欲焚城掠聚而去。訓曰。不可。如此則我師難歸。遂封府藏。下懸門。立虛幟於城上。遣老弱居前。訓自以銳兵殿其後。梁軍前鋒至。見城上旗多。未敢逼。數日方入城。又見府庫城邑晏然如故。亦不追之。天祐七年。遷黃州刺史。卒於治所。訓質直勇而多力。曾渡毘陵西橋。馬畏不渡。乃持尾鬣舉之以濟。然不恃其勇。故多功保全焉。

卷一萬八千一百三十四第十六頁

### 李遇

遇。合淝人。始事行密帳下。光啓中。禦梁軍於慎縣。遇單騎按槊。率先破敵。以伍長遷馬軍副指揮使。從平

秦舉趙鎡孫儒皆有功。遷淮南馬步諸軍都尉。累遷常州刺史。天復三年。安仁義以潤州叛。夜襲毘陵。仁義善射。諸軍多畏避。遇背城逆戰。仁義喪師。自是不敢東顧。天祐中。宣州王茂章奔越。乃以遇爲淮南行軍司馬。宣州團練使。徐溫專政。遇不能下之。常言曰。徐溫何人。吾所未識。溫怒。命柴再用將兵送王壇代。遇不受命。再用攻其城。逾月不克。時新王遣典客何夔說遇曰。公本圖反。請斬夔以狗。本無反心。可隨納款。遇聞王命。遂開門。委命溫族之孫仁義。方嬰爲人匿之。而免。李昇秉政。以仁義爲縣令。卷一萬八千一百三十五第一頁

### 劉金

金。淮陰洪澤人。光啓中。江淮兵亂。從鄉曾李章保曲谿。章死。金代有其衆。行密營廣陵。金盡以其衆來附。破秦彥。金有力焉。文德初。從攻趙鎡於陵陽。明年。金度鎡必遁。思以計擒之。因僞與鎡通好。約爲外應。鎡大以金帛爲遺。復夜迎金入臥內。許妻以女。金歸營。慮鎡兵盛。出不能制。乃遣人臨城大譟云。劉郎不能與爾爲女婿也。鎡聞之。沮喪。果宵遁。大順中。孫儒寇宛陵。行密遣金拒之。屢破儒軍。以功授滁州刺史。行密破鍾離。移濠州刺史。未幾。遷團練使。天祐二年卒。子仁規嗣。仁規娶行密女。渥襲位。遷過口兩城使。乾貞初。授清淮軍節度使。卷一萬八千一百三十五第一頁

### 秦裴

裴。慎縣人。少驍勇。頗好獵。以鷹隼爲事。嘗云。天上黃鷹。地下黃金。餘不足貴也。行密起合肥。因隸帳下。大順元年。奏授檢校左散騎常侍。行密據廣陵。以裴知楊子縣。有虎入縣郭。裴親殺以獻。行密召褒賞之。裴

曰此衆共殺非獨能制也行密歎曰勇而能謙必享富貴歷高郵無錫令俱有能名乾寧五年率兵破越崑山鎮以千兵守之錢鏐遣顧全武引萬衆來復裴援絕全武以檄說裴裴封函納款全武頗自負召諸將聚觀全武曾爲僧發函乃佛經一卷全武大慙裴戰無虛日士卒多病傷死未幾糧盡告降錢鏐預設千人食以待之及出士卒不滿百鏐讓之曰軍孤衆寡何苦相拒裴曰但事君盡節死而後已今食盡歸命非本志也鏐大賞之因熟視裴曰君有藩侯相他日必歸君餘勿爲念裴在越三年寂無歸耗忽一日裴遣人告行密遣李神福攻越臨安鏐遣顧全武方字救之爲神福所擒明年行密送全武及宇易裴以歸天復三年從李神福攻鄂州荆南成汭乘大艦來援裴率兵泝流逆戰汭敗溺水死又攻田頰衆於吉陽磯以功授諸軍都尉從劉存攻夏口破之加昇州刺史天祐三年洪州鍾傅率州人立其子匡時江州刺史延規傅之養子忿不得立以其郡納款因授裴西南面行營招討使攻匡時至蓼州時軍欲限水爲柵裴不聽匡時果遣將劉楚據之諸將相顧失色俱咎裴裴曰城中驍銳惟楚耳若令總衆拒守此城何由卒破吾固留此要害以謀致之旣而分軍晨出盡銳破柵旣擒楚方傅於城下未幾城陷擒匡時以獻諸將皆服其智號令嚴肅兵士無敢殺戮洪之士卒俱來就營求其戚屬爲出府帛贖還之洪人感悅授洪州制置使張願用事慮裴爲變急召歸及湖口遇鄂帥劉存與潭軍戰沒復授裴鄂岳觀察使會重午裴宴諸將而潭人入寇裴遣弟師鐸師虬乘戰艦先往裴食訖登黃鶴樓以望乃以平頭舫顧小校曰但乘此卷旗奪潭人船以戰及與師鐸軍合乃建大將旗潭人膠胎裴因擊敗之六年入覲因求歸故里以民禮謁縣宰見里中故老必拜坐以少長爲齒九年加武昌軍節度使遇疾求歸至溢中卒年五十九裴



在治七年積軍儲二十萬開青山大冶公家仰足

卷一萬八千一百三十四第十頁

馬珣

珣廬江人少驍勇有機略初以貨財商於江都會秦畢圍城乃歸鏐鄒軍畢師鐸於城南立高樓以望城中呂用之患焉募壯士摧其樓珣應募夜半獨仗劍入賊營倒之用之厚賞遷十餘級行密入城聞其名錄爲偏將與朱延壽相友善乾寧初授珣舒州刺史移守漣水三年梁將朱友恭圍瞿章於黃州命珣率兵援之黃州陷戰不利與張訓呂師造咸知進石率等收散兵三百人自黃州間道緣分寧絕山谷而東道經撫州危全諷聞其來布四壘於路壘皆萬餘人珣語諸將曰彼謂我可坐縛也今與諸將擊其中堅逐其軍帥取其資而食其穀可以歸矣會夜擊全諷之壘大破之全諷僅免乃飲宴於賊營擇其利兵而用之明日廣張旗幟揚麾伐鼓從山直下衝其連營鋒若雷電賊皆潰走珣凱唱而歸謁行密言其戰狀行密罵之曰儒豎子何不遂據其城珣拜謝不敏珣滑稽好妓樂歌舞雖出師登騎俳諧不輟旣而臥疾謂所親曰若患愈當乞師數千可以蕩平西南夷獠俄而卒衆惜其智勇部下將校見其二子無不感慨申敬朱延壽錄其孤而字之延壽敗行密收其二子給與宅第

卷一萬八千一百三十四第十七頁

劉存

存陳州人善拳勇從行密起合淝破秦畢趙鏗皆有功孫儒入寇身先苦戰爲賊斷足三指而戰不輟翊日行密出城與儒戰存請先登行密諭以指痛不許因求皮履裹足而往是日平儒以功遷壽州馬軍都尉乾寧中預破葛從周於溁河遷舒州刺史改團練使天復中副李神福攻杜洪於江夏會田頽叛遣將

汪建王壇率舟師泝流而上。存與神福下瀝池磯逆戰。爲流矢中目。存戰自若。建敗。存殺獲居多。四年復攻江夏。時神福病歸。存代爲招討使。引十數騎巡城。憇於高崗。張樂命飲酒酣。鄂兵大至。存以旂向江。三招而止。鄂人望之。佗然有頃。自退。軍中服其膽略。存急焚鄂城樓。梁援兵將突圍而出。諸將欲急擊之。存曰。擊之。賊必復入。復入。則城愈固矣。不若聽其遁去。諸將皆曰。善。是日城陷。擒杜洪父子。斬於廣陵市。以功授淮南行軍司馬。鄂岳都團練使。天祐三年。率舟師攻潭州。大雨不止。軍回至瀏陽。爲潭人所敗。執存以歸。馬殷親解其縛。欲授以官。存大詬曰。汝昔歲宣城潰散。偶漏我鋒刃。今反欲臣我耶。殷知不可留。乃斬之。唐保大中。邊鎬平湖南。遣使就墳致祭。贈宣武軍節度使。武衛上將軍。卷一萬八千一百三十四第四頁

### 李簡

簡。上蔡人。有膽勇。資質瓌偉。始隸陳蔡軍中。趙鏗選武幹之士。因任爲帳下親信。龍紀初。鏗爲行密所圍。糧盡將逸。簡紿守門者得出。因奔行密。補黑雲隊長。大順二年。孫儒寇廣德。行密將逆戰。會夜屯於行密柵。及旦。儒軍圍之。數重。率百餘人挺身突戰。自外破柵。援行密以出。遷黑雲都指揮使。乾寧二年。從攻濠州。濠水深闊。簡手攀重甲。口銜大刀。先渡。踰壘。破其關鍵。擒刺史張遂。以獻。從攻壽州。加淮南右廂馬步軍都虞候。先是。江都多盜。令雖嚴。莫能禁止。及是。爲簡獲者。必詢其部分姓名。所盜之物。盡黥於面。於是寇竊皆息。三年。從田頵破蘇州。虜刺史成。及從行密破龐從於青口。敗梁軍於淠水河。副王茂章援青社。從臺濛圍田頵於宣州。皆有功。簡本姓陳。旣貴。欲復其氏。行密謂之曰。天下皆知有李簡。何知有陳簡也。以是不易。渥襲位。王茂章將以宛陵叛。命簡率衆攻之。茂章聞簡至。率衆奔越。改楚州團練使。杭人屢寇。

無錫以簡爲常州刺史。改鄂岳觀察使。天祐十二年。授武昌軍節度使。武義初加鎮西大將軍。襲復州。破之。俘知州鮑唐以獻。乾貞二年。加西南面招討使。入覲。卒於采石江。年六十九。簡鎮上游之地十餘年。重關洞啓。敵人不敢侵軼。然忍而好殺。又非法重斂。鄂民之高貲者無不破產。時論以此鄙之。卷一萬八千一百三十四

第四頁

柴再用

再用、蔡州汝南人。性至孝。七歲遇龐助亂。舉族避地。祖詡鼓不能去。唯再用獨留侍。賊見而去之。以是大爲鄉里所異。及長。沈毅有斷。面黑如鐵。人號爲柴黑子。會秦宗權召募驍勇。再用以騎射應選。時軍令亡馬者斬。一日戰回藉韁而臥。寢既寤而馬逸。再用追之。遇賊於林中。環樹而射。一發人樹俱貫。賊畏走。遂奪馬而歸。光啓中。從孫儒攻廣陵。再用本名存。嘗與軍中小校結爲死友。會有告小校謀反者。儒斬之。執再用至。儒問何故反。再用不對。旣伏質。又問之。始對曰。某與彼相結爲死友。則某反矣。公旣誅之。復何問焉。儒奇之曰。汝果不反。吾再用汝。因令改名再用。儒敗歸。行密授先鋒馬軍指揮使。乾寧中。朱延壽辟爲衙將。因遷壽州團練都押衙。敗梁兵於壽春。遷團練副使。從延壽平劉存於弋陽。授知光州軍州事。一日大震電。家人皆伏匿。再用當戶坐不動。俄見青襦袴者四人。昇再用所坐牀。出庭中。復大震。屋楣折。有龍出焉。梁兵寇光山。再用擊走之。以功遷光州刺史。天祐二年。梁祖平趙匡凝於襄漢。乘勝略淮上。遣使謂再用曰。苟以城降。遷爾蔡州本郡爲賞。再用乘闖而拜曰。此州城小。衆寡王若先下壽州。回當自送款。梁祖信之。攻壽州不拔而返。再用襲之。斬首二十餘級。以功加檢校太保。渥襲位。遷楚州刺史。俄授淮南左

廂步軍都指揮使。越人寇東洲。遣再用率兵禦之。賜長稍五十。戰敗。艦破水滿。再用爲長稍所泛。得不溺。家人聞敗。飯千僧爲禱。再用戰歸。取其飯。召麾下以犒之。曰：此輩濟我佛何力之有。十一年。袁州劉崇景叛。引潭將許眞爲援。令再用攻之。近城有萬勝岡。再用欲奪之。每旦出師岡下。不與戰。袁人頗怠。一日列大陣岡南。崇景望之氣奪。因出戰。再用躍馬徑入陣中。斬首數十。袁人大敗。崇景棄城而遁。武義元年。破越軍於無錫。遷鎮西將軍。領天平軍節度使。未幾移鎮武昌。改德勝軍節度使。加中書令。卒年七十二。再用寬厚淹雅。有儒者之風。好讀左氏春秋。未嘗省視廚廩。寮屬白事。有不如意。但對之假寢。諸子娶聘。必擇平昔舊族。史官王振請述戰功以補方冊。再用曰：鷹犬之效。出自偶然。何足紀也。累歷藩鎮。敦尚儉素。車馬導從不過十人。亦一時之良將也。

卷一萬八千一百三十四第十三頁

### 陳璋

璋。潁川人。少橫恣不羈。歷事諸帥俱無成。乃歸行密。未幾復委質於錢鏐。景福初授杭州武勇都指揮使。改鎮海軍。踏白使。乾寧中領寶州刺史。從平董昌。詔賜佐忠去僞功臣。天復二年。鏐將許再用叛。據外城。召田頽爲援。頽將樹柵於杭州咽喉之地。鏐乘閩觀之大懼。出金彩十輦。募諸將有能奪其地者。與之仍以郡爲賞。璋應募。選饒健三百。假護軍白馬以出。免胄馳擊。往返者數四。竟奪之。鏐大喜。飲之巨觥。卽授璋衢州刺史。與軍校葉讓不協。因斬之。與睦州陳詢連衡。復歸款於行密。鏐以兵圍其州。踰月不能出行。密遣周本援之。拔璋盡室以歸。天祐二年。行密遣陶雅平婺睦。復授璋衢婺州諸軍事。充都招討副使。會王茂章叛。雅棄其地。改璋池州團練使。署淮南節度副使。越將張仁保陷東洲。授璋水陸行營都招討使。

擊仁保於海曲。奪戰船三百艘。盡復東州舊地。復乘輕舟入松江。九谿偵還。越師大集。圍之數重。璋獨射舵工。心目皆應。弦而倒。因奮銳衝擊。長圍遂解。軍回泊洞庭。見橘林。意欲除之。謂士卒曰。若食臚。用此木研酸酪。不假他物。自有香辛味。諸軍皆爭取。樹立盡。九年。以舟師破岳州。擒刺史苑玫。荆人潭人會於江口。邀璋歸路。璋乃方舟。並貫夜過其所。敵人後出。已無及矣。璋每入敵境。或晚泊。戒士卒整舟楫。待令下。當行。此必宿軍之所也。若移帳下岸。修棚習射。及夜多前去。越兵寇上饒。璋引兵侵蘇湖。上饒之兵乃解。乾貞元年。加鎮北大將軍。領平盧軍節度使。溥遣王彥章苗濛舉兵西伐。璋謂嚴可求曰。朝廷攻湖湘。何不用璋與周本彥章與濛。可當其偏裨耳。其後彥章果敗。三年。加使相。大和二年。改鎮東將軍。充寧國軍節度使。遇疾歸江都求醫。至江陽縣卒。年六十五。卷一萬八千一百三十四第十三頁

侯瓚

瓚。字信美。城濮人。黃巢聚兵於曹濮。瓚從之。時年十六。巢陷京師。瓚逃歸鄆州。時僖宗幸蜀。徵十道兵討巢。朱瑄以鄆兵應命。瓚爲偏將。預行尋復。與諸道兵伐秦宗權。皆以勇果聞。頃之。隨瑄弟瑾襲兗州。瓚與瑾逆殺齊克讓。破宿州。瑾據有兗州。瓚爲爪牙。梁祖攻兗州。力戰以却。梁兵。梁祖圍時。溥於徐州。兗兵救之不利。溥死。梁兵遂攻兗。戰於城下者數年。長圍三合而三却之。時瓚常在瑾之左右。大小數百戰。隨瑾搏擊。馳突出入敵中。殺傷不可勝計。乾寧四年。隨瑾與太原將史儼掠徐泗。瑾將康懷貞以兗州叛。瑾無所歸。與瓚等率兵數千走海州。遂來歸行密。授瓚衙將。是歲。梁祖大舉兵伐吳。龐從古。聶金率衆入自青口。葛從周以精甲圍壽陽。江淮大恐。行密以兵萬二千會戰於青口。時兵起倉卒。加以陰寒。戰士皆

攘食飲雪而行。甫及梁營，則豎戈植足，鬪志未決。瑾與瓚率五十餘騎潛濟淮，入自壘北，舞槊而馳，囂聲雷沸。梁兵皆殞，眩不能舉。遂斬龐從大將繼之死者大半。鳴鼓西行，破葛從周於壽陽，沉其卒萬餘人於淖河。梁人大震。瓚功爲多，授左右隨從騎軍副使。隨王茂章救王師，範於青州，破梁兵五萬餘，殺友寧。瓚復有功，從周本攻蘇州，戰於黃天蕩，從徐溫却王景仁於壽陽，逐劉崇於兗州，朱瑾救徐州之圍，及攻潁州，瓚皆預戰。累授滁州刺史。大和三年卒，年七十。卷一萬八千一百三十四第十九頁

### 朱景

景，壽陽霍邱人，少豪猾，驍壯有膽略，爲邑中所服。行密得淮南，以霍邱地界南北，盜賊交會，難可防限，聞景之勇，爲遠近所畏，故以委之。且伺北鄙之奔突，景招合無賴年少，得絕技者百餘人，撫馭之，晝與捕獵，暮分巡警，月餘而材技彊力，無有及景者。以是服從如一。沿淮羣盜莫敢犯之。梁祖聞其名，命寇彥卿率勁騎三千襲霍邱，圖取景。且諭梁祖之意，令降。景率其徒戰於邱墟林澤中，射死者無數。彥卿兵折力殫而去。康懷貞之至，復爲景所困。王茂章來寇，度淮水可涉處，立表識之。景易置於深潭水中，立表浮木之上。茂章軍敗，望表而涉，溺死者大半。積其尸爲京觀。後破李進金，何鞬涉騎數千，尋拜滁州刺史。移光州刺史。卒於任。卷一萬八千一百三十四第十九頁

### 張崇

崇，廬州慎縣人，少以驍勇隸軍籍。光啓中始補戎職。從行密破趙鎰有功。乾寧二年，行密攻蘇州，崇爲越人所獲，行密欲嫁其妻。妻曰：崇忠孝，必不負公，請待之。未幾崇果返，以爲諸將都尉。遷蘇州防遏使。越人

攻蘇州。崇從臺濛敗越兵於小白。天復中安仁義叛。崇與茂章率兵攻之。擒仁義。以功授常州刺史。累遷廬州團練觀察處置等使。天祐十一年。加檢校大傅。光州軍校王言叛。崇討平之。授平南軍節度使。武義元年。累加安西大將軍。梁祖遣將合湖南兵攻荊州。以崇爲應援。招討使。引軍攻安州。降其騎兵二百而還。遷德勝軍節度使。加中書令。大和中封清河郡王。卒於治所。年七十二。崇殘酷暴斂。肥人畏之。嘗入覲。議者咸言不返。鄆市少年皆捋頤相慶。崇歸聞之。因斂捋頤錢數萬貫。尤好使酒殺人。重掌奏刁鎔。每謂左右曰。吾醉慎勿令鎔出。一日醉甚。三召鎔至。竟殺之。詰旦召鎔。左右曰。已殺矣。崇大悔。取其首視之。揖曰。罪過員外。其輕人命如此。頗信鬼神。家人求以厭息崇者。先是后土廟。塑韋安道配座。乃遣巫女詐云。天上謫后土。與公爲偶。崇往視之。巫女潛爇異香。以爲后土至矣。崇乃命樂對像酣飲。一夕家人竊其兵器。盡寘廟中。巫女報曰。列仙不喜殺戰。故遣六丁取至。公不得更用此傷害。崇因是大爲改悔。歷藩鎮二十年。掠下以奉上。每歲一入覲。輸貢絡繹。國中執事無不受賂。故任其肆虐。凌下保全祿位。終身恣橫耳。

卷一萬八千一百  
三十五第二頁

王綰

綰。廬江人。勇敢有謀。光啓中始從行密。破趙鏜。下蘇濠。累有戰功。署行營諸軍都尉。兼漣水防遏使。光化三年。青州戍將陳漢賓殺海州刺史牛從義。歸款於行密。行密命綰與張訓率勇士二千乘勢來附。襲之。漢賓設備不暇。果出迎謁。遂入府中。諭以利害。漢賓乃解甲聽命。以功授檢校左僕射。是歲青州王師範告沂密內叛。授綰海州刺史。兼沂密兗鄆諸州副使。與臺濛攻密州。下之。將擊沂州。覘者曰。城中偃旗臥

鼓寂若無人。綰曰：此必有備而援兵近矣。諸將曰：密城既下，沂易與耳。綰不能禁，但於茂林設伏以待。果攻沂不克，援兵具至，師既退，爲沂兵持其後。綰伏兵擊之，沂人大北。未幾代臺濛爲海州刺史，天復三年改漣州，制置使天祐中復刺海州，就加平盧軍節度使。明年改定南大將軍，知處州防禦使，谿洞民多爲盜，至皆平之。順義元年授百勝軍節度使，召歸。乾貞初卒，年七十二。卷一萬八千一百三十四第十五頁

### 王稔

稔，廬州人，少驍勇，始以騎射隸行密帳下，累從征討有功。乾寧中，梁祖遣將葛從周討揚州，稔與柴再用率兵禦之。稔以六騎登山，覘梁軍爲梁軍所圍，候者望見之，請以救兵往，再用曰：王稔辦事不須憂也。稔與其徒解鞍而臥，梁兵不敢上。會暮圍兵漸合，稔乃走，依林木轉戰而行，因是解去。時亡馬令峻，遂重襲梁兵，奪馬而還。軍中壯之。袁州劉崇景叛，湖南將許貞率衆來援，貞單騎求鬪，稔獨援長槊逐走之。袁州平，以功授滁州刺史。又從徐溫破寇於山南，遷壽州團練使，未幾授清淮軍節度使。稔好儒學，性寬厚，褻衣博帶，有同儒者。先是壽春人多尙武，復警夜至嚴，稔至唯閱經籍，下帷肄業，通宵無禁，不數載，鼓篋待問者四境鱗萃，每講肄開，必饋以束脩，酒鄉里薦舉，歲常百餘人。稔多力，每選二勁弓，弦加兩耳，分手前引，雙滿者數四。乾貞三年歸授左右雄武統軍，卒年六十六。卷一萬八千一百三十四第十五頁

### 李厚

厚，蔡州人。乾寧初歸行密，爲黑雲隊長，破濠壽有功，加檢校兵部尙書。改隸朱延壽，將戰，會立新軍，每旗以五伍爲制，遣厚以十旗擊其西偏，不克而返。延壽將斬之，厚曰：彼衆我寡，願更益師以往，苟不勝，敵死。



未晚也。乃增以五旗。厚力戰。梁人亂。延壽乘之。遂大敗。行密聞之。召歸授黑雲都指揮使。天復中從臺濤破宣州。天祐三年以兵援宜春。深掠越境。師還以功遷黃州刺史。溥襲位授秦寧軍節度使。同中書門下平章事。卒於金陵。年六十三。卷一萬八千一百三十四第十六頁

陳知新

知新。廬江人。從行密起兵。攻畢師鐸。孫儒。皆有功。屢以親軍攻定南北諸郡。多立奇績。累授先鋒指揮使。天祐元年。率兵攻邑陵。破其水柵。逐楚將許貞。盡收其地。拜岳州刺史。三年加團練使。是歲從劉存大舉師伐湖南。會天大雨。旋至瀏陽江。爲楚兵所襲。存與知新戰。敗。俱被擒。楚王馬殷親釋其縛。且慰勉之。冀爲己用。知新叱罵曰。吾豈能負楊公而反事汝耶。殷知不可留。乃殺之。家悉陷敵。卷一萬八千一百三十四第十七頁

朱虔祐

虔祐。潁川人。少多力。善戰。初爲義興令。行密惜其材。召居帳下。常率衆居前。從王茂章援青州。去爲前鋒。歸則殿後。我軍背險。虔祐以五百人當之。追兵大至。茂章亦留解鞍而寢。虔祐促茂章亟去。自與梁人戰。殺傷無數。日暮兵盡被擒。士卒無求生者。以故我軍行遠。追兵不能及。梁人執虔祐見太祖。太祖壯其事。欲釋之。虔祐請死不得。瞋目大罵。被害。行密厚恤其家。後數年嫁其妻。詰旦行矣。其妻沐浴禱之曰。王愍我窮。獨恐終不能自存。嫁我於某氏。嗟乎。今日猶君之妻。明日他適矣。君忠烈若是。歿豈無神。遂棄我耶。是夜無疾而卒。夫忠婦義如此。卷一萬八千一百三十四第十七頁

# 九國志卷二

吳

列傳

劉信

馮宏鐸

賈鐸

危全諷

譚全播

李濤

鍾章

朱瑾

米志誠

翟虔

張可琮

鄭璠

楊彪

陳祐

劉權

崔太初

陳彥謙

高澧

劉信

信字興遠。兗州中都人。少豪勇善騎射。始陷蔡盜許勅軍中。勅敗。自滁州奔於行密。及破秦畢。頗著戰功。大順中行。密與孫儒對壘。一日召信受事。信醉不能起。行密罵之。信出投賊。左右請追信。行密曰。信醉耳。豈負吾者耶。明日信果返。孫儒平。以功轉騎軍副指揮使。從破濛泗。遷滁州刺史。改左右隨從。馬軍都尉。王師範據青州。密人叛師範。求濟師。行密遣臺濛率兵破之。信先登破敵。冒重創。及青人犒師。先求白甲。軍增其賞。蓋信所部兵。皆鐵鎧也。天祐六年。袁吉信撫州。結潭人。將復豫章。改信鎮南軍節度副使。率兵敗潭將苑玘於上高。遷袁州刺史。危全諷新破。其將黎汾王藻聚殘黨為盜。南城間。信盡破之。一郡遂寧。十一年。授鎮南軍兩使留後。劉崇景以袁州叛。信擊走之。授鎮南軍節度使。信為治苛猛。民流言將反。會

王祺率舟師南上。信意其圖己。乃乘小舟解其冠。詣祺請罪。祺大驚。謂曰。奉命討譚。全播於南康。請公駐吉州。以警潭人。非他也。時虔城險。攻之久不克。祺以疫死。遂改信爲招討使。全播懼。因納欵。信受其質而還。徐溫方執政。聞之大怒。杖其使者。信子彥英。時爲親軍校。溫令將三千人往。援之。溫戒之曰。汝父據上游之地。擁數萬之衆。取一小郡不克而還。是反也。今授汝此兵。可往助父反。信聞之大懼。卽返旆疾趨。克其城而還。先是有譖於溫。言其逗撓。故縱全播。至是信自獻捷於江都。溫大喜。復遣還鎮。十六年。吳王開國。加信征南大將軍。後唐莊宗卽位。遣諫議大夫薛昭文冊閩王。假道豫章。信勞之。謂昭文曰。皇帝知有信否。昭文曰。主上新有河南。未熟公之名。信曰。漢有韓信。吳有劉信。異代其人也。因指牙旗銀首。舉卮酒以屬。昭文曰。射中此。願公飲一箭而穿之。觀者無不稱快。信親吏吉況輩。聚斂財貨。置積廳事。日納銀滿其中。莊宗伐蜀。溫恐信爲變。急召歸江都。爲左統軍。溫卒。又傾心事。知誥復歸鎮。明年卒於治所。年七十。信將上章請立廟於洪州。許之。卷一萬八千一百三十四第十一頁

馮宏鐸

宏鐸。漣水人。少與張雄友善。雄以事爲吏所抑。因與其徒亡入海爲盜。宏鐸隨之。聚衆千人。自號天成軍。遂據上元。雄卒。宏鐸繼其位。聚水軍於金陵。樓艦之盛。聞於天下。大順元年。詔復以上元爲昇州。命宏鐸刺史。遂增版築。大其城爲戰守之備。行密定淮。浙。因請歸附。時田頔在宣州。常欲窺伺。宏鐸介居二大國之間。又郡中數有妖怪。居人相驚恐。負抱嬰孩奔走。諭之不可止。宏鐸心不自安。遂悉衆南上。其日淮口大風發。屋拔樹。大石巨木。皆飄于空。聲言將討豫章。實欲襲頔。頔自帥舟師與戰于昌山。宏鐸敗。沿流將

入海行密自出東塘邀之先使人謂宏鐸曰用兵者勝負豈有常哉今衆力未損公何憂一郡而欲自屏于海外吾府雖小足以容君之衆使無失所若欲淮南節度吾亦當讓君捨此而去無謂也宏鐸左右聞之皆哭于是聽命行密乃升宏鐸舟執手慰勉一軍皆歡呼遂以宏鐸歸署揚州節度副使館給甚厚將吏皆分部安堵嘗與行密同祀漢高廟有二鳥鬪于樹行密命射之宏鐸引弓伺便一發而二鳥俱墜天祐四年卒

卷一萬八千一百三十四第十四頁

### 賈鐸

鐸字聲遠唐相耽之嫡孫生于上蔡遇亂爲秦宗權愛將宗權暴虐不軌鐸諫之不聽反見疑懼禍及乃挈家夜與屬卒千人出奔宗權嚴兵追之鐸且戰且走數日乃渡淮遇故人馮敬章導之襲斬春破其城推敬章爲帥鐸爲牙將塹城厲兵以自固行密命朱延壽攻之鐸方出獵延壽潛軍掩至圍其城鐸走還度不得入以兵伏林中選士二人被羊皮夜入延壽所掠羊羣中因得入城約城中夜半開門舉火爲應再以羊皮復命鐸如期領兵趨城南門門中火舉乃力戰突圍得入延壽知其狀驚曰吾恐其潰圍而出今反潰圍而入如是則城安可卒平乃以鐸報行密令召軍中與鐸有舊者持誓書金帛與之和仍令延壽與之約婚小將柴再用應召而行鐸乃請盟延壽以妹妻其子匡浩行密復授鐸左監門衛將軍乾寧二年加壽州左右軍光化二年授檢校右僕射天復三年加金紫光祿大夫檢校司空授黃州刺史天祐三年移光州刺史七年卒于治所

卷一萬八千一百三十四第二十頁

### 危全諷

全諷臨川南越人。世爲農夫。初生赤而毛。醜狀駭人。父母欲勿舉。其姊保護之。僅而得全。及長。體質明秀。豪勇任氣。乾符末。所在寇亂。乃招合同縣少年。卽其居爲軍營。鄉里賴焉。時安南都護謝肇受詔安撫江嶺。聞而嘉之。補爲討捕將。表加憲職。賊帥黃天感據龍安鄉。朱從立據石牛洞。皆竊稱名號。官軍屢敗。肇遣全諷討之。期年。悉平。中和五年。黃巢餘黨柳彥章攻破臨川。逐郡守。大掠而去。全諷遂入之。詔卽以全諷爲撫州刺史。郡署及郛郭焚蕩略盡。乃悉心爲理。招懷亡散。興緝圯壞。不數年。完復如故。時南平王鍾傅亦乘亂據有豫章。朝廷因命爲帥。諸郡亦多自立者。皆不能恭承節度。而全諷最強。尤驕傲不遜。遂爲勍敵。久之。傅不能忍。自率兵討之。旣薄其城。而城中夜失火。士民驚亂。諸將請急攻之。傅曰。君子不逼人之危。乃掃地而祭曰。全諷之罪。無害于民。烟焰遽止。天之惠也。翌日。全諷聞之。遣使謝罪聽命。請以其女嫁傅之長子匡時。傅許之。乃盟而還。由是稍修支郡之禮。然豫章之人。常畏之。傅卒。軍中以匡時爲留後。全諷曰。聽鍾郎三年爲節度。吾當爲之。旣而我師圍豫章。全諷不能救。及城陷。乃謀東兵。時宣州刺史王茂章叛入越。假道臨川。以之梁溪。問全諷曰。君欲大舉。願見君之將士。以卜濟否。乃陳師于野。與茂章登城而觀之。茂章曰。衆凡幾。何曰。十萬。茂章曰。淮南有三等將。如公此衆。可當下將爾。蓋更益十萬乎。全諷不聽。悉衆屯象牙潭。自稱江西留後。旁郡皆以兵資之。湖南馬殷又遣將高安以爲之援。軍勢甚盛。豫章大恐。將軍周本攻象牙潭。大破之。擒全諷于陣。諸軍皆潰。楚撤高安之圍而遁。于是克定八郡之地。送全諷維揚。親詰之。全諷不答。初行。密之攻趙鎰。遣使通聘于臨川。全諷報禮甚至。糧運兵器皆取給焉。至是以舊恩釋之。先是潤州刺史安仁義築第於邗溝之西。因以賜全諷。資給甚厚。天祐六年。以壽終。諸子隨。

才。絃錄。全諷敬愛賓客。善撫士民。頗有巧思。多所興創。今城郭館署。皆其遺構也。

卷一萬八千一百三十五第三頁

### 譚全播

全播。南康人。昭宗末。嶺表寇亂。全播與鄉人盧光稠相與聚兵。謀署首領。衆推全播。怒曰。諸君舉事。必望成功。須藉良帥。盧公軀貌堂堂。眞諸君帥也。衆唯唯未定。全播拔劍三擊庭樹曰。不從令者。與此樹同。乃立光稠。而全播爲謀主。所向多捷。兵勢漸盛。遂破王潮之衆。入據虔州。推光稠爲兵馬留後。全播分掌城中兵。天復三年。與潭人共伐番禺。下韶州。潭人不利。乃引還。光稠命其子延昌守韶州。其弟光睦戰敗奔還。潮人乘之。伏兵四起。大破之。擒其首將鄭廉。遂從光牧圍潮州。番禺救之。乃引還。劉巖劉隱以廣州之衆伐光稠。以報韶州之役。旌旄相繼數十里。圍城十餘里。光稠大懼。全播曰。吾諳劉公易與耳。無足憂也。光稠喜曰。虔與韶昔與君所共定也。此日之事。非君不能辦之。於是治戰場於城南。告戰期於劉巖。巖令諸軍曰。戰之日。勿殺虔兵。悉可生擒之。全播選精甲萬餘。伏於隍壑邱嶇之間。與老弱五千。鼓行而前。數戰乃退。巖縱兵長驅。伏發。巖等大敗。單騎遁免。斬首萬餘級。光稠議功。全播悉讓諸將而不受。自是光稠大歎賞之。俄有疾。將以符印授全播。不從。光稠死。延昌自韶州奔喪。全播立事之。延昌好游獵。荒傲無度。大將黎球俟其出獵。閉壁門而殺延昌於城外。球以全播不與己同謀。將害之。全播請老閉關不出。後球方欲蒞事。見延昌持彈叱責之。球中丸而死。衙將李彥圖復知州事。全播懼禍。稱疾篤。杜門。李彥圖疑之。與議親姻。多方以覘其動靜。全播應覘爲狀。終不可識。廣州聞全播之病。乃北侵陷韶州。李彥圖卒。其子不肖。閉子城。以自衛。州人無歸。相率詣全播第。請爲帥。拒之不可。遂從之。遣使詣梁。俄授萬勝軍防禦使。

五嶺虔韶二州節度開通使檢校太尉開國侯。在任七年。人物殷盛。俄而徐溫命劉信伐之。信以大衆填其城濠。全播令人潛爲地道。運其土。濠深如故。信以爲神。莫之測也。攻擊萬端。不能尅。遣使說之。令歛服。全播請從。溫聞之。怒曰。信以十倍之衆。不能下一城。何以取威敵國。命回兵攻尅之。擒全播。以歸。授左威衛將軍。領虔州如故。卒於江都。年八十五。當盧光稠之未舉南康。先有謠言曰。盧破黎頭出。李子始花開。潭深魚正聚。楊柳西邊栽。旣而光稠有南康。至于延昌而破。黎球繼球死。李彥圖繼之。全播方盛。柳者劉也。而楊氏命劉信攻取之一郡之地。何冥數之豫定若是乎。卷一萬八千一百三十五第四頁

李濤

濤。趙郡人。祖遠。唐杭州刺史。父逸。壽安令。濤。涉書史。會唐末。四方盜起。乃投筆從軍。光啓三年。秦彥囚高駉。濤從行。密舉義。列八寨。維揚西。彥盡以步騎背城求戰。俄而彥軍已破一寨。諸將以兵勢相懸。宜堅壁勿出。濤怫然曰。今以順伐逆。豈論衆寡。設令欲退。將焉歸。濤願以所部爲前鋒。請觀破賊。行密壯之。遂出戰。果敗彥軍。自是無復敢出。濤以功遷騎軍都尉。渥襲位。授和州刺史。初行密旣卒。張顥陰有異志。以都統符印送宣諭使李儼行事。嗣王意未決。一日諸將共議。四座畏顥。無敢言者。濤曰。都統符印是昭皇御翰。所賜王父子承襲。用在不疑。苟付他人。中外安仰。諸將以其辭正。皆伏義。顥獨默然。投袂而去。渭襲位。遷吉州刺史。十年。授行營招討使。攻越臨安。濤敗。陷於越。順義元年。吳越通好。杭人厚禮歸之。授左雄武統軍。加泗州防禦使。遷寧遠軍節度使。天和四年卒。年七十二。卷一萬八千一百三十三第十四頁

鍾章

章字憲明。廬州合肥人。少不拘細行。雄果有四方之志。中和中行。密據合肥。召置帳下。累從征討。皆克獲。有功。天復三年。朝使李儼至。行密得承制拜授。以功歷左監門衛將軍。天祐五年。張顥弑溥。將出。徐溫守潤州。以圖自立。溫與儼可求謀。非章不可除顥。章知之。因選士三十人。夜集軍舍。椎牛享之。刺血而飲。以爲誓。溫謂曰。吾有老母。不若且止。章曰。斯事一言既出。寧可中輟耶。明日。章與姚克贍。殺顥於衙堂。遷檢校尙書。左僕射。左衙副指揮使。從周本攻越州。拔衆夜歸。越人襲之。章以二百人散樹旌旗於菰蒲間。越兵退去。絕糧三日。章壯氣無衰。章自以除顥功大賞薄。會與骨言爭握槩。因譁語較軍功。以及之。溫聞而歎曰。斯固吾過也。明日。加章滁州刺史。滁民有訴章者。章詣金陵自理。溫逆謂之曰。無事爲理。已改授公光州矣。章遂之任。未幾。遷壽州團練使。會疆吏告章侵市官馬。因遣王稔以巡霍邱爲名。往代章。章歸中途。改饒州刺史。俄召歸金陵。在郡二年。加同中書門下平章事。章多力。嘗怒其家人。其人匿避。章愈怒。因拉折鐵杵。後卒於治所。年六十二。卷一萬八千一百三十四第十三頁

朱瑾

瑾。宋州下邑人也。雄武倜儻。有吞噬四方之志。光啓元年。汝陽曹全昱遇害。鄆城無帥。鄆兵共推瑾。兄瑄爲留後。瑾之季仲俱爲列校。明年。兗州齊克讓妻女於瑾。瑾伏兵仗假稱聘禮。改服甲士。詐爲昇夫而往。親迎。夜發。卒殺兗州軍校王稠。膚遂虜克讓。詰旦自稱留後。三年夏。秦宗權併兵攻夷門。梁祖幾至不守。會瑄援至。合梁祖兵大戰城北。瑾單騎嘗寇。馳突往返。當者無不披靡。宗權敗走。自是瑾與梁軍互爲犄角。屢破宗權。朝廷以功授瑾兗州節度使。未幾。梁祖交惡於瑾。遂成仇敵。大順二年冬。瑾率兵萬人。攻單



父梁祖遣丁會禦之。瑾軍大敗於金鄉。景福初，梁祖攻徐州。瑾率全軍來援，時溥擊梁軍，殺其將霍存。因席卷十餘寨，乾寧元年，梁祖親攻鄆。瑄、瑾合兵迎戰，敗之於東河。二年春，梁祖將朱友恭攻瑾，塹其城守之。是時連歲交兵，四郊無耕織，瑄、瑾勢蹙，因間遣使乞師太原。李克用假步騎五千濟河，梁人退舍。十月，梁祖復親攻兗州，塹圍之。瑾單騎求鬪，梁將無應敵者。瑾兄瓊先以齊州納欵於梁，梁祖使瓊臨兗州說瑾。瑾怒瓊無急難之義，僞遣使告降。梁祖自至延壽門與瑾交說，瑾謂梁祖曰：「兗城符印，他人莫可付，願得兄來付與。旣而梁祖遣掌謁劉捍與瓊偕至，瑾馬立橋上，遙謂捍云：「願兄先來，乃麾將士擒瓊，徑入未頃城上。大譟，擲瓊首於外。梁祖大悔，因班師焉。四年正月，鄆州先下，瑾亦糧盡，與晉將李承嗣史儼求軍食於野。梁將龐從奄至城下，瑾將康懷貞率瑾子私以兗城送欵，歸不得入，引承嗣諸軍將保沂州。爲其將尹處賓拒關不納，瑾狼狽將奔海上，復追之，迫乃渡淮，歸於行密。行密迎之於高郵，待以殊禮，立解所服玉帶爲贈，授甲第，遺財帛鉅萬，表瑾領武寧軍節度。淮南行軍副使是冬，梁祖遣將龐從大寇青口，行密親征之，令張訓以羸兵前導，從意輕吳師，貪奕棋，不顧。瑾請假梁人旌旗，率騎潛濟，突入從中軍營，行密得引兵急渡，爭破諸寨，遂擒從，斬之，乘勝攻淝河軍，葛從周敗走。光化二年春，從行密攻彭門，移師偃宋，梁祖屯睢陽以禦瑾。會天大雨，與瑾交綏而退。天復三年，授瑾東面諸道行營都統，平盧軍節度使，同中書平章事。天祐十三年，淮南小校馬謙李球乘酒脅衆，挾涇登橋樓，發武庫兵爲亂，陳於門橋北，外衆屢却，會瑾自浙西至，惟引一騎視其坐起，云：「此不足爲禍，因返顧外衆，推手一呼，亂兵皆潰去，遂擒謙。是冬，與行軍副使徐知訓率兵攻潁州，梁人援至而解，涇將開國知訓患瑾位加於己，請以泗州建靜淮軍。

出瑾爲節度。先是瑾因朔望令女妓通候。問於知訓。知訓淫縱。強欲私之。瑾心已不平。復有是行。會知訓夜張祖筵。瑾中宵先起。詰旦度知訓酒方困。復留刺以去。旣阡。知訓果來謝。瑾因延入室。出其妻陶氏。知訓方拜。瑾以笏擊之。踣於地。左右自外突入。殺之。初瑾先繫二惡馬於廡下。及將圖知訓。密令釋其羈。繼馬果蹄嚙。外人莫得聞。變因斬首以出。知訓從人數百。瑾扼臂叱之。俱辟易散去。復乘知訓馬。馳入府中。訴於渭云。今日爲大王除患。渭曰。此事吾不敢知。因命瑾疾去。瑾忿。以知訓首擊柱。詬渭曰。懦夫安足與成事。攜劍復出。望府門已闔。因踰垣折足。大呼曰。吾爲萬人除患。今以一身當之耳。遂自刎。夷其族。時年

五十二。

卷一萬八千一百三十四第八頁

### 米志誠

志誠。沙陀部人。少嫻騎射。以驍勇聞。乾寧四年。奔於行密。龐從寇青口。葛從周塞淖河。志誠俱爲前鋒。連戰皆勝。以功遷馬軍指揮使。田頵叛於宣州。志誠與臺濛敗頵於廣德。天祐六年。危全諷將伐鍾陵。湖南遣苑玫屯上高。以爲全諷聲援。命志誠與王祺率兵破之。十年。從徐溫敗錢瑛於梁谿。後又破王茂章於淮上。十一年。隨柴再用討劉崇景於袁州。敗袁人於萬勝岡。崇景棄城遁去。遂入之。先是袁人兒童聚戲。穴地爲釜。圈箬爲甑。曰。將柴米來。至是果應。以功加檢校太傅。領泰寧軍節度使。十五年。朱瑾殺知訓。攜其首入府中。志誠聞之。被甲引其子。并親從十餘騎。至天興門。問瑾所向。聞瑾已死。乃歸。徐溫疑其助瑾。遣使殺之。嚴可求懼其不克。遣人僞自袁州至。告大破楚人。諸將皆賀。志誠亦入。因伏壯士斬於棘門之下。諸子皆棄市。卷一萬八千一百三十四第十四頁

翟虔

虔、彭城人也。乾寧初，徐方將陷，虔盡室南渡，謁行密於廣陵。及徐溫典右衛，以虔爲軍佐，屬張顥之亂，溫與嚴可求陰計其事，密遣虔往復傳達，及誅顥，虔有力焉。因授子城甲仗諸庫院鈐轄等使。天祐十五年，朱瑾殺徐知訓，挈首突入府門，時兵衛倉卒，莫敢抗禦，虔驅率散卒，共閉關，瑾以是不得出，遂踰垣折足自刎而死。會米志誠引十餘騎，問瑾所向，聲言以襲瑾爲名，虔乘闖謂曰：「瑾已戮矣，何不急自歸營？」因是志誠遂返，渭喜其應機却賊，以瑾宜陵莊賜虔爲賞。及吳國建，復旌其勳，授閣門宮城武備等使，領光州刺史。順義四年，溥幸白沙，對徐溫呼雨爲水，溫請其故，溥曰：「此是翟虔父名，吾慣諱矣。」因言宮內諸王須索，虔多阻限，不時進納，溫欲斬之，爲溥救護而免，黜於撫州。未幾授行軍副使，及廉使，徙任虔知本州軍事。七年卒，年六十三。卷一萬八千一百三十四第十六頁

張可琮

可琮不知何處人，中和之亂，奔於江淮，行密識其勇毅，擢在左右，破孫儒於宛陵，先登陷陣，稍遷列校。時吳人初得宣城毗陵之地，無錫居越人之衝，患其攻擾，天復中，選可琮守之。錢鏐忌其名，揀驍將卒二千，中夜襲之，邑中大擾，可琮閱兵得百餘人，皆乘城疾戰，越人驚潰而去。吏士皆賀，可琮笑曰：「彼衆我寡，其勢未已，方復勞諸軍一陣爾。」於是息燈火，屏旂鼓，若空邑然。越人偵之，以爲宵遁，果復至。可琮約將士候其附城，突擊大破之，寇盡潰去。方告於郡守李簡，簡雖怒其不時告，且壯其事，列上其功。後以徐溫之命，掠東洲下之，卽以爲制置使。天祐中，除江陰縣鎮，遏使遂城江陰沙山之役，可琮以江陰之衆，供軍旅展

斥候無闕謀。徐溫喜之。擢拜常州刺史。大修城隍。民賴以安。順義五年卒。年六十五。

卷一萬八千一百三十四第十八頁

### 鄭璠

璠。汝南人。始事秦宗權。後隸孫儒。入淮南。尋歸行密。前後戰伐。皆預行。光化四年。授左先鋒兵馬使。是歲。從李神福攻臨安。擒越將顧全武。方宇等四十餘人。遷左衙將。天祐初。王茂章征安仁義於潤州。洎城陷。中十餘創。以功遷左先鋒都尉。從攻豫章。璠以所部發機飛火。燒龍沙門。率壯士突火先登入城。焦灼被體。以功授檢校司徒。復從柴再用與越人戰。敗。及陳璋復東洲。璠城而守之。復會呂師造攻蘇州。與越人戰。虜其次將陳綰。璠左脇中弩幾死。授蘇州行營都指揮使。周本擒危全諷於象牙潭。璠所部功多。又攻新淦縣。克而守之。尋以張宣代歸。復佐周本攻袁吉。緣山疾戰。悉收其巖壁。焚之。民皆復業。十五年。從王祺。劉信攻虔州。克之。授璠羅城使。順義元年。領饒州刺史。六年。知楚州。率兵援汀州軍事。乾貞元年。就拜團練使。二年。授鎮南軍節度副使。知軍府事。大和三年。授饒州刺史。五年。遷金陵行軍副使。卒。年六十六。

卷一萬八千一百三十四第十八頁

### 楊彪

彪。宿州人。身長七尺餘。呼聲如鐘。倜儻有武幹。善騎射。行密見而壯之。擢授衙內散指揮使。渥嗣位。潭人犯邊。授西南面行營護軍副將。謂諸將曰。彼衆我寡。未可輕動。乃守其要津。以輕兵挑戰。登高以望之。見其麾下進退不一。彪笑曰。非勍敵。乃縱兵出戰。親射其首將殺之。順風焚其艦。溺殆盡。凱旋。擢授江寧鎮。遇使徐誥鎮潤州。充都尉。以從。越人寇無錫。東南大震。知誥東征。彪與陳再遇領死士千人於路次。弓

弩忽發。越人驚擾。又竊賊號令以入其壘。殺獲其衆。明日又戰。自旦及辰未決。彪躍馬疾馳之。越人遂退。師還以功授殿直軍副使。與郭悰分直宿衛。徐知誥謂之曰。郭悰猛而少機警。宿衛之職。唯爾是賴。大和三年卒。年五十二。卷一萬八千一百三十四第十九頁

陳祐

祐。歷陽人。年十七。歸行密於合肥。從入廣陵。孫儒來襲。吳師亂。祐之卒伍獨成列。泊入宛陵。稍遷爲偏校。時行密修貢於天子。祐應募而行。達於朝廷。制授兼御史中丞。從攻滁濠壽等州。重甲先登。戈傷身墜。而復上。敗龐從葛從周朱友寧。皆預戰有功。秦裴下豫章時。宋思勅范師從陳鏞以兵戍之。鏞等皆渥之腹心也。張顥忌焉。令祐以渥命往誅之。三校皆勇士也。顥旣遣祐行。甚憂之。祐踰險。輕行六日。至豫章。微服懷短兵入秦裴帳下。裴驚其來。具告之。因責裴以不能制三帥。而令有異謀。裴懼未及對。祐乃令召思勅等宴會。及至。則祐已與裴飲矣。三校入見。祐皆色變。俄而酒三行。祐數其罪。悉叱而斬之。以歸。徐溫之誅張顥。祐有力焉。天祐七年。越人侵無錫。徐溫自征之。祐率黑雲都尉以從。諸軍未集。祐告溫曰。寇謂我勞頓而至。未能陣也。願以所部先薄之。大軍見可。則進。溫從之。祐詭道以出。賊後會。大軍夾攻。大敗之。十三年。溫在潤州。小將周郊詐稱役徒。懷短兵入府。多殺軍吏。而衛士無兵仗。拔武庫之撻出兵仗。授之以戰。或有自後擊祐。傷腦。踏於地。從者負之。息於門下。稍蘇。時賊雖息。府中尙擾。升樓傳呼。不能止。祐舉首叱之。衆皆投兵仗罷去。溫手封其傷。授黑雲都尉。溫遷金陵。制宮室府署。命祐董其事。以功加檢校司空。

大和元年。授饒州刺史。卒於任。年六十五。卷一萬八千一百三十四第十九頁

劉權

權許州人少從軍於蔡州景福元年來歸行密入淮南隸田頽麾下累遷同州節度副使光化二年頽與越人戰權乘勝深入爲寇所得錢鏐見而慰之曰爾壯士也吾終不以俘虜相畜洎通和縱之歸渥襲位補衙將渭開國以權侍衛勤肅授左衙副校檢校右僕射從周本攻蘇州回授右衙列校爲毗陵子城使率海船與越人戰勝充洪州都督長史領吉州刺史潁川之役授行營都虞候時徐知訓爲帥而軍政皆委朱瑾梁將袁象先帥部騎救潁瑾晨興望西北皆昏黑知梁兵將至召權與議值天大寒權幅巾錦袍而至瑾問曰爾何職曰行營都虞候瑾曰是職也動必爲諸軍見今氛興西北陰霾閉天此梁人至矣爾司斥候尙爲此服且軍禮何在叱左右執之就戮知訓徒跌而往救之僅免時梁祖兵已至戰少不利乃引還及瑾殺知訓城中恐懼將從而爲變權出師而瑾自殺衆乃肅然徐知誥至自丹陽遷左右軍都押衙事武義元年領雄武大將軍六月從徐溫與越人戰於沙山洛社敗之俘其卒數千七月從知誥戰無錫大破越人二年卒

卷一萬八千一百三十四第二十二頁

崔太初

太初淮西人父亮蔡州監牧副使太初身長七尺勇力過人中和末以大刀長槊應募行密見而偉之召居帳下歷壽州衙內副指揮使天復中田安將謀叛行密疑朱延壽與之交結太初累從延壽征討曾諫延壽及延壽擒行密嘉其意遷太初衙內都指揮使天祐十五年從徐溫破王茂章遷本州司馬權知壽州團練事先是壽春自乾符後守卒俱爲多謀彊力者據而後奏報以要恩及陳紹卒宣王遣王定持虛

銜官告以往。令度可授者與之。定以軍政雖出太初。而職在銜將甯。審言之次。因潛報太初曰。詰朝若州之符印。再至於君。慎勿更讓。明日召諸將齒先。以符印置坐末。以次第遞捧而上。及審言而止。定曰。王府之命。非甯公而誰。然合更相推以成禮也。審言如教。復至太初。定曰。唯公不可多讓。乃麾其下位者。俱令列賀。復數日。軍州無異議。始以官告授之。人有密譖太初。常蓄鄉關之念者。會徐知訓征潁州。路出壽春。且觀其意。太初著烏帽草履。徒步至場山。爲知訓馭馬十餘里。知訓見其屈降。前疑大釋。太初不喜。儒生多疑好察。每通衢交會之所。牆必置耳。常謂人曰。還聞牆有耳否。又曰。非牆耳。乃吾也。由是行路之人。鮮敢偶語者。召歸授右雄武大將軍。加檢校太傅。同中書門下平章事。守左殿直統軍。太和三年卒。年六十六。卷一萬八千一百三十五第三頁

陳彥謙

彥謙。毗陵人。少負壯節。有理繁治劇之才。行密定江表。召爲潤州司馬。以幹略聞。徐溫鎮浙右。以機務爲寄。彥謙亦坦然不疑。言行計從。人莫能間。溫欲居金陵。問策於彥謙。對曰。金陵昔爲王者都。今實近畿關輔也。作鎮於彼。其誰不往。溫從之。遷彥謙金陵大都督府右司馬。營度外城府署。三年而畢。上經費之籍。天祐十五年。朱瑾殺徐知訓。溫急召之。謂之曰。蛇豕雖亡。枝蔓猶在。令就廣陵除其餘孽。及梁祖卽位。隴蜀建號。彥謙勸溫諷建朝廷。及更章服。彥謙頗有力焉。溫嘗閱帑藏。見金帛委積。因曰。此三軍物。吾豈敢有焉。致此盈衍。公之力也。因授鎮海軍節度判官。無錫之役。未戰而溫疾。吳越兵攻其帳。我軍相顧失色。彥謙卽引旗鼓。詭遷於左。其攻稍息。及敗越兵。遷楚州團練使。諸藩郡歲時伏臘。事獻賂遺。溫悉令納。

之病温親往慰問。自調湯藥。臨卒。手疏十餘事。首卽以用嫡嗣爲請。順義五年卒。年六十。卷一萬八千一百三十四第二頁

### 高澧

澧。越州人。祖實。唐武寧軍節度使。父瑰。湖州刺史。澧爲錢鏐之將。累功。遷特進。湖州刺史。武義軍使。天祐七年。以受疑。挈家屬二百餘口。甲卒五千來奔。授淮南節度副使。澧嗜酒好俠。殺人而飲其血。日暮必於宅前後。掠行人而食之。一日醉在樓上。王寬經其下。澧召之登。而命左右去其梯。操鋌於旁。而以酒虐寬。寬爲所圖。乃以大觴酢之。澧皆推觴。寬躍而取其鋌。橫之於膝。乃慢罵澧。連以觴爵之。澧辭不飲。寬乃引鋌逐之。澧環席而走。叩頭乞哀。併飲十觴。臥不能興。寬乃下樓。徐去。泊上馬。命以鋌還之。十五年。徐知訓爲朱瑾所殺。徐温遷怒誅之。卷一萬八千一百三十四第二頁





# 九國志卷三

吳

列傳

田 頽

安仁義

朱延壽

徐 温

田頽

頽字德臣。廬州合淝人。博覽書傳。容止儒雅。雄果有大志。少與行密同鄉。及戍塞上。情好愈密。軍回。俱遷入營。主將中和二年。行密圖有淝上。頽首爲輔翼。光啓二年。壽春張勗遣將魏虔率衆來寇。行密使崔自審禦之。敗。復命頽往。大破虔衆於楮城鎮。三年。從行密破秦軍于維揚。頽功稱最。文德元年。圍趙鎰於宛陵。明年夏。鎰糧盡。舟出東溪。乘瀑流以逸。將奔淮南。鎰度行密皆步騎。限水無從復至。因泊永陽。解甲登岸。初。頽疑鎰將遁。密造輕舟撻之。至是。追及。鎰奔不暇。爲頽親執。以獻。奏授頽馬步軍都虞候。檢校尙書左僕射。是冬。與安仁義攻杜稜於常州。下之。十二月。復爲孫儒所敗。大順元年秋。頽屯浙右。懼儒兵盛。焚浙右營。散於野。二年春。退軍黃池。廣德與孫儒軍寨壘相望。頽兵屢戰多北。會夏大雨。儒等多墊溺。避水而歸。是秋。儒盡焚維揚。復濟師廣德。十月。頽率敢死士千人。夜襲儒將張景思。沈粲二寨。破之。擒粲而返。十二月。頽與劉威大爲儒所敗。行密怒。盡奪其衆。儒遂乘勝逼城。戴友規言於行密曰。彊敵匝壘。不用田頽。恐非長策。行密遽復起之。明年六月。盡破賊寨。頽親與其下范文感等臨陣擒之。秋。行密歸淮海。表頽

寧國軍節度。累遷檢校太保。同中書平章事。乾寧三年夏。同安仁義破越之蘇州。光化末。馮宏鐸以樓櫓自將。介守上元。頽以厚利購得其工。令速成大艦。工曰。馮公每一舟必遠求榘楠。旣成。數十歲爲用。餘木性不禁水。非久必敗。頽云。汝但以此地木造之。吾只圖一用。不假多年爾。因而急就。天復二年四月。果與宏鐸戰於葛山。宏鐸大敗。舉族奔淮海。遂以上元地歸行密。頽隨入覲。會行密左右要賂者衆。下及獄吏。亦有私請。頽愀然不懌。謂所親曰。斯吏亦欲吾下獄哉。頽方求池歛爲屬郡。行密復未之許。頽意望素高。由是愈不能滿。及回。指維揚南水門云。此門不復經入矣。初。行密克定江淮。方撫循百姓。而頽與安仁義。朱延壽等。皆猛鷲驍勇。以攻取爲務。行密憚其難制。每抑之。是秋。錢鏐遊臨安。其下許再思。徐綰。以餘杭外城叛。召頽爲應。鏐得舟夜從水路入保子城。時頽圍之愈急。鏐屢遣間使哀求。行密亦以頽若得志。杭越爲患必深。不若存鏐。別圖進取。因召頽歸鎮。鏐復輸錢二百萬貫。以元瓘爲質。頽始旋軍。自是財富兵盛。復以取杭越。垂下爲行密所召。乃與錢鏐和親。反意遂決。三年秋。頽與潤州安仁義同叛。初。召其謀將康儒議。多忤意。行密因而間之。遣使授儒廬州刺史。頽果疑儒私納款。遂旋師。先是。行密遣李神福攻武昌。及頽反。行密急召神福旋師。頽聞之。復以兵襲上元。劫神福子承鼎。遣喻意云。苟見機從吾。事平之後。當分地以治。別命將汪建以樓櫓踵其後。神福不顧。叱左右射承鼎。以誓諸軍。明日。大破建於吉陽磯。頽聞建敗。自督親軍求戰。神福收兵皖口。際水爲堅柵。是時。行密別遣臺濛。王茂章。率步騎以往。頽復委舟師於汪建。王壇。自出廣德迎戰。大爲臺濛所敗。遂率殘衆遁保宛陵。壇建聞其敗。因盡以舟師歸欵。於行密。十二月。頽出外州柵疾戰。橋陷馬墜。爲外軍所殺。時年四十六。頽母老。行密哀而捨之。初。頽與行

密微時約爲兄弟。渥渭俱以子孫禮事其母。頽善撫將卒。通商惠民。復疎財。愛樂文士。時游其門者。楊夔。康駟。夏侯淑。殷文圭。杜荀鶴。王希羽。晚年楊夔知頽以兵賦自恃。將謀爲變。因著溺賦以諷之。頽終不顧。以至於敗。

卷一萬八千一百三十四第五頁至六頁

### 安仁義

仁義。沙陀人。初事李國昌於塞上。以過奔南河。隸秦宗權軍中。光啓三年。擢爲馬軍指揮使。從宗權弟宗衡攻維揚。及宗衡遇害。復奔行密。行密得之甚喜。盡以騎軍委之。列在田頽上。文德元年。從行密破趙鎰於葛山。與頽攻杜稜於常州。破之。大順初。梁祖遣將龐從率衆十萬至高郵。孫儒盡衆禦之。行密乘虛襲據浙右。命仁義率衆敗儒將劉建鋒於武進。儒復渡江陷蘇州。自是與儒春夏鬪黃池。秋冬戰廣德。儒軍竟以衆勝。圍行密。仁義於宛陵。時儒亦以久戰不決。貽書仁義。敍舊款密。欲令行密猜間之。行密待遇愈至。辟爲行軍副使。依前馬軍都指揮使。景福元年。行密仁義及田頽背城晨戰。儒軍大敗。破五十餘寨。以功奏授檢校尚書左僕射。潤州刺史。仁義蕃性好貨。雖凋弊之後。科歛尤急。初儒之亂。士庶多奔豫章。及諸郡平。流者皆復。行密皆以循吏守之。唯浙右人聞仁義所爲。相與悲歎曰。獨吾郡乃得蕃人。以是多無歸者。天復三年。仁義遣衆盡焚東塘戰棹。結連宣州。田頽以叛。潛兵襲常州。刺史李遇設伏於路。率兵前戰。因極罵仁義。仁義止其衆曰。遇何敢辱我至此。是有伏兵也。偵之果然。仁義戰久而敗。遇因襲之。至來岡。仁義立二幟於岡上。乃解甲而食。無敢追者。行密遣王茂章。李德誠攻仁義。仁義不毀濠梁。常開門出戰。與茂章對敵。無不先告所中。而後射之。故諸將多挫銳而止。以是歷年不能破。天祐二年。仁義之衆漸

寡。自度終不濟。乃擁其家屬登城樓。外衆無敢登者。呼李德誠謂曰。汝最福人。可以委吾命。擲去弓矢。令德誠執之。父子俱斬於廣陵市。卷一萬八千一百三十四第六頁

朱延壽

延壽。廬州舒城人。行密之妻弟也。美姿容。未冠。事行密。從征秦。畢孫儒。皆以摧堅陷陣受賞。行密鎮維揚。授延壽以干城之任。時軍中多盜。行密方務寬恕。求得士伍心。知延壽好殺。每捕至者。必并所盜物。遺而貰之。仍誡之曰。慎勿使延壽知。既而密報延壽。俱復擒殺之。乾寧初。黃州吳討歸歎。遣延壽援之。狗地。斬陽而還。從圍壽春。城堅不可拔。將捨之。延壽請以所部試往。臨城一舉而破。城中市不易肆。以功署淮南節度副使。壽州刺史。明年取蘄光二州。以功遷團練使。四年。從征葛從周於淖河。敗之。是後。梁將屢寇淮上。延壽每開關延敵。未嘗敢逼。天復初。北司擁駕西幸。昭宗聞延壽有武幹。遣李儼間道。賈詔授延壽蔡州節度使。令促行密與諸道犄角。共誅梁祖。會鳳翔圍解而止。田頵安仁義。結構延壽叛。將分地而治。行密憂形於色。卽詐爲目疾。每接延壽。使必錯亂。所見以示之。嘗誤觸楹柱。而朱夫人救之。良久始蘇。因泣曰。吾今喪目。軍府事大。兒子輩俱幼。不如得三舅代治。吾無憂矣。夫人因以書召之。延壽不疑。遂來覲。行密迎至寢門。使人刺殺之。年三十四。出夫人嫁蘄州刺史石贍。既而朱瑾入賀。行密曰。彼二大賊。不足憂。惟憂此小賊。今得之。無事矣。延壽善用兵。有鈴略。好以寡擊衆。不勝敵而反者。無不盡戮之。嘗與梁人戰。遣衆二百持大劍。而往。內指一卒留之。卒云。願攻賊自效。延壽亦斬之。其令出必行。皆此類也。性疎財。每得賞賜。皆分賚將士。李昇建國。以延壽子鄴。列於環衛。復其官爵。卷一萬八千一百三十四第十頁

溫字敦美。東海朐山人。少無賴。入羣盜中。以販鹽爲事。中和二年。行密起合淝。遂隸帳下。爲伍長。常從行。密征討。先登陷陣。敵人畏之。及平秦彥。虜趙鎰。敗孫儒。溫皆有功。奏授衙內右直都將。左長劍都虞候。又從平濠泗有功。授隨身都知兵馬使。檢校工部尙書。天復二年。昭宗徵兵入援。行密將赴之。議以戰艦運糧。溫曰。此水入吳。舟楫不敢南行。岸谷旣變。葭葦且深。必不繼矣。遂令以小艦易之。師次宿州。重載不能進。士卒甚饑。惟小艇先至。一軍賴之。行密嘉之。由是參預謀議。討安仁義於京口。諸軍頻戰不勝。行密遣溫率兵援之。溫至城下。盡易新製衣服旗幟。悉用舊者。仁義不知如常而陣。溫乃麾軍奮擊。遂敗之。朱延壽入覲。行密聞其來。慮有內應。召溫歸陰爲之備。旣殺延壽。營中軍亂。溫奮劍大呼。斬其首惡者。部分遂定。旣誅三叛。以功授尙書右僕射。廬州長使。隨授右衙都指揮使。天祚二年。行密疾病。渥出鎮宣城。將行。溫謂渥曰。公有病。而令嫡嗣出外。必姦臣爲之。不可不防。他日有徵召。非王令某手書。非某之使。幸勿應命也。渥泣謝而行。後行密問後於判官周隱。隱以劉威對。諸將皆無言。溫進曰。宣州旣賢且長。國之令嗣。不可廢也。乃召渥歸。行密疾甚。召溫與左衙都指揮使張顥同受顧託。渥旣嗣位。憤大臣擅權。政非己出。乃置東院馬軍。置立親信。以爲心腹。溫與顥頗忌之。故顥將圖弑逆。溫知其謀。而無所諫止。但引嚴可求與之計事。顥旣弑渥。白溫議分國兵。共歸欵於梁祖。溫僞許之。乃與可求謀。使鍾章姚克瞻程思忠等入殺顥。溫稱疾不朝。嚴兵於第。以防不克。是日章等斬顥。溫乃入。悉收賊黨紀祥等。誅之。遂兼左右衙事。無大小。皆專斷。始立制度。戢兵明禁。人漸安堵。溫謂可求曰。大事定矣。與公等克己行善政。使人家解衣而

寢。於是聞者莫不感激。渭襲位。遷溫昇州刺史。淮南節度副使。七年起復。檢校太尉。潤州刺史。浙西觀察使。內外馬步軍指揮使。是時大臣劉威陶雅李簡之徒。皆與行密同起義。勳高任重。溫以一旦之功。起居其上。皆內意不服。李遇嘗謂人曰。徐溫何人。吾素所未識。而遽至此。豈可入覲耶。乃密議誅溫。溫知其謀。遣柴再用討之。遇出降。遂夷其族。於是雅等始懼而來覲。溫盡禮事之。如見行密。雅等乃安。中外遂定。以平李遇功。加平章事。遷行軍司馬。領浙西節度。十二年。溫請就藩。以治舟師。乃加浙西招討使。封齊國公。以金陵京口毗陵宣城新安池陽六郡爲都督府。溫以金陵形勝之地。乃大城昇州。建大都督府。十四年。溫徙治金陵。以第三子知訓爲淮南行軍副使。留廣陵以輔政。十五年。知訓爲朱瑾所殺。以長子知誥代焉。時中朝多事。南北道絕。諸將分守郡府。雖尊奉盟主。而政令征伐。多以便宜從事。溫以都統權不足。臨制。乃定冊建吳國。改年武義。稱制。拜溫大丞相。封東海郡王。越人攻常州。溫率衆拒之。戰於無錫。大敗。越軍。越人多舟師。是歲旱。江河皆竭。諸將白溫曰。此天亡越之時也。可盡車徒之勢。一舉而滅之。溫曰。天下紛紜。民甚困矣。錢公亦未可輕也。若連兵不解。方爲諸君之憂。今戰勝以懼之。戢兵以懷之。其勢不得不服。使兩地之民各保室家。吾輩亦高枕爲樂。豈不快哉。多殺何爲。乃遣使盡以俘歸之。於是越人請和。順義三年。後唐莊宗滅梁。始通使於朝。五年。封溫東海王。賜車輅。冕。七年十月。卒於金陵。年六十六。追封齊王。諡忠武。

卷一萬八千一百  
三十四第一頁

# 九國志卷四

南唐烈祖以晉天福二年受吳禪。至後主煜乙亥歲國滅。蓋宋開寶八年也。歷三主。凡三十九年。

## 世家

烈祖 姓李名昇字正倫小字彭奴徐州人初為徐溫養子冒姓徐氏名知諳吳太和二年嗣溫位天祚元年封齊王三年受禪改元昇元國號齊尊溫為太祖武皇帝昇元三年二月乙亥改

太祖廟號為義祖己卯改國號曰唐復姓李氏更今名七年二月庚午薨年五十六諡曰光文肅武孝高皇帝廟號烈祖葬永陵

元宗 名環字伯玉初名景通昇長子昇元七年三月己卯嗣位改元保大十五年改元中興是年臣屬於周奉正朔蓋周顯德五年也宋建隆元年六月己未薨年四十六請於宋許復帝號

諡曰明道崇德文宣孝皇帝廟號元宗葬順陵

後主 名煜字重光初名重嘉環第六子宋建隆二年六月嗣立。在位十七年。至開寶八年十一月宋將曹彬滅其國。後主降。太平興國三年七月辛卯薨。年四十二。是日七夕也。贈太師封吳

王墓洛陽北邙山

## 列傳

### 周本

### 周本

本舒州宿松人。漢南郡太守瑜之後。祠廟隴畝皆在。子孫守故土者猶數十戶。本少孤貧。嘗在田里。獨格



猛虎。唐末大亂。投楊行密軍中。以勇敢聞。常先登深入。蒙犯矢石。身無完肌。及歸營。自燒鐵烙其瘡。飲啗言笑自若。軍中猛將皆服之。累遷淮南馬步軍使。天祐五年。楊氏始得江西。撫州刺史危全諷率諸郡兵十萬來爭其地。屯於象牙潭。楚人取高安爲之援。江南守將劉威告急。判官嚴可求荐本可用。時本從軍圍蘇州不克。恥之。稱疾不出。可求卽臥內強起之。本曰。蘇州之役。非彼彊我弱也。蓋上將權輕。下將專命。故爾。今必見用。願無任偏裨。可求爲言。楊氏許之。得選兵七千。使救高安。本曰。楚人非欲取高安也。爲全諷聲援爾。若先敗。全諷楚人必走。乃疾趨象牙潭。劉威要之。宴犒不留。或曰。賊勢甚盛。宜審觀形勝。定計而後進。何其遽也。本曰。賊有十倍之衆。使吾軍知之。必將奪氣。須乘其銳而用之。旣至。指授諸將。戮力急攻。大破其軍。擒全諷。諸郡之兵皆潰。楚人果遁。吉州刺史彭玕。信州刺史危仔昌。棄城走。於是江西之地。始定。以本爲信州刺史。越將陳璋據衢州歸歛。越人圍之。本受命以兵迎璋。旣至。越人解圍。陣於城下。璋以其衆來奔。裨將呂師造曰。賊去我咫尺。而勒陣不動。是輕我也。必擊之。本曰。吾受命迎陳使君。陳君今在此。吾事訖矣。何爲復戰。且彼近而不動。必有以待我也。擊可勝乎。待其先動。擊未晚也。璋亦以爲然。乃還。越人躡之。至中道宿。半夜佯驚。棄輜重走。先設伏於道左。越人急追。至伏所。前後夾擊。盡殲其衆。越人累至。皆敗之。唐莊宗入濟陽。吳遣司農卿盧蘋使於濟陽。莊宗問吳之名將存否。而本預焉。由是召入爲雄武統軍。出爲壽州節度使。移鎮廬州。拜太尉中書令。封西平王。本不知書。而愛重儒士。賓禮寮屬。不撓其權。吏民愛之。性純朴。技藝無能者。唯軍旅之事。則如夙習。烈祖將受禪。徐玠周宗等。以本及李德誠。皆位望隆重。故諷之以爲推戴之首。本以昏耄。仍不知時變。皆少子祚左右其事。時吳宗室臨川王濛廢處。

歷陽聞將授終乃殺監守者與親信二騎趨詣本本將見之祚固執不可本怒曰我家郎君也何不使我一見祚閉中門拒之濛被殺吳室遂移本隨衆至建康勸進由是愧恨數月而卒子鄴有戰功亦至廬州節度使

卷一萬八千二百三十五第五頁



九國志卷五

吳越武肅王以唐乾符二年起臨安至宋太平興國三年忠懿王納土歸朝凡三世五主有國九十八年

世家

武肅王

姓錢名鏐字巨美杭州臨安人唐乾符二年年二十四起兵討賊歷事四朝累加天下兵馬都元帥開府儀同三司尚父尚書令兼中書令上柱國吳越王後唐長興三年三月庚戌薨年八十一在位四十年諡武肅

文穆王

名元璿字明寶初名璿第七子後唐長興三年四月己未嗣位先是鏐以中原喪亂於梁開平元年改元天寶私行境中凡改元四天寶十六年寶大二年寶正六年至是以遺命用藩鎮禮仍遵中國年號在位十年於晉天福六年八月辛亥薨年五十五勅諡文穆葬於龍山之原

忠獻王

名宏佐字元佑元璿第六子晉天福六年九月庚申嗣位在位七年於晉開運四年六月乙卯薨年二十勅諡忠獻葬於龍山之西南原

忠遜王

名宏侗字隆道元璿第七子晉開運四年六月丙寅嗣位是時猶稱契丹會同十年閏七月漢以宏侗為吳越王遂遵正朔十二月晦丙寅統軍使胡進思等作亂劫幽衣錦軍傳位於弟宏倣居東府二十年始薨年四十

忠懿王

名倣字文德初名宏倣元璿第九子漢乾祐元年正月乙卯嗣位宋開寶九年正月入朝四月歸國太平興國三年納土歸朝賜居禮賢宅端拱元年八月二十四日薨諡忠懿以鹵薄鼓吹葬於洛陽縣之賢相里陶公原

列傳

杜建徽

鮑君福

成及

顧全武

黃晟

杜建徽

建徽字延光。新登人。父稜。廣明中爲鎮海軍節度副使。歷常潤二州刺史。兩浙行軍司馬。黃巢之亂。稜歸鄉黨。保聚徒衆。得十餘人。號武安都。鏐與董昌起兵。石鏡及平劉漢宏。其衆漸盛。稜謂諸子曰。吾每責人。不過十罰。則爲之傷心。竊觀錢公。每臨斬決。皆談笑自若。成大事者。必此人也。遂率衆歸附於鏐。光啓中。從征薛朗。以稜爲常州刺史。尋遷潤州。乾寧中。安仁義逼東陽。命稜率師討之。仁義宵遁。鏐平宣州。以其降卒隸中軍。號武勇都。爲腹心。稜常患之。密遣人白鏐曰。狼子野心。稜觀武勇都士卒。終非大王所蓄。願易之。鏐不聽。及徐綰叛。鏐思稜言。遣祭其墓。建徽少彊勇。不與諸昆弟類。嘗自署軍事。押衙。稜聞之。頗加詬責。建徽出顧左右而歎曰。大丈夫何止一軍校耶。後隨稜歸鏐。稜治常州。爲淮人所攻。建徽率兵馳赴父難。未及境。而城已陷。遂還新登。後稜自淮南歸軍中。嚴整無改。稜甚嘉之。累從征伐。未嘗介甲。所至輒有功。軍中謂之虎子。乾寧初。從征董昌。流矢貫臂。而戰不輟。開平中。從征姑蘇。與敵遇於河。河梁斷。策馬徑渡。及岸。而馬斃。因葬之。至今馬塚存焉。徐綰之亂。建徽率所部自新登來赴難。或有勸鏐東保會稽者。鏐未之答。建徽按劍叱之曰。事若不濟。當同死於此。誰敢東渡耶。鏐甚壯之。睦州陳詢叛。建徽之姻也。鏐疑建徽不言。俄有睦州親吏來降。持建徽所遺詢書。以示鏐。皆戒勵語。鏐大嘉歎。賜建徽錢百萬。從兄建思嘗譖建徽。言其第中蓄兵。仗將爲異圖。鏐遣人密視之。一日。建徽方食堂上。使者至。徑抵臥內。建徽但食不顧。鏐感悟。益加殊待。性儉率。出入導從。不過數人。凡得賜予。皆散施鄉里親族。每朝使至。鏐與之宴。

必指建徽以示之曰此杜丞相今日至此皆其力也其孫昭達爲宏佐內都監使盛治第宅建徽曰乳臭兒不諳事乃爾後昭達果以罪誅嘗從擊踰于廣場盤辟大呼舊所中箭鏃忽自臂中迸出人皆壯之初稜之將死也散財物於諸子至建徽但得一笏謂曰此吾所秉者唯汝能保之建徽自授節鉞至於丞相封鄖國公皆奏授朝命子弟多至二千石連姻公室人稱其盛乾祐三年卒年五十八

卷一萬八千一百三十七頁第二十一頁

### 鮑君福

君福字慶臣餘姚人少羈貧性淳厚有膽勇餘姚有井面闊丈餘橫以雙梁水深不可測君福每醉必寢其上及從軍以驍勇聞初事劉漢宏及鏐東討乃率其黨來附號曰歸明都累從征討有功能馬上輪兩劍望之若飛電沈默少語軍中謂之鮑不鬧淮人寇三衛以君福爲應援使屬刺史陳章叛淮人入其城楊行密令其將李元嗣監守君福署以郡職君福不受鏐聞之恐其被害也乃密與絹書令其就職君福竟拒之一夕與元嗣飲伺其醉而殺之奔歸錢塘授衢州刺史淮人屢寇其境君福每擊破之及罷歸鏐勞之曰公在郡數年戰鬪而已豈爲優賢邪因復遣之任元瓘領清海軍節度辟爲副使同平章事兼侍中

天福五年卒年七十七

卷一萬八千一百三十七頁第二十一頁

### 成及

及字宏濟錢塘人祖克平唐嘉王府長史父貞國子監博士及性純厚爲鄉里所知光啓初江浙兵亂及保聚於富春稱靜江都劉漢宏作亂及以所部兵從鏐討之漢宏平鏐宴犒諸軍北闕鎮將孟安亂於席上拔劍將擊鏐坐中驚愕不敢動及徐起舉胡牀格孟安仆於地左右因擒殺之以功奏遷散騎常侍靜

江軍都指揮使潤州刺史薛朗。常州刺史丁從實叛。鏐命及討之。破朗軍於陽羨。進圍毗陵。從實具牛酒以犒之。並遺美女於諸將。及大怒曰。我當菹醢從實而食之。今乃以酒炙女子悅我耶。因盡索諸女斬之。親督諸將攻陷其城。從實遁走。以功奏授越州防禦副使。潤州刺史阮結卒。命及代之。遷蘇州刺史。乾寧三年。淮人攻姑蘇。常熟鎮將陸郢等以兵應之。及不能守。遂降於楊行密。行密入城。閱府庫。多圖書藥物。由是重之。與歸淮南。署行軍司馬。及拜泣曰。及以百口託於錢塘。姑蘇城陷。不能忍決。豈忍更圖富貴。願以一介之軀贖百口之命。乃引佩刀將自刺。行密遽起執其手。因厚禮而歸之。鏐迎勞郊外。把袂以泣。署鎮海軍節度副使。徐綰之叛。從鏐還至北郊。鏐微服將入城。及代乘其車。行與賊鬪。鏐遂得入。綰平。奏授保大軍節度使。遷彰義軍。加開府儀同三司。乾化三年卒。年六十七。卷一萬八千一百三十七第二十二頁

顧全武

全武。越州餘姚人。少時常爲僧。博通外學。機警有才略。鏐每延接與語。甚器之。及入都建國。因辟令從戎。以爲裨將軍。中號曰顧和尚。討賊有功。累遷武勇都知兵馬使。乾寧三年。董昌據越州叛。遣裨將崔溫。李蕙。率兵屯石侯。全武率衆擊破之。臨陣斬溫。蕙。湖州將徐應起。兵以應昌。與淮人圖嘉禾。全武擊破其烏墩。光福二柵。以屯西陵。三年。昌將徐珣。李元賓。據蕭清四封九卿之地。全武自西陵擊破之。珣。元賓皆乞降。盡總其衆。昌又遣裨將湯白。守石城。袁邠。守餘姚。全武自西陵趨石城。與白遇。大戰石城東。斬首千餘級。白僅以身免。去會稽三十里。不敢出援。復攻餘姚。袁邠堅壁自守。昌遣將徐宜。率兵援邠。全武潛師斷其要衝。俟軍半過。橫出擊之。殺二百餘人。擒徐宜。翌日。袁邠以城降。全武進軍圍會稽。昌閱戰五雲門。懸

玉帛以誘我師。全武率勵諸將并力擊之。昌懼退入城中。遷全武諸軍都虞候。東面都知兵馬。使遂攻五雲門。時淮將臺濛陷姑蘇。鏐欲遣全武屯西陵以備北寇。全武曰：「賊之根本繫於越州，豈以失一姑蘇而遂緩大衆耶？」當先拔越州。後復茂苑，未爲晚也。鏐從之。俄而越州陷，執董昌以歸。奏加全武檢校太保。明州刺史四年，與沈夏許再思率師由海路以赴嘉禾。諸將欲緩人，全武曰：「嘉禾圍閉久矣，莫知我之勝負，宜速往慰之。」因倍道而進。城中見我軍旂幟，皆稱萬歲。全武與昌將李宗禮頓全戰於城外，大破之。獲頓全宗禮以歸。餘衆遁去。俘千人以歸。嘉禾平時，吳將田頴守吳興，聞之亦遁去。全武追襲百餘里，斬馘沈溺者千計。遂督衆克復蘇州。吳將臺濛棄城遁去。時淮軍屯崑山，全武擊破之，擒吳將秦裴。光化二年，加贊忠去僞功臣。天復初，淮將李神福攻衣錦城，鏐遣全武率兵禦之。全武素輕神福，領衆夜掩其軍，爲神福所敗。執全武送於淮南。鏐方食，聞之大驚，以七擊案曰：「喪我良將，二年楊行密遣使來求秦裴，因歸全武，鏐大喜，以秦裴報之。是歲徐綰許再思叛，圍外城，鏐懼綰據會稽，將令全武領兵屯越州。」全武曰：「東府不足往，當詣邗溝。」鏐曰：「何也？」全武曰：「綰急，必召田頴來，則淮南興師矣。」鏐乃令全武行成於吳。全武又曰：「獨行必不濟，請擇諸公子與之同往。」鏐乃以元璩聘楊氏與全武俱行。至廣陵，楊行密乃遣使召頴還師。明年全武與元璩同歸。長興初，以疾卒。年六十五。全武寬裕有謀略，善撫士卒，喜怒未嘗形色。每大敵在前，擊鼓動地，分布行陣，頤指口授，怡怡如也。嘗圍淮將秦裴於崑山，裴援絕不降，頗殺傷士卒。全武自爲長檄以諭裴，裴乃封函納款。全武喜，召諸將觀之。旣發函，乃佛書一卷，蓋以全武曾爲僧也。諸將失色。全武大笑曰：「爾不卽死，何暇相諠也。」及裴降，乃爲言於鏐，卒全活之。時人稱其長者。

卷一萬八千一百三十七第二十二頁



黃晟

晟。明州鄞縣人。少驍勇。始應募於望海鎮。鎮中立表。選魁梧者。晟以矮陋不中選。隸都虞候林膺。膺甚倚之。後潛歸鄞。江募衆。據平嘉埭。權知州事。楊僕召補平嘉鋪將。有衆千餘人。初劉漢宏以台州賊。婁文知明州事。僕率兵擊破之。其黨杜宗自寧海鎮率鄉豪據奉化。晟自平嘉以所部兵擊之。擒杜宗。赦而不殺。盡驅使還台州。獲其粟帛。悉屬於本道。遷飲飛都副兵馬使。徙奉化鎮將。餘姚鎮將相喜率衆侵越州。董昌禦之不利。晟領兵追喜殺之。昌奏授晟左散騎常侍。充浙東道東面副指揮使。會明州刺史鍾季文卒。晟遂據其郡。晟好禮。尚文士。江東儒學之流多往之。辟前進士陳鼎。羊紹素以爲賓介。頗加優待。築居於城中。謂之措大營。董昌將僭竊。晟每移書諭之。及鏐舉兵。乃率衆來應。破越州。晟功居多。在任十八年。開平三年卒。時屬郡刺史卒多遺疏請立其子。晟疾亟。獨上疏不請。以子爲嗣。凡府庫所蓄。必題曰送使。鏐頗歎其忠順。

卷一萬八千一百三十七  
第二十三頁

九國志卷六

前蜀高祖以唐大順二年入成都至後主咸康二年國滅父子二世凡三十五年

世家

高祖也明年赴行在僖宗以爲諸衛將軍光啓二年三月再西幸李昌符焚棧道幾斷建控僖宗

馬過煙焰中既至興元命爲璧州刺史大順二年破陳敬瑄入成都爲西川節度使天復七年

共在位十二年於光天元年六月薨梁貞明四年也年七十二諡曰神武聖文孝德明惠皇帝廟號高祖葬永陵

後主名衍字化源初名宗衍建第十一子光天元年六月癸卯嗣位改元乾德至六年改咸康是

年十二月爲後唐魏王繼岌破滅出降時唐同光三年也明年四月己丑被殺於秦州驛年

列傳

王宗裕

王宗壽

王宗鑑

王宗佶

王宗翰

王宗滌

王宗侃

王宗瑤

王宗播

王宗鉢

王宗弼

王宗範

周博雅

晉暉

張造

張勗

李簡

潘在迎

王宗裕

宗裕、建之宗屬。幼從建入爲牙校。善遁甲。絕甘分苦。得將士心。大順二年。與王宗祐克西川。遷青州刺史。建伐梓潼。爲第二指揮使。建親督諸軍力戰。宗裕必冒矢石以掖衛之。東川平。諸將爭功。宗裕口未嘗言戰。謙和。接下人皆服其沈厚。爲東川留守。昭宗下詔加以眞命。武成初。召歸。總成都城內外諸軍事。其導從不避成都尹崔隱。懲其僕。宗裕大怒。入白建。建曰。京尹五大長長。汝有識之士也。不能教戒參從。反令我責大尹耶。宗裕僂俛而出。再爲東川節度副大使。班白者攜幼以迎於道。封通王。永平初。建興師取秦鳳州。再至緜谷。宗裕饋輓貢獻。道路相望。建以其盡瘁。明年乃改東川爲武德軍。以宗裕爲節度使。宗裕既乘旄鉞。遂貪冒財貨。以白金百兩作鋌。鑄記年月。每五鋌爲一束。以生牛革裹之。子諫曰。牛革著物堅韌。後難可開。宗裕叱之曰。何更開也。罷歸。衍慰諭久之。自謂功高。以征伐爲己任。築第蜀城中。頗侵損民舍。有酤者青陽家不徙去。宗裕遣人以巨虺寘其舍中。復投以污穢。酤者將訴於建。宗裕懼而止。又於郊外開廣林莽。壞掘邱墓。立亭榭。鑿池沼。樹花木。攜妓縱酒爲樂。一日方醉。坐軒檻中。見數人衣冠甚偉。謂宗裕曰。與君幽顯異路。何相陵太過。因相顧大笑。宗裕亦笑。遽仆於地。寢疾不數日卒。卷一萬八千一百三十六第一頁

王宗壽

宗壽、建宗人之子。幼從征伐。警悟有機辯。好琴碁。簫什方術。皆臻其妙。建入蜀。奏署懷節軍使。以所部鎮邊江原縣。嘗於許汝間得一鐵鏡。晦不可鑒。屢令工人瑩之。了無所睹。著巾奩中有日矣。至是忽覽之光。

采煥發。因見市舍中一小兒，青衣，卍角獨坐。宗壽異而使人召之。小兒曰：「何以知我至此？」宗壽以言怛之，不懼。因曰：「我與鐵鏡來耳，公不見還，神物終當化去。若以還我，他年當有報也。」宗壽出鏡與之，乃長揖謝去。後宗壽得辟穀行氣之術，或謂小兒傳之。乾寧初，建令率所部兵平南充，遂知果州事。安輯離散，得郡牧之體。武成初，封嘉王。荆南高季昌略地三峽，建以宗壽爲忠州節度使，兼行營招討使。以鐵鑊斷夷陵江。季昌戰艦不能進，宗壽禦之，大敗荆人。季昌奔歸，以功加中書令。宗壽性方正，樂於恬退，自歸成都，以修鍊自娛。與孟繼平許寂、楊珍爲入室清談之友。未幾爲金吾上將軍，持法平正。院吏周郃受贓，繫獄。宗壽捕鞠得其實，郃以重貨求救於大閹，爲解。宗壽不聽，竟弃郃市。建討鳳翔，以宗壽爲第三招討使，取陳倉還，衍襲位。宗壽請老，久之，衍耽酒色，時宣華苑初成，數爲長夜飲。宗壽在坐，諫，衍請以社稷爲念，少近盃酌，因感激流涕。佞臣潘在迎、顧在珣、韓昭等奏曰：「嘉王酒悲無怪也，乃大爲諧謔而罷。」後起爲武信軍節度使，破雞子槽賊，擒其魁李茂章，請納賂以求免。宗壽曰：「吾歷官四十年，未嘗受同僚之遺，況爾賊乎？」遽命斬之。唐師入境，郭崇韜遣使遺宗壽書，宗壽不納。聞衍降，乃治裝赴闕。時衍先次岐陽，宗壽請於李嚴，求謁衍，衍見之，泣下曰：「早從王言，豈至今日？」及衍遇害，奔入熊耳山，依定林寺。明宗卽位，詣闕自陳，賜與甚厚，授保義軍節度使，行軍司馬。上表請葬衍，許之。初，衍至秦川驛，母妻及子弟遇害者十八人，並藁葬道左。至是，宗壽盡易棺斂，縞素徒步，親自營護，皆葬於三趙村。聞者義之。明年授淄州刺史卒。

卷一萬八千三百

百三十六  
第二頁

王宗鑑

宗鑑建從子也。以偏裨從征。建入閩州。署都知兵馬使。從征東川有功。遷廣都鎮遏使。天復中。僖宗反正。建令宗鑑以所部兵奔問行在。授北路第二班馬步軍排陣使。建親征山南。以宗鑑爲御營使。師還留屯平利。時岐將劉知俊等統領大軍分路來攻。由階成路奪固鎮糧。宗侃唐襲等禦之。至青泥嶺。爲知俊所敗。退保西縣。會大雨。漢江漲。宗鑑自羅村得鄉導。緣山而行數百里。與宗播遇於鐵谷。合軍出湯頭。時知俊自斜谷山南直抵興州。圍西縣。軍人散掠巴中。宗鑑與宗播襲之。會建亦至。遂解西縣之圍。以功遷山南節度使。同平章事。從征秦鳳。遷中書令。衍襲位。加太保。乾德六年卒。卷一萬八千一百三十五第一頁

王宗佶

宗佶。豫章人。本姓甘氏。幼穎利。建討徐堂。舉於江西。獲之。憐其慧黠。是時諸子未生。遂收爲養子。每給事帳下。後從建入閩中。隨諸將征討有功。補貔虎都指揮使。遷嘉州刺史。乾寧中建克緜州。以宗佶爲兵馬留後。尋加檢校太傅。知節度事。未幾移鎮梓州。昭宗幸鳳翔。建遣宗佶與宗滌等率步騎迎駕。至山南。降節度使王萬宏。以功加檢校太尉。武成初。進爵爲公。拜開府。守中書令。宗佶恃其位隆地長。頗專征伐。而諸將皆避之。多樹朋黨。策勳錄舊。高下在心。附順者超擢。違戾者擠之散地。及宗懿等兄弟成長。內不自安。遂與御史中丞鄭騫判官李鋼謀。求爲方鎮。欲爲亂。建知之。因進封晉國公。罷其機務。宗佶憤怨。陰養死士。出入臥內。將圖不軌。鄭騫等又教宗佶求爲大司馬。盡總六軍。并乞爲儲貳。表連上。而辭甚不遜。建未之罪也。忽一日請對。言詞甚悖。建勉諭令出。終不肯。因叱衛士撲殺之。騫鋼並賜死。卷一萬八千一百三十六第八頁

王宗翰

宗翰建之姊子也。本姓孟氏。建爲神策軍使。僖宗封其姊爲晉國夫人。宗翰最被親愛。建入蜀。以宗翰爲拱辰軍使。累遷眉彭二州刺史。封集王。賜姓王氏。授文成等州招討制置使。宗翰好蓄妓妾。後庭珠翠常百餘人。性殘虐。吝嗇。刺彭州日。部民史氏有胡讓莊。號爲沃饒。宗翰殺史氏而取之。元膺之亂。以兵入衛。建令安撫。元膺倉卒而死。建疑宗翰殺之。竟無以自辯。通正初。授通義軍節度使。同平章事。守興元尹。以杜堯嗣爲之佐。令規正焉。宗翰於泉倉置寨於捍龍山。與上清寨相接。分鄉兵屯守。建略地秦隴。以宗翰爲第一招討使。拔大散關。取陳倉。耀兵三壘而還。宗翰所爲不法。堯嗣多諫止之。及爲招討使。請堯嗣同行。至大散關。堯嗣腹疾。請歸府。乃自木皮店沿流而去。宗翰令以膠船載之。中流而溺。天漢元年。宗翰被病。若見堯嗣。旣而堂宇藩溷。隨其大小。皆堯嗣在焉。疾遂亟。數日卒。卷一萬八千一百三十六第二頁

### 王宗滌

宗滌。潁川人。本姓華。名洪。建將入蜀。寡勇敢之士。以宗滌爲廩將。宗滌膂力驍果。輕財好施。爲士卒所推。得隸神策軍爲小校。建入成都。以宗滌領前鋒兵。奪星宿寨。進攻七里亭。以功奏授威信都指揮使。邠州王行瑜與鳳翔李茂貞攻楊守亮於山南。鳳州節度使滿存禦之。爲茂貞等所敗。存與守亮退保山南。茂貞逼之。因同奔閬中。建令宗滌率兵禦之。破存等衆。斬其將梁承裕。俘數千人。景福元年。授邛州刺史。爲都指揮使。攻九隴。守亮遣將符昭率兵解九隴之圍。直趨成都。營三學山。建亟召宗滌歸。夜至古城。去昭營數里。乃多設更鼓。遲明。益張旂幟。徧諸山谷。昭疑蜀師不敢出戰。宗滌命發機石。擊昭營中。聲震山谷。昭恐懼。乃夜遁去。宗滌反攻九隴。拔之。後從建攻梓州。宗滌以衆五萬先趨東川。與岐將李繼徽遇於元

武宗滌擊敗之。以功賜名。五十三指揮之首。梓州陷。斬顧彥暉。降其兵七萬餘衆。遂以宗滌爲東川留守。光化初。奏授東川知節度副大使事。二年歸覲。遂以疾乞解職。建不許。昭宗反正。梁祖與崔允叶通。盡誅中官。更相引兵。輦穀之下。咫尺不通。昭宗密遣中官仇承坦諭旨於建。建遣宗滌與宗佶宗播率步騎迎駕。至山南。遂王萬宏。據其城。授山南節度。宗佶等以其功高。搆以飛語。建疑之。因至詰讓。將加之罪。宗滌對曰。天下寇盜平矣。是大王聽邪說。誅功臣之秋也。建曰。昨在大謾天寨中。已有不軌之言矣。我念汝之勤。尙爲隱忍。今又狂率如此。豈憲章之所容也。宗滌不顧而起。建因令人監歸本營。明日盡削官爵。流於松州。旣行。縊之於城外。營中將士聞之。皆相對掩泣。初建開國造端門新樓。名曰紅樓。采繪旣畢。都人士女競往觀之。曰。看畫紅樓。建以宗滌得軍情。復有是讖。故誅之。人稱其冤。卷一萬八千一百三十六第五頁

王宗侃

宗侃。許昌人。本姓田。名師。世爲鄉豪。隸名忠武軍籍。建爲部將。奏署宗侃決雲都兵馬使。光啓中。田令孜逼僖宗西幸。道出陳倉。建率宗侃同扈蹕。又從建起闔中。賜姓名。討陳敬瑄。敬瑄遣漢州刺史張頊。領萬餘人來迎戰。宗侃擊破之。敗句惟立於學射山。韋昭度來鎮西川。敬瑄遣將山行章將兵六萬拒戰。宗侃破之於浣寨。緜州刺史常厚奪留東川。顧彥暉旌節。建令宗侃討之。破其七寨。厚奔緜谷。奏授宗侃雅州刺史。遷眉州團練使。未幾授武信軍節度使。建開國。以宗侃有佐命功。進侍中。城內外都指揮使。尋加中書令。充北路行營都統。岐將李彥琛寇漢川。宗侃保安遠城。與宗鑑等三將同破岐軍。斬彥琛。衍襲位。封侃爲魏王。卒年六十六。子承肇入洛。爲行軍司馬。卷一萬八千一百三十六第六頁

王宗瑤

宗瑤字寶臣。燕人也。本姓姜。名邛。以騎射隸許昌軍籍中。建擢爲隊長。建迎駕山南。宗瑤以勇伉得隸左神策軍。能馬上盤槊。長丈八尺。每臨陣。馳突人望而畏之。遷威猛副兵馬使。建入闈州。爲先鋒。十九都都頭。左威猛都知兵馬使。賜姓王氏。更今名。軍至緜竹。誘諸蠻酋帥蹇諫等。得其兵數千人。破常厚。授蜀州刺史。昭宗幸蜀石門。詔建赴難。以宗瑤爲北路行營都指揮使。奏授嘉州刺史。天復中。授武信軍節度使。建開國。加太子少傅。後封臨淄郡王。建病亟。以宗瑤爲金吾使。參預顧命。衍襲位。授太傅。嘗自作高冢。遇暇則酣酒高歌於其中。無疾忽一旦默坐而卒。年六十七。人以爲知死。卷一萬八千一百三十六第六頁

王宗播

宗播字昌遠。上蔡汝陽人。本姓許。名存。少有膽勇。秦宗權據上蔡。召募豪傑。以宗播爲裨校。宗權爲梁祖所破。部下皆逃散。宗播亡抵荊州。聞郭禹在歸州。頗完聚。得士卒心。遂往依焉。禹知其材。令統青州元從兵三萬人。時襄州兵圍逼荊州。靜江遊奕將牟權領衆屯清江源。據大山列寨。諸營危窘。宗播言於禹。請討權。於是伏兵清江岸中。遣列校蔡行能捨舟直抵山下。權素輕行能。警軍來戰。行能遁歸舟中。權盡銳逐之。宗播發伏兵掩其後。擒牟權。收其軍實。以歸於禹。禹大喜。俄而荆帥張瓌求救於禹。命宗播率岐州兵解其圍。禹度瓌懦弱。因據其城。秦宗權上蔡別將常厚以數千人由均房來攻夔州。刺史毛湘棄城遁去。保白帝。厚圍之。禹與宗播以十擢子兵塞於南山。以攻厚。厚令夔校韓楚言罵禹。禹不勝其辱。宗播請以壯士五十人夜斫其營。上赤甲山。揭巨石投厚寨中。厚恐懼。與百人遁去。遂破其寨。復取夔州。毛湘奔



成都禹令捕韓楚言。已爲其妻所殺矣。先是楚言妻李氏語其夫曰。君嘗爲常司空。罵郭尙書。今寨柵危急。鋸解之苦。旦夕至矣。不如早爲之所。楚言不忍曰。且看事勢。李度楚言終不引決。乃以刃自後斷其首。并殺二男一女。曰無爲他人所魚肉也。遂自刎死。禹聞之大驚駭。爲給棺殮。刻石以旌之。留行軍劉昌美守夔州。與宗播沂江而上。郡縣望風而潰。號宗播爲許掃土。禹至萬州。賞功以宗播爲萬州刺史。宗播不得志。居歲餘。禹遣人偵之。見宗播不治州務。但出蹴鞠。乃曰。萬州必背我。勻脚力耳。遣卒三百襲之。宗播踰垣夜遁。遲明其衆稍至。遂保豐都。禹攻之。宗播奔成都。建得之甚喜。命以所部屯蜀州。賜姓名。奏授縣州刺史。建討王萬宏。以宗播爲前鋒。破金牛黑水西縣褒城四寨。乘勝傅其城。萬宏降。以功奏授漢州刺史。加檢校太保。建卽位。改金吾衛上將軍。領彭州團練使。岐將劉知俊圍西縣。宗播爲四面招討。馬步使夾廉讓水置連珠寨。首尾相應。以勁卒二百出五動磴擊之。岐軍大敗。遷武信軍節度使。又敗諸蠻於潘倉。加兼中書令。爲三招討。攻隴州。降李繼岌。封臨穎郡王。被病歸。建至其第。執手曰。北面開拓。公之力也。衍襲位。授太子少傅。乾德五年卒。年六十八。

卷一萬八千一百三十六第六頁

### 王宗鉢

宗鉢。許昌人。本姓李。名武。父裕爲忠武軍小校。鉢少無賴。善騎射。建募義兵。迎駕。得宗鉢。以隸帳下。至岐山。屢有戰功。署爲隊長。尋遷爲裨將。以勇過人。號爲武子路。建入蜀。賜姓名。常寘左右。遇敵必自挑戰。挾人奪馬而還。遂爲軍中所推。建攻成都。一日城內出數騎直抵七里橋。宗鉢因躍馬奪關子門。蜀將宗行能策馬援槊而至。將及宗鉢。佯墜馬。奪槊以刺。行能徑走入城。宗鉢逐之。至門而還。建慰勞久之。撫背曰。

吾得成都當宥汝十死。洎建開國授普州刺史。性輕率好貨。恃勇不法。未周歲以訟免官歸成都。

卷一 萬一千

百三十六  
第七頁

### 王宗弼

宗弼許州人。本姓魏。名宏夫。以家籍隸忠武軍。建討王仙芝。尚君長。皆在帳下。建取闔中。補義勇都十將。賜姓名。及入成都。改左驍騎都知兵馬使。累遷嘉眉二州刺史。建征果州。宗弼掠地於飛鳥。爲顧彥暉所獲。彥暉責之曰。王公見討。而君爲大將。不能諫止。何敢來見。宗弼曰。罪固當死。但念平昔與相公有素。故敢來也。彥暉笑而釋之。先是岐將常厚攻梓州。彥暉乞援於建。建遣宗弼等援之。臨行。建謂宗弼曰。汝等破賊。彥暉必犒汝。汝當報宴。俟彥暉至營中。則擒之俱來。庶免後舉也。宗弼如其約。及將報宴。而宗弼告之。彥暉遂以疾辭。故宗弼以爲言。於是厚待宗弼。以爲養子。及彥暉兵敗。建圍之益急。彥暉弟彥瑤有武勇。知其城必陷。請彥暉聚族沈飲。自裁。無爲它人之所魚肉。一日城陷。彥瑤仗劍入室。宗弼與諸子尙在。彥暉顧宗弼曰。爾非我子。可自求生也。因壞垣而出。彥瑤遂刃彥暉與諸子而自刎。建入梓州。宗弼束身自歸。建待之如故。逾年復令將上軍。再授嘉州刺史。封鉅鹿郡王。天貞軍節度使。衍襲位。拜宮城內外都指揮使。判六軍事。封齊王。衍將往秦州。宗弼曰。唐兵壓境。秦州何可去耶。又上表切諫。衍怒擲之於地。衍次利州。唐師已入散關。陷鳳州。衍遂遣三招討屯三泉。以拒唐師。未戰。三招討俱遁走。因令宗弼守縣谷。而誅三招討。宗弼遂與三招討同送款於魏王。乃還成都。斬宋光嗣等。函首送於魏王。遷衍及母妻於西宮。貴戚納金寶。進妓妾。救死於宗弼者不可勝計。微有絀誤者。咸遭戮焉。盡輦內藏之寶貨歸於其家。魏

王遣使徵犒軍錢數千萬。宗弼輒斬之。魏王甚怒。及王師至。令其子承班齎衍玩用直百萬。獻於魏王。并賂郭崇韜。請以己爲西川節度使。魏王曰：「此我家之物也。焉用獻來？」魏王入城。翌日數其不忠之罪。并其子斬之於毬場。軍士取其尸。櫛而食之。先是蜀有謠言曰：「我有一點藥。其名爲阿魏。賣與十八子。至是宗弼背國歸唐。果其驗也。」卷一萬八千一百三十六第七頁

王宗範

宗範。本姓張氏。幼喪父。隨母周氏再適建爲九夫人。宗範年十歲。冒姓王氏。及建開國。立周氏爲后。宗範沈厚寡言。好延納名士。親從軍。晉暉以女妻之。封夔王。加太子少師。永平四年。黎州蠻入寇。以宗範爲第一招討史。宗播宗壽副之。乃以所賜金募果敢士。出邛峽關。至潘倉。大破蠻衆。斬其首領趙嵯政。追奔至山口城。與宗壽合。殺八千餘人。擒蠻王子趙龍眉等三人以歸。加中書令。後隨衍入洛。至長安。張錢爲節度。留後。宗範以珍玩賂錢。請復姓爲猶子。易名師範。後唐天成初。王宗壽改葬衍。師範來弔贈。宗壽不與齒。後爲雍州行軍司馬而卒。卷一萬八千一百三十六第一頁

周博雅

博雅。潁川人。唐光啓中爲龍州司倉參軍。考滿將歸闕。以川路梗澁。乃寓止縣谷。建至。博雅袖策謁建於軍門。建素聞其名。一見忻然。接待甚厚。置之賓席。博因說建曰：「唐祚將終。有土疆者恣爲吞噬。以強併弱。然以僕觀之。皆非濟世之具也。明公御衆有術。臨事能斷。僕昨在龍州。已爲明公籌之矣。自主上蒙塵。明公親鞅乘龍。匍匐棧道。懷國璽以從。周旋患難險阻之中。勤亦至矣。及論功受賞。不過刺史。今端守一隅。」

坐待窮迫。非君子豹變之象也。且葭萌四會五達之郊。非久安之地。若不薄人人。將薄我。不如果闔地。與民豪。楊行遷爲陳田之肘腋。控扼要害。不修職貢。以明公臨之。可一鼓而擒也。得其地。以廣形勝。得其士。以增卒伍。此策之上。不可失也。建然之。遂取閬中之地。乃奏署博雅爲判官。建赴成都。爲陳敬瑄所拒。退無所保。建甚危之。博雅曰。兵家勝負無常。古者出師。自非晉重耳之賢。豈有一戰而霸者。今邛南城壁完。粟支數歲。取之可以斷蜀右臂。願明公留意。建曰。吾少在戎行。備知民意。若無受鉞之將。必謂自圖其利。今欲請朝廷。命將出征。吾當助成其事。博雅曰。善。乃令博雅作奏牘。朝廷嘉之。下詔褒獎。乃授韋昭度。西川節鉞。令與建同討敬瑄。割邛蜀黎雅四川爲永平軍節度使。建壁靈池。與王師戮力。逾年。會糧運不繼。建欲請韋公班師。因謂博雅曰。韋公歸闕。我當以兵塞劍門。朝廷謂我何。博雅曰。今皇綱不振。彊臣掣肘。朝廷命令不出。閩壺。明公當折節爲軍民計。豈得顧此也。於是建乃請韋公歸闕。而上表自陳。急攻成都。克之。奏授博雅觀察判官。後出知渝州。未幾。詔加節度判官。遷嘉州刺史。建開國。召拜成都尹。遷御史中丞。俄拜中書侍郎。平章事。建薨。葬永陵。博雅議山陵事。俄請老。遷左僕射。出爲永平軍節度使。雲南安撫使。依舊平章事。卒。年六十六。博雅本名詳。犯孟知祥名。蜀史追改之。卷一萬八千一百三十六第三頁

### 晉暉

暉。許州人。父和。爲忠武軍列校。暉少有膽氣。杜審權鎮許昌。以暉爲頭營十將。從鹿宴宏迎駕。至山南。宴宏遲留不行。暉素與建相善。謂建曰。鑿駕將回。宴宏觀望不進。而姑息吾輩。甘言見誘。苟不自圖去就。禍且及矣。不如以所部兵爲勤王之舉。不爾爲宴宏所累。且宮車反正。以吾等爲賊黨。何面目行於天下。建

然之。遂俱行。迎至三泉。僖宗嘉之。名其軍曰忠義。以暉爲指揮使。隸右神策軍。及再幸褒斜。復統南營兵。與建同爲先鋒。天子居梁。暉統四部兵。屯黑水。修營棧道。往來無阻。朝廷慮其彊盛。因罷拱衛。授集州刺史。以散其朋聚。一歲之中。凡歷數郡。蓋欲窘之也。建圍梓州。遂往會焉。建以暉爲壕寨使。建開國授武泰軍節度使。同平章事。黔中郡縣多屬涪陵。比部員外郎陳凝爲涪州守。以暉制銜中。不帶涪州刺史。遂不納牌印。暉上疏歸之。凝責授瀘州司戶。暉招來逋竄。剷除蠹弊。州民愛之。罷上表請老。日夕與親友宴。談噓爲娛。嘗自言曰。吾生罹多難。學執干戈者。爲求飽煖耳。今至此矣。復有何望。我嘗拔王宗魯於行陳。今致位將相。女復爲王妃矣。分封宏農郡王。卒年七十九。卷一萬八千一百三十六第四頁

張造

造。長社人。父公素。齊州長史。造幼好兵家之學。年二十應募。隸忠武軍。從鹿宴宏出征。及宴宏據褒中。心無回志。因與建謀曰。吾輩遠離鄉土。保聚無名。今大駕將回。主帥反側。或隨其逃遁。則皆賊也。不如率衆拱衛。以取美名。建納之。遣使上表。僖宗驛召旌賞。遂參翊衛。隸神策軍。及再幸褒中。以扈從功。授萬州刺史。道阻不能去。會建起兵。閬中以造爲行軍司馬。廣漢糧盡。建慮軍情有變。謀各據一郡以自固。造首倡大義。慰諭將士。衆皆感悅。龍紀初。詔授行營諸軍馬步都虞候。遷茂州刺史。從討陳田。引軍攻笮橋。爲陳敬瑄所敗。歿於陣。年四十五。建以其死事聞。詔贈司徒。子彥昭爲威德都知兵馬使。從建收巴西。破葛佐。授劍州刺史。建圍梓州。彥昭攻堅力戰。歿於陣。建痛惜。撫其尸以泣。曰。父死於前。子繼於後。忠勇之節。出

卿一門矣。卷一萬八千一百一十第百頁

張劼

劼長葛人善推步之學少隸忠武軍籍從討王仙芝以勇敢稱建以所部迎駕署劼義勇都判官復隸神策軍乃總占候之要著太一元精秘訣詔七十一首以獻僖宗奇之詔與建同列從建起闔中破德陽寨斬王彥儔時建屢爲山行章所困劼每臨陣拔槊蒙輪殺十餘人敵爲之稍却奏署定信軍都知兵馬使大順中與王宗保同破浣花寨建將入成都城中多亡命不逞之徒建恐其搆亂乃令劼爲諸都斬斫使兼左右廂都虞候以誘掖鎮撫之劼旣入城索無賴者得百餘人悉鞭其胷死者相藉中外帖然不敢偶語建卽位歷眉邛二州刺史卒

卷一萬八千一百三十六第四頁

李簡

簡許州長葛人少以驍勇隸忠武軍從鹿宴宏出征有功遷爲列校建起闔中簡爲義勇都副兵馬使大順二年陳田遣將屯西浦簡以所部擊破之武定節度使楊守忠與常厚舉兵援陳田建令簡逆擊之相遇於鍾陽簡謂諸校曰賊遠來多疲及其未成列擊之遂整陣鳴鼓而進連破其七寨斬首千餘級擒其將楊知宥楊行立等獲其軍資甲兵不可勝計建攻毛湘於邛州以簡爲前鋒晉原守任從誨領步騎二萬銜枚奄至解邛州之圍簡曰賊輕而驕正可用奇不勞與戰乃分步騎三千爲兩翼潛河村俟其半過夾擊之從誨敗俘甲馬數千俄而邛州軍使任可知斬湘以降建令簡入城慰撫景福中彭州部將李蕘率兵焚繁雒以援常厚建令簡逆擊之臨陣斬蕘遂進攻其城連拔七寨常遁走建獻捷於朝以簡爲邛州刺史卒於治所

卷一萬八千一百三十五第五頁

潘在迎

在迎字亞卿。前蜀樞密使炕之子。身長六尺。精神警悟。少任俠。不修細行。交結屠狗。天復中起家節度押衙。王建開國。以爲扈蹕軍使。檢校司徒。守羽林大將軍。內皇城使。唐辰構難。謀害宿將。委在迎以腹心。黜者既行。多以後命誅。在迎妻徐氏。后兄女。爲營護之。獲免。衍荒於酒色。在迎與韓昭輩多預宴宮中。自昏達旦。王宗壽泣諫。衍在迎等給以酒悲。自是大臣結舌無敢言者。王宗壽鎮果州。以在迎爲都指揮使。知州事。渠江賊杜處齊招納亡命。據巴王城。在迎討平之。以功授果州團練使。魏王繼岌平蜀。補爲右職。知祥鎮成都。復令典兵。未幾出爲蜀州刺史。董璋遣使并輶於郡中。置邸回易。在迎給事。蓋仁達盜官麥。以逃誣告在迎。因并輶密餽金於董璋。知祥命執仁達送於蜀州。在迎斬之。尋命在迎以州兵安撫後田。乃服藥下痢。以疾告召歸。知祥親臨問焉。遂請致仕。從之。嘗謂人曰。我於前蜀有誅唐辰安社稷功。當合秉旄鉞。今逮事霸主。親觀虎變。求一鎮不得命矣。夫明德末。卒於成都。年五十六。在迎辯而多詐。以財發跡。至於權門要地。悉啗以厚利。曰未必盡仗之。但不欲其冷語爾。

卷一萬八千一百  
三十七第□頁

九國志卷七

後蜀 高祖 自後唐司光三年入蜀至後主廣政二十八年國滅父子二世凡四十一年

世家

高祖 姓孟名知祥字保膺邢州龍岡人晉王弟克讓壻也莊宗建號為太原尹同光三年破董璋以爲成都尹充劍南四川節度副大使明年莊宗遇弒明宗立加封太原公長興三年破董璋以兼有兩川爲蜀王明年建國改元明德是年七月甲子薨年六十一諡文武聖德英烈明孝皇帝廟號高祖葬和陵  
後主 名昶字保元初名仁贊知祥第三子明德元年七月丁卯嗣位不改元仍稱明德元年四年改廣政至二十八年宋將王全斌軍至城下出降五月至汴京改封秦國公越七日薨時宋乾德三年六月也年四十七追封楚王葬洛陽

列傳

- |     |     |     |     |     |
|-----|-----|-----|-----|-----|
| 趙季良 | 趙庭隱 | 趙崇韜 | 張業  | 武漳  |
| 李肇  | 李仁罕 | 李延厚 | 張公鐸 | 張虔釗 |
| 潘仁嗣 | 龐福誠 | 李彥琦 | 孫欽  | 何重建 |
| 孫漢韶 | 高彥儂 | 李廷珪 | 王彥銖 | 李奉虔 |
| 王昭遠 | 安思謙 | 焦彥賓 | 趙進  | 石處溫 |
| 孟思恭 | 申貴  |     |     |     |



趙季良

季良字德彰濟陰人父詹唐穀熟令季良幼涉書史長於吏治尤善騎射王檀聞其名辟爲保義軍節度推官楊師厚鎮鄴署元氏令徙魏州都督府司錄參軍後唐莊宗入鄴召見與語以季良有文武才略卽授大理評事依舊司錄參軍充義勝都指揮使軍中謀議多以諮之時兵革屢興屬邑租賦逋久一日莊宗召至切責之季良對曰殿下何時當平河南莊宗正色曰爾掌輿賦而稽緩安問我勝負乎季良曰殿下方謀攻守復務急徵一旦衆心有變恐河南非殿下所有莊宗斂容前席曰微君之言我幾失大計自是益加禮遇遷興唐府少尹司錄參軍如故嘗夢手扶御座自謂輔佐之象繇是頗述天時人事以諷莊宗深納其言及卽位授光祿少卿兼洛南水陸營田都制置使明宗卽位遷太僕卿會宰相任圜兼鹽鐵事薦季良爲判官明年授檢校戶部尙書爲西川官告使兼三川都轉運制置使知祥素重其名一見遂悅奏留爲節度副使累表不許會李嚴來爲監軍知祥深懷疑慮乃誅嚴而署季良爲副使天成三年明宗下詔徙季良爲果州團練使知祥匿其詔書密上表留之明宗不能奪遂允其請自是傾心接待情好款洽或入謁稍晚知祥必顧左右曰副使來何遲也及至則讌語竟日每有謀議無不見從時期廷以夏魯奇李仁矩分鎮遂闕季良言於知祥曰朝廷增兵二鎮張犄角之勢將有不測之變也公處親賢之地以忠信見疑儻失先機則禍不旋踵矣知祥曰計將安出季良曰我甲兵雖衆然而勢孤易動請與東川董璋合從先平遂闕則朝廷兵至我無內顧之憂矣知祥從之及王師入劍門而遂闕已平果無功而還及捷書至知祥匿之謂季良曰北軍漸邇奈何季良徐曰北軍至緜州已來必遁知祥問其故對曰縣師

千里饋運不繼。彼勞我逸。不走何待。知祥大笑。以捷書示之。及克黔夔二州。以季良爲武泰軍節度使。董璋率衆入廣漢。知祥領兵拒之。季良留守成都。制置經度軍用無闕。先是季良嘗與知祥從容語。及璋植性狼戾。下多怨憤。若堅守一城。攻之難克矣。及聞璋起兵。知祥憂形於色。季良曰。璋不守巢穴。自來送死。此天以璋授公也。俄而璋果敗。加檢校太保。明宗崩。知祥建號。加特進守司空平章事。宏文館大學士。判三司。昶襲位。加守司徒。領山南節度使。行興元尹。廣政九年卒。年六十四。諡文肅。季良性寬厚。居常無喜慍之色。母早亡。事從母如所生。季札季友皆從弟也。並眞位清顯。所上遺表。言不及私。蜀人誌之。卷一萬八千一百三十六頁

### 趙庭隱

庭隱。開封人。世爲卿家。庭隱少知兵律。尙氣義。始事梁祖子友亮。因擊鞠墜馬死。庭隱董璋等十數人。皆追赴汴州。知其無過。竟釋不問。令給事左右。末帝卽位。唐莊宗入鄴。兩河對壘。十有餘年。時庭隱爲邢州都監。累立戰功。節度使劉重霸嫉之。誣庭隱將所部兵降於莊宗。因械送汴州。末帝知其非罪。又重違邊臣之請。乃貶庭隱於南陽。未幾。追復舊職。王彥章守中都。庭隱在其軍中。及彥章敗。庭隱爲莊宗所獲。將以就戮。大將夏魯奇奏曰。此婢也。其材可用。遂釋之。魏王繼岌討西川。以庭隱爲先鋒。監押。自入敵境。卽禁兵士燒廬舍。剽財物。蜀人德之。魏王平成都。錄其功。奏授左廂馬步軍都指揮使。知祥至蜀。康延孝陷漢州。遣庭隱率兵擊破之。擒延孝檻送闕下。知祥奏加檢校司空。漢州刺史。因留屯成都。長興初。明宗將議伐蜀。乃以夏魯奇李仁矩分鎮。遂闔以分其勢。知祥令庭隱與李仁罕張業率步騎十萬。經略遂闔。魯

奇堅壁不出戰。會唐師入劍門。知祥急召庭隱。令統銳兵五千至東川。與董璋合軍以拒之。至中路大寒。士卒不能前。庭隱撫諭勞問。將卒皆奮。遂營於普安。深溝固柵以養銳。一日唐師奄至。又分兵斷三彌。父水及土橋。庭隱密遣軍中善射者五百人。伏唐師之歸路。乃領軍出營久而不戰。至暮唐師退。庭隱縱兵追之。伏卒齊起。表裏合擊。唐師大敗。初唐師之入劍門也。內有堅壁。外有勍敵。遠近駭震。及庭隱之捷。人心乃安。知祥遣使慰勞。賜書以褒之。明年別將平魯奇。唐師至葭萌而還。庭隱班師。知祥親勞於郊。翌日至其第。錫賚甚厚。卽授昭武軍節度使。留後以鎮。退葭萌。知祥送於北郊。親舉觴以勸之。在鎮踰月上言三泉餘寇盡去。乞假一旅之師。以拓漢中及秦鳳之地。知祥答書慰勉。且令休息。董璋襲廣漢。將攻成都。時東川廩藏充實。部下多敢死之士。其來也衆。皆畏之。知祥親督諸將。召庭隱爲副。以率勵士旅。璋遺書庭隱。而詐達於知祥。以書授庭隱。投書褚中曰。彼必反間之辭。不足觀也。竢擒董璋而後閱之。與璋戰。雞蹤橋前。頗爲所挫。庭隱僞遁。璋逐之。知祥與公鐸領兵繼進。璋軍亂不成列。庭隱復整陣。與知祥公鐸合擊之。璋軍大敗。斬首數千級。璋領數騎遁歸東川。爲部下所殺。庭隱追至東川。頓兵城下。以待知祥。梓州平。以庭隱爲節度使。會李仁罕自遂州至。求領東川。庭隱將讓之。知祥以庭隱功多。且怒仁罕之貪。悞遂自領兩川節度使。以庭隱爲保寧軍節度使。以閬果蓬渠開五州隸之。昶襲位。李仁罕求總六軍。將圖非望。以庭隱爲六軍副使。以制之。未幾。仁罕誅。改衛聖諸軍指揮使。明年移鎮東川。廣政初。加中書令。庭隱久居大鎮。積金帛鉅萬。窮極奢侈。不爲制限。營構臺榭。役徒日數千計。十年被病。懇讓兵柄。疏再上。從之。仍就第册爲宋王。經歲不能起。賜肩輿入朝。旣謁見。昶感動涕泣。賜金沃盥及繪錦。加太師。卒年六十六。

子崇祚崇韜卷一萬八千一百三十六第十頁

趙崇韜

崇韜少驍勇有父風累從征討有功署副兵馬使及庭隱卒昶以崇韜領衛聖諸軍使以襲父任廣政二年周師復至境上昶以崇韜與控鶴指揮使袁可鈞同爲北面招討崇韜率勵將士行陣整肅士卒有黥其額爲斧形者號曰破柴周師前鋒屢爲崇韜所敗至歸安而退二十七年王師來伐崇韜與李廷珪等率兵拒之遇王師於漢源崇韜策馬先登我師大敗崇韜力戰不止兵器皆斷折猶手擊殺數人爲王師所擒卷一萬八千一百三十六第十頁

張業

業開封浚儀人性沈厚有果斷事梁爲東頭供奉官時兩河兵革未息業頻領監護之任皆立戰功法令峻整士卒畏之莊宗入洛聞業有幹略擢爲列校繼岌伐蜀以業監先鋒兵補右廂馬步軍都指揮使蜀平以所部兵駐成都知祥入蜀奏授檢校司空簡州刺史時蜀漢賊盜羣起燒劫鎮戍百姓驚擾知祥遣業率兵捕之業令五家爲小保五十家爲大保旬日之內擒獲殆盡討夏魯奇於遂州以功授寧江軍節度使兵馬留後董璋襲成都業在夔州聞之率所部赴難東川平正授節鉞加檢校太傅明德初領右匡聖步軍都指揮使會武定興元兩鎮來附令業將兵二萬屯漢水業至褒梁分布寨柵控扼略谷秦鳳諸隘會武定軍衙將與蒲谷鎮將任漢謙同謀導晉師入武定業遣戍卒擊走之昶襲位改武信軍節度使同平章事是歲昶殺判六軍事李仁罕業仁罕之甥也昶慮其爲變詔歸本道未幾召入依舊同平章事

兼判度支。新收征稅。多爲主吏乾沒。業作盜稅法。犯者十倍征之。吏民不堪其命。業多視事私第。中宰相之門。被桎梏者常滿。昶知之。遽除十倍之法。業子繼昭好擊劍。嘗與淨衆寺僧歸信同訪劍術。士右匡聖指揮使孫漢韶與業不協。告業與繼昭同謀不軌。翌日令壯士就都堂擊殺之。年五十七。卷一萬八千一百三十六第十一

頁一

### 武漳

漳字巨川。太原文水人。父玉。汾州別駕。漳少勇敢。善騎射。事莊宗爲定塞都虞候。莊宗以全軍援澤潞。與裨將數攻其別寨。斬首千餘級。擢太原衙前兵馬使。改匡聖軍指揮使。同光初。從魏王繼岌入蜀。因留成都。知祥鎮蜀。補衙內右第二指揮使。天成初。漳與張公鐸迎瓊華公主於北都。中國兵革之後。盜賊充斥。漳被堅執銳。通夕不寐。至蜀改左第二指揮使。奏授檢校僕射。其後東討果闡。北拓劍利。漳屢有功。授緜州刺史。知祥開國。改邛州。遷山南節度使。漳以褒中用武之地。營田爲急務。乃鑿大洫以導泉源。溉田數千頃。人受其利。入爲奉饗。肅衛指揮使。未幾改山南。加同平章事。廣政七年卒。於治所年六十四。漳質厚儉約。所至有治迹。俸入之外。不營貲產。蜀人稱之。卷一萬八千一百三十六第十一頁

### 李肇

肇汝陰人。父璟。唐神策兵馬使。肇少以材勇從父征伐。後隸宣武軍。補左建牙都頭。累遷陝虢馬步軍都指揮使。莊宗平梁。恢復河洛。割宣武一軍隸於河東。時知祥爲北京留守。待之甚厚。同光中。以所部兵從魏王繼岌討蜀。蜀平。班師。康延孝至普安叛。擁衆回據廣漢。肇在其伍中。延孝敗。肇被俘。而知祥親釋其

縛擢爲衙內都指揮使。未幾，奏授嘉州刺史。長興初，我師圍夏魯奇於遂州。唐師來援，劍門不守。肇領兵赴普安，以拒唐師，不得進。以功改漢州刺史，駐軍縣谷。明年，董璋率兵攻成都，軍勢甚盛，遣使致書於肇，諭以禍福。肇素不知書，擲之於地，曰：「此不過勸我叛爾。」因并其使殺之。梓州平，加昭武軍節度使。昶襲位，肇以足疾，不卽時來朝。昶怒，罷其軍權，授太子少師致仕。於邛州安置，坎壤不得意。廣政八年卒。年七十。

卷一萬八千一百三十六第十三頁

### 李仁罕

仁罕，字德美，陳留人。少隸宣武軍爲小校，容貌瓌偉。梁祖爲四鎮節度，署爲衙內。昭宗幸鳳翔，梁祖遣仁罕奔間行在，因修貢禮。梁祖革命，補宮苑儀鸞等使。歷許蔡華三州馬步軍都指揮使。莊宗伐蜀，令監先鋒軍。知祥領鎮，奏授馬步軍都指揮使。康延孝叛，知祥命仁罕討平之，以功授彭州刺史。遷蜀州。夏魯奇鎮遂州，稟朝廷之命，繕治兵甲，將圖蜀。知祥與董璋謀，先討魯奇，令仁罕攻遂州，拔之。以仁罕爲兵馬留後，未幾，承制授武信軍節度使。又以所部兵定三峽，走夔將安崇院。知祥卒，命仁罕輔政。昶嗣位，令判六軍事。仁罕奉幼主，無隱情，自以先朝舊老，遇事必諫。時控鶴指揮使張公鐸、內醫韓繼勳、封德庫使韓保貞、弓箭庫使安思謙等，皆昶在東府時舊所親狎，素不爲仁罕所禮，皆懷怨怒。每譖仁罕欲納王衍妃徐氏爲側室，遂誣以姦，昶大怒，俟仁罕入謁，令武士擊殺之。年六十二。

卷一萬八千一百三十六第十四頁

### 李延厚

延厚，涪州平恩人。父及，唐邢州別駕。延厚少有膽略，善騎射。從父琮爲涪州節度使，率衆歸於梁祖。延厚

亦從焉。梁補左拱辰指揮第二都頭。後唐同光中。以所部兵從魏王入蜀。改馬軍右驍銳第一指揮使。康延孝入漢州。知祥遣延厚率精兵二千會李仁罕往討之。將行。延厚集將卒於營中。誓之曰。今出師征討。不三旬必破賊。乃立功圖賞之日也。士卒有誓報國恩。不以家爲慮者。立東廂。衰疾怯懦。厭爲征行者。立西廂。無自苦也。得請行者七百人。逐延孝西寨。斬首百餘級。竟拔其城。以功奏授檢校右散騎常侍。改右廂馬軍都指揮使。歷陵果州刺史。源州押衙。文景琛叛。延厚討平之。岐軍逼文州。延厚率衆赴援。即日解其圍。昶襲位。遷雅州刺史。永平軍節度使。未幾移鎮昭武軍。廣政九年卒。年六十一。卷一萬八千一百三十六第十四頁

張公鐸

公鐸。太原樂平人。父頊。唐儀州兵馬使。公鐸身長七尺。倜儻有節義。好文史之學。知祥爲北京留守。錄爲親從。及出鎮成都。補爲牙校。從高敬柔迎公主於晉陽。轉義勝定遠都知兵馬使。董璋舉兵襲我。廣漢先鋒兵將至成都。公鐸率諸軍從知祥逆戰於雞蹤橋。我師不利。公鐸率所部兵力戰。直衝其腹。璋兵大敗。梓州平。以功授簡州刺史。遷奉聖控鶴都指揮使。知祥病。公鐸與趙季良趙庭隱李肇等同受遺命輔政。昶襲位。授保寧軍節度使。爲政嚴猛。寮吏畏憚。時承前蜀之弊。獄訟繁多。案牘堆積。公鐸量其所犯。隨意裁決。無不稱當。在任六年。民被其惠。先是屬邑連歲多逋租。公鐸詰其由。乃豪民猾胥。乾沒賦稅。時令佐已有授代者。公鐸悉勒止之。令盡徵其租。而後解。由是不數日。徵錢糧數萬貫斛。時論以爲嚴而不殘。遷寧江軍節度使。公鐸馭下嚴正。宿衛二十餘年。宮禁寧謐。初染心疾。昶憂之。爲玉局洞開靈室壇。親署青詞以醮焉。廣政八年卒。年六十二。卷一萬八千一百三十六第十五頁

張虔釗

虔釗、遼州榆林人。父簡，唐檢校尚書左僕射。虔釗少以武勇事唐武皇。莊宗之世，累補左右突騎軍使。莊宗嘗以偏師取鎮陽，命虔釗率騎乘爲前鋒，屢挫賊銳，遂陷其城。明宗卽位，以虔釗有將帥才，擢爲隨駕親軍都指揮使。歷遼春二州刺史。天成中，鎮定節度王都阻兵，連結契丹爲邊患，命虔釗爲北面行營兵馬都監，進討契丹，殺傷甚衆，虜不敢南下。遂圍定州，百日而城陷，斬王都，降其餘衆。師還，以功遷橫海軍節度使。未幾移鎮山南，兼西面諸州馬步軍都部署。應順初，閔帝卽位，以鳳翔節度使潞王從珂有異志，發兵討之。詔虔釗爲犄角，師次岐陽，人心離散，降於從珂。虔釗憤之，乃退歸南鄭，率孫漢韶以山南之地納款於蜀。知祥遇之甚厚，委以節鉞，昶襲位，加中書令。歷左右匡聖馬步軍都指揮使，出爲昭武軍節度使。及漢祖卽位，乃移鎮梁州，以觀朝廷之變。會晉昌軍節度使趙匡贊、鳳翔節度使侯益俱謀歸蜀，遂以虔釗爲北面行營招討使，應接經略。俄而趙匡贊侯益請昶出師掠定三秦，因命虔釗與韓保貞等總師五萬出散關，雄武軍節度使何重建出隴右，奉饜蕭衛都虞侯李廷珪出子午谷，會於雍州。廷珪始出子午谷，聞匡贊爲王景崇所逼，棄城自拔東去，遂先退師。時虔釗福誠保貞師次陳倉，謀不相協，而侯益聞匡贊已去，廷珪班師，亦誠款中變，閉壘不出。司天監趙廷樞累以雲氣候不利，諷於保貞，保貞惑之，乃與福誠率所部取隴州，道會重建歸蜀。虔釗留寶雞，以勢孤不可深入，遂班師。士卒夜發，部伍不整，至興州，自以功業不成，感憤而卒。年六十六。

卷一萬八千一百三十六第十五頁

潘仁嗣



仁嗣、浮陽東光人。父廷訓。密州都指揮使。仁嗣少儻尙氣。起家爲保義軍兵馬使。後唐魏王繼岌西伐。仁嗣以所部兵從入蜀。蜀平。改左右廂馬步軍都指揮使。知祥受節鉞。留在麾下。康延孝襲漢州。知祥遣仁嗣率兵救之。連破數寨。遂屯於漢州。董璋與兵趨成都。城外皆爲敵境。仁嗣以所部兵陣於赤水。璋以全軍二萬擊之。仁嗣大敗。以十數騎潰圍而出。身被十餘創。臥於血中。及璋敗獲免。知祥親至其第。以藥傅之。明德二年。奏授武定軍節度使。源壁等州觀察營田處置等使之任。卒於成都。年四十六。卷一萬八千一百三

十六第  
十六頁

龐福誠

福誠、河東太谷人。少善騎射。儻。交結豪俠。傾竭家產。中原兵亂。福誠聚徒鄉里。剽掠縣鎮。知祥爲北都留守。署昭爲太谷主簿。令招諭福誠。因相率歸附。從知祥入蜀。補衙內指揮使。王師陷劍門。從趙庭隱率兵據石橋。福誠夜領兵數百人。循水次東北上山。攻王師。夾其腹背。王師不虞。其至。舉軍驚擾。因奮擊破之。以功遷茂州刺史。知祥建國。加檢校右散騎常侍。昶襲位。歷資縣。邛三州刺史。奉鑾肅衛馬步軍都指揮使。會張虔釗經略秦中。以福誠爲行營馬步軍都虞候。克寶雞。分兵吳山。進攻隴州。以功改左驍騎軍都指揮使。武寧軍節度使。廣政十五年。授口衛上將軍。以目疾罷。卒年七十一。卷一萬八千一百三十六第

李彥琦

彥琦、字子溫。京兆長安人。本姓楊氏。祖父皆隸神策軍。彥琦善騎射。有權略。唐中和初。鳳翔李茂貞委以心腹之任。易姓李氏。齒於諸子。後昭宗西幸。梁祖迎駕。攻逼岐下者累年。及昭宗東遷。長圍方解。大軍之

後府庫空竭。彥琦請使甘州以通回鶻。往復二載。美玉名馬相繼而至。所獲萬計。茂真賴之。劉知俊自靈武班師。途經長城嶺。梁將率精銳數萬蹙其後。彥琦與俊同設方略擊敗之。潞王之守岐下也。諸道將急攻其壘。彥琦時在圍中。罄家財以給軍用。潞王篡位。以功授檢校太傅。知河南軍府事。俄授鎮州兵馬留後。晉祖入洛陽。彥琦罷職西歸。家財素厚。乃閉關自奉。游心釋氏。專務散施。廣政十年。王景崇納款於蜀。彥琦因歸或都。授左將軍。維州刺史。卒年八十八。卷一萬八千一百三十七頁第二頁

孫欽

欽。幽州安次人。性忠烈。善騎射。少遇亂。隸安義軍節度使。充衙內都頭。後改補合州衙內都頭。兼土客都虞候。從本州刺史徐章入蜀。會知祥鎮成都。長興初。轉充右截山都頭。董璋來寇。戰雞蹤橋。有功。遷普州刺史。昶襲位。累遷東川武德軍左奉聖都指揮使。廣政十五年。令以所部兵北征。欽將行。白於都監王承丕。承丕將謀亂。欲害判軍府事郭延鈞。曰。詰朝當領部卒二千人。介冒闕於雄義營。欲與府公觀之。欽未知其由。從容謂承丕曰。卒閱習舊。皆木刀竹槍。今都監令執帶器甲。將士臨行。又是詔旨。或有不虞如何。承丕遂止。又明日。欽已具行裝。入辭承丕。承丕止之。同詣府中謁延鈞。及延鈞送承丕上馬。承丕頤指數卒。擊殺延鈞。自稱准詔處置軍府事。卽據府廳指揮。放諸司罪人。分遣將校領兵屯果園。緜劍州。拒守劍門關。發帑廩以賞將士。自辰至巳。亡命之徒。應募而至者千餘人。明日大會將校寮屬。欽言於衆中曰。郭延鈞既抵朝憲。遠近未知其由。公受命權總留務。願出詔書。以示軍府。承丕曰。作好官。何問詔書。欽知其已叛。乃紿之曰。州城內外人情未安。願爲公督部下兵以伺察之。因躍馬而出。承丕連呼不止。馳至本軍。

立召將士告其事。遂率衆徑趨府中。承丕左右皆奔散。因擒斬之。傳首成都。加檢校太子賓客。二十五年。

寢疾卒。年七十二。卷一萬八千一百三十七第一頁

### 何重建

重建、其先回紇之別部。居雲朔間。祖允慶。父懷福。從後唐武皇世著勳閥。因家於太原。重建初事晉祖爲奉德馬軍都指揮使。歷驩睦曹三州刺史。檢校司徒。會延州節度使丁審琪殘暴貪冒。蕃部苦之。重建以所部兵攻其城。審琪遁去。晉祖卽以重建權節度兵馬留後。下車諭以威福。邊民安堵。就加昭武軍節度使。累遷涇鄧貝瀆孟五鎮節度使。皆以廉儉簡易稱。未幾移鎮秦州。廣政十年。契丹犯中原。虜使賫僞詔至。重建不勝其憤。謂將吏曰。吾事石氏二主。八擁旄節。人臣之榮已極矣。豈能交臂以事戎狄。乃斬其使。以秦成階三州歸款於我。昶遣右千牛衛上將軍李繼勳馳往慰諭。賜予甚厚。加特進同平章事。依前雄武軍節度使。時固鎮與鳳州未平。重建悉經略討平之。昶大舉兵北伐。遣張虔釗出大散關。以重建爲招討使。由隴州路以進師。無功而還。堅請入覲。昶不許。二十一年加兼侍中。卒年六十九。卷一萬八千一百三十六第十二頁

### 孫漢韶

漢韶、太原人。祖昉。唐嵐州刺史。父存進。振武節度使。漢韶幼有器局。風儀峻整。存進尤愛之。起家安定軍使。知祥留守晉陽。屬蕃渾侵擾邊郡。表令漢韶督軍進討。莊宗知其可用。遂委以戎律。大破虜寇。擒獲甚衆。以功授檢校右僕射。蔡州刺史。明宗卽位。遷彰國軍節度使。觀察留後。累遷昭武。武定等軍節度使。閔帝嗣位。加特進。漢韶以其父名。上表讓之。改檢校左僕射。制曰。改會稽之字。抑有前聞。換瓌寶之文。非無

故事及潞王入洛。遂與張虔釗等奉表歸附。及謁見。與知祥敘汾上舊事。及洛中更變。相對感泣。知祥曰。豐沛故人。相遇於此。何樂如之。於是賜第宅金帛。供帳什物。悉官給之。授永平軍節度使。昶襲位。加同平章事。明德三年。入爲匡聖馬步軍都指揮使。廣政十年。爲山南節度使。會何重建以秦階成三州歸附。鳳州石奉頹堅守不通。我使昶遣漢韶入城宣慰。號令嚴肅。秋毫無犯。駐數日乃還。加檢校太師。雄武軍節度使。後以疾乞解兵柄。封樂安郡王。賜肩輿舁入謁。卒年七十二。漢韶忠勇有父風。而重厚過之。居藩闈皆有治迹。始以去危卽安。委質於我。頗竭股肱之力。終保富貴。識者多其淳慤。

### 高彥儔

彥儔。太原人。少善騎射。慷慨有大節。知祥留守太原。召爲軍校。從入成都。授親衛指揮使。昶襲位。遷茂州刺史。廣政十年。秦州何重建以城降。以彥儔領雄武軍節度使。領衆守其城。未幾召歸。領右衛聖馬步軍都指揮使。十八年。周師攻秦鳳。以彥儔爲北路行營招討使。與李廷珪呂彥琦率兵赴援。與周師遇於唐倉大戰。我師敗績。彥儔保退青泥嶺。周師遂克階成秦鳳等州。彥儔歸成都。昶釋不問。改寧江軍節度使。二十七年。王師來伐。分兵由峽路攻夔州。彥儔謂副使趙崇濟監軍武守謙曰。北軍涉險遠來。利在速戰。宜堅壁待之。守謙曰。寇據吾城下而不擊。將何待也。乃獨領麾下千餘人。以出。時王師頓白帝廟西。遣騎將張廷翰引兵與守謙戰。我師敗走。廷翰乘勝登城。彥儔整衆將出拒戰。王師已乘而入。彥儔力戰於城下。不勝。身中十餘槍。左右皆散去。彥儔奔入府中。反拒其門。判官羅濟勸彥儔單騎歸蜀。彥儔曰。我昔已失天水。今復不能守夔州。縱不忍殺我。何面目見蜀人乎。濟又勸其降。彥儔曰。老幼百口。俱在成都。以一

人偷生。舉族何負。今日止有死爾。卽解符印授濟曰。君自爲計。俄而王師壞門。彥儔挺劍拒之。殺十餘人。於是登樓縱火自焚而死。大將劉光乂憐其忠。蓋收其骨以葬焉。卷一萬八千一百三十六第十二頁

李廷珪

廷珪。太原人。幼慧黠。七歲隸知祥帳下爲給使。從入蜀爲牙軍指揮使。征康延孝有功。遷陵州刺史。知祥征東川。廷珪權領親軍以從。董璋平。轉資州刺史。累改眉蜀二州。昶襲位。遷奉聖。控鶴都指揮使。領興元節度使。歷雅遂閬三鎮。加兼侍中。廣政十八年。周師攻秦鳳。以廷珪爲北路行營都統。高彥儔呂彥珂爲招討。廷珪遣先鋒指揮使李進以兵據馬嶺。分兵出斜谷。營於白澗。將腹背以攻周師。又遣染院使王巒領兵出唐倉。與周師遇。我師敗走。王巒死之。而馬嶺斜谷之兵。聞之皆退奔。高彥儔與諸將謀退守青泥嶺。由是秦鳳階成之地。皆陷於周矣。廷珪上表請罪。昶釋不問。明年來朝。遷左右衛聖諸軍馬步軍都指揮使。仍分衛聖步騎爲左右十軍。以武寧軍節度使呂彥珂爲之使。並隸於廷珪。二十八年。王師拔劍門。加廷珪太子太傅。令從元喆統兵以拒王師。至絳州。聞王昭遠趙崇韜之師皆敗。元喆懼。退保東川。翌日奔歸成都。所過盡焚其儲蓄。及王師入成都。行營都監王仁贍按籍詰所在軍資。將歸罪於廷珪。廷珪問計於部將康延澤曰。吾觀王公志在聲色。苟足其欲。則置而不問矣。廷珪素儉約。不蓄妓樂。遂求於姻戚家。得女妓四人。復假貸金帛。直數百萬。以遺仁贍。繇是獲免。歸朝爲右千牛衛上將軍卒。卷一萬八千一百三十六第十一頁

頁三

王彥銖

彥銖太原人。祖義方。汾州長史。父德成。贈太子少保。彥銖性仁弱。不好弄。讀書究大義。天祐中。事知祥於太原。後入蜀。累補節度押衙。詔使李嚴之爲監軍也。密懷異謀。知祥數其過。命彥銖擒斬之。嚴之左右無敢動者。知祥破董璋。擇腹心有權略者。俾護其軍。於是彥銖爲東川監押。及建國。轉授右僕射。昶襲位。歷蓬嘉雅三州刺史。出爲山南兵馬都監。數載罷歸。補左右羅城使。眉州刺史。遷昭武軍節度使。轉右衛聖馬軍都指揮使。罷歸。改左金吾衛上將軍。復授昭武軍節度使。廣政二十四年卒。於治所。年六十五。卷一萬八千一百三十六頁

### 李奉虔

奉虔太原人。本姓王氏。祖欽。唐隰州刺史。父存賢。佐唐武皇。累著功。因賜姓李氏。梁人攻上黨。莊宗親總大軍以援之。存賢先登陷敵。授盧龍軍節度使。奉虔幼有才略。不循小節。年十四爲幽州衙內都指揮使。居父喪。骨立數歲。及知祥鎮蜀。奉虔懇請從行。補廳直左押衙。明宗卽位。充貢奉使。諸將進攻遂寧。王師掩至。劍門不守。知祥命趙庭隱督兵往拒之。署奉虔爲兵馬監押。時衆寡不敵。人心動搖。奉虔與庭隱率勵士卒。竟敗王師。以功授檢校右僕射。昶襲位。領嘉州刺史。文思使。遷右金吾衛大將軍。爲昭武軍都監。屬夏秋多雨。嘉陵江溢。出城。奉虔置堰。開湍瀨二十餘處。洩其蓄水。築堤以護之。城池克完。人被其利。授昭武軍節度。自監護。擁節旄。自奉虔始。人皆榮之。入爲左右街功德使。卒年六十三。卷一萬八千一百三十六頁

### 王昭遠

昭遠成都人。幼孤貧。年十三。依東都僧知諳爲童子。知祥入蜀。飯僧於府署。昭遠持巾履從。知諳得入。時

昶方就學。見昭遠聰慧。留給事昶左右。昶嗣位。以爲卷簾使。遷諸司使。會樞密使王處回得罪。乃以昭遠爲通奏使。知樞密事。機務一以委之。府庫財帛。恣其所取。不問。未幾。遷山南節度使。判官張廷偉言於昭遠曰。公素無勳業。一旦位至樞近。不自建大功。何以塞時論。莫若遣人至書通好。并闢令其發兵南下。我卽自黃花子午谷出兵應之。使中原表裏受敵。可坐有關右之地。則君之功。無有出其右者。昭遠然之。乃言於昶。遣人間行齋蠟書以往太原。爲疆吏所獲。及王師來伐。昶令昭遠與韓保貞趙崇韜等領兵以抗王師。昭遠好讀兵書。頗以將略自任。始發成都。昶遣宰相李昊等餞於郊外。昭遠酒酣。攘臂而言曰。是行也。非止克敵。當以此數萬彫面惡少。取中原如反掌爾。及行。執鐵如意指揮軍事。自方諸葛亮時。王師已破劍門。昭遠大懼。俄與王師遇於漢源。趙崇韜布陣將戰。昭遠據胡牀不能起。崇韜敗。乃免胄棄甲走投東川。爲追騎所獲。送闕下。授左領軍大將軍。開寶中卒。卷一萬八千一百三十六第十七頁

安思謙

思謙。并州人。幼事知祥於太原。以勤恪聞。知祥入蜀。補爲軍校。昶襲位。頗見親信。歷簡邛彭三州刺史。奉鑾控鶴馬步軍都指揮使。武泰軍節度使。未之任。改匡聖馬步軍都指揮使。山南節度使。時鳳翔監軍王景崇以城歸順。命思謙率兵應接。且略地關中。會漢兵圍鳳翔。燒其雙門。景崇遣使來求救。昶遣思謙及韓保貞等率兵救之。兵次右界。漢兵屯寶雞城。思謙令保貞分兵趨隴州。逼汧陽。以分其勢。又遣先鋒將申貴等分兵走摸壁。設伏時家林。貴以數百人晨壓寶雞。列陣以誘漢兵。漢兵爭出戰。貴僞遁。漢兵逐之。爲伏卒所擊。退入寶雞城。思謙次渭水。將引軍濟。會羅睺保義軍與東相應。掩我不備。多殺士卒。而漢兵復

振思謙與諸將議曰糧儲將盡而賊勢且盛不如釋之以圖後舉遂班師十二月景崇又來告急昶復督思謙令進兵思謙請先運糧四十萬斛然後進軍昶覽表不悅謂左右曰古之良將因敵取資近者契丹以數十萬衆入中原豈先事飛輓耶揣思謙此意必不爲朕進取也乃發興州乾渠渡糧食及山南諸倉米數萬斛屯鳳州以益之思謙不得已遂進軍次大散關申貴以所部先進擊漢兵燒箭筈寨毀閣道遁去貴盡銳追之及安都思謙進軍玉女潭又殺漢兵千人漢兵退屯寶雞城思謙駐軍摸壁時保貞之師攻隴州不能下思謙遂遷延不進會漢兵陷鳳翔景崇死乃班師上表待罪昶釋不問召歸移鎮閬州仍留宿衛思謙以受任無狀爲物議所薄頗不自安昶旣誅張業宮禁門衛悉加嚴警思謙以其疑已頗惡之言多悖慢三子辰嗣裔恃父權恣橫國人畏之會翰林王藻乘間奏思謙出怨言將圖不軌昶懼翌日俟其入朝伏壯士擊殺之并其三子廣政十七年也

卷一萬八千一百三十六第十七頁

### 焦彥賓

彥賓字英服滄洲清池人父軫唐兗海節度使彥賓少聰敏多智略事後唐武皇尤所委信及莊宗卽位遷左監門衛將軍充四方館使出護邢州兵知祥移鎮成都詔以彥賓爲監軍使與知祥同入蜀康延孝據廣漢彥賓說知祥令召董璋與之協力討賊遂擒延孝明帝卽位忿閣豎輩怙勢擅權先朝使四方及逃遁不出者皆就戮之死者殆盡彥賓爲知祥保護獲免朝廷因以李嚴代之彥賓辭疾不歸朝知祥因令判都提學院事未幾轉左驍衛上將軍以年老乞代從之彥賓乃營別墅鑿池沼植蒲葦養魚以自給昶襲位以先君舊友命全給俸祿而不令覲謁俾遂其性廣政十五年辛酉年七十八

卷一萬八千一百三十六第十八頁



趙進

進定州人。少以膽勇隸天雄軍籍。時河北宿兵。進累戰有功。洎莊宗入洛。猶在行間。屯於清。廩祿既薄。又不時給。士卒多怨憤。思亂者十七。同光末。與本軍皇甫暉等共推副趙在禮相率夜犯鄴城。城中士卒莫有鬪志。進等因陷其城。未踰旬。兵數萬。在禮署進衙內都虞候。三城巡檢使。莊宗遣元行欽以其言聞。因詔明宗馳往招諭。及入城。乃共推戴。遽有洛中之變。天成初。除貝州刺史。鄴都衙內指揮使。明年移典寧州。屬慶州叛。遣進討平之。遷雅州刺史。知祥入蜀。進來覲謁。知祥以進始謀叛逆。將誅之。進大懼。趙季良諫曰。莊宗季年。天下思亂。匪獨貝魏一境。公國之懿親。所宜責以干紀。加其顯戮。進自知必死。歸命於我。所以撫納。以責其後效。知祥納之。董璋之亂。我師致討。進戎服謁見。而言曰。進荷明公不殺之恩。今日有所報矣。請前蹈白刃。決命破賊。乃署爲前鋒監陣使。先登立功。璋平。轉左衝山指揮使。昶襲位。歷忠鳳邛普四州刺史。右匡聖步軍都指揮使。所至軍政修舉。戍卒有疾苦者。必撫問周悉。當盛暑。沍寒。未嘗勞役將士。以此樂爲之用。廣政十七年。督部兵戍漢中。逾月以疾聞。召還卒於道。年六十一。卷一萬八千一百三十六第十八頁

石處溫

處溫。萬州人。本波斯之種。仕前蜀爲利州司馬。同光中。知祥入蜀。補萬州管內諸壇點檢指揮使。率義兵同收峽路。時通州大將王允瓊侵擾邊鄙。及草寇杜景溫劫東鄉豪。殺縣令牟孟。剽略戶口。焚燒村落。處溫與諸軍討平之。知祥遺書褒美。轉寧江軍節度都知兵馬使。萬州管內義軍都指揮使。昶襲位。遷獎州刺史。處溫初據石市。招納亡命。遠近多歸之。由是廣事耕墾。常積穀數萬千石。前後累獻軍糧二十餘萬。

石加以寶貨。昶嘉之。加檢校司空。未幾授萬州刺史。移簡州。卒年八十。

卷一萬八千一百三十六第十八頁

### 孟思恭

思恭字近禮。潁川人。父彥暉。嘗爲許州獄吏。前蜀王建嘗隸忠武軍。坐事被繫。謂彥暉曰。卿能免我。他日將厚報。彥暉遂縱之。令亡去。及建霸蜀。遣使迎之。授簡州刺史。遷漢州團練使。思恭弱冠奇峭。猿臂善射。起家保信軍使。建嘗集文武射苑中。思恭屢中的。建大悅。賜衣服。以其女妻之。爲駙馬都尉。累遷靜塞軍團練使。王衍襲位。爲北路行營都指揮使。知祥鎮蜀。以其宗姓補先登指揮使。以所部兵從董璋。遣思恭分兵討集州。誠之曰。賊少則與戰。賊衆則退守要害。我將濟師。及遇賊。思恭與之戰。不利。退求濟師。璋怒。放思恭歸。知祥免之。明年隨趙庭隱破璋於雞蹤橋。以功改清遠指揮使。昶襲位。加檢校司空。改雄義都指揮使。屯梓州。累遷飛棹都指揮使。歷劍階忠三州刺史。思恭有膽略。善撫士卒。廣政二十年。爲峽路行營都指揮使。屯赤英山。時秋暑未退。思恭苦熱。食冷物。浴寒水。致疾。卒於任。年七十二。

卷一萬八千一百三十六第十八頁

### 申貴

貴。潞州人。弱冠有勇力。初事李彥珂。爲帳下卒。天成中歸於知祥。累補定遠都頭。從征伐。身當矢石。深爲諸將之所推許。改決勝耀武指揮使。昶襲位。遷右衛聖都指揮使。歷昌渝文眉四州刺史。貴貪鄙殘虐。所在聚斂財貨。民不勝其弊。典眉州受財鬻獄。尤恣暴橫。嘗指獄門謂左右曰。此我家錢爐。其不道如此。初兼五縣巡檢。令其子元寶與州吏許延祺誣搆民連賊。枷禁以求賂。被訴下獄。責授貴維州司戶參軍。馳驛發遣。至犀浦。賜自盡。

卷一萬八千一百三十六第十九頁



# 九國志卷八

東漢世祖以乾祐四年稱帝。至英武帝廣運六年國滅。歷四主。凡二十九年。按十國紀年及通鑑作北漢。此與五代史同。

## 世家

世祖姓劉名旻。初名崇。後漢高祖母弟也。為河東節度使。乾祐三年。隱帝遇弒。郭威篡漢。四年正月戊寅即位於晉陽。仍用乾祐年號。受契丹册命。在位四年。薨。年六十。廟號世祖。

睿宗名鈞。初名承鈞。旻次子。受契丹册命。仍稱乾祐七年。行三年喪。服除。改乾祐十年。為天會元年。至十二年七月戊申薨。年四十三。諡曰孝和皇帝。廟號睿宗。

少主名繼恩。本姓薛。鈞養為子。嗣位。六十餘日。為郭無為所弒。

英武帝名繼元。本姓何。亦鈞養子。既襲位。仍稱天會十二年。越五年。改元廣運。六年五月癸未。降於宋。降封彭城郡公。淳化中。薨。追封彭城郡王。

## 列傳

蔚進

張元徽

鄭進

衛儔

李隱

## 蔚進

進、太原人。少有膂力。身長七尺。日行二百餘里。高祖鎮并汾。進以材官給事。及高祖領軍。令負羈勒。開運末。南行。留進於太原。為崇翊衛。即授馬步軍指揮使。鈞襲位。領建寧軍節度使。典親軍如故。繼恩監國。郭無為受詔輔導世子。無為與進不協。出為代州刺史。時無為專政。繼恩潛欲圖之。進知其必為亂。自以居親衛之地。頗懷危感。及有中山之命。忻然即路。未幾繼恩遇弒。國人皆以進為先見。以城納款歸朝。授左

衛大將軍。領檀州刺史。卒年七十二。進無他能。惟掌兵方嚴。所至不敗。事劉氏四主。以質直聞。歸老中國。祿至二千石。亦武夫之終吉也。卷一萬八千一百三十七第二頁

張元徽

元徽。邢州武安人。少以沈勇隸本城爲兵。累轉至列校。高祖鎮并汾。召置帳下。累從征討有功。晉開運末。破契丹於三交。以功授代州刺史。歷雲州防禦使。遷代州。與崇素相友善。及崇建號。領侍衛親軍。遷武寧軍節度使。崇舉兵南下。將圖周室。以元徽爲前鋒。與周師遇於巴公原。元徽以東軍先登陷陣。擒監軍使一人。降其步卒千人而旋。崇大褒賞之。元徽乘勝復入馬倒。爲周師所擒。殺之。其麾下十餘騎。畢力血戰。奪其尸而出。俄而崇衆亦敗。先是前鋒兵將次巴公。一夕營中刁斗皆噎。元徽亟遣詣崇。大寨易之。凡易數十。皆噎而不可擊。因以白崇。崇怒曰。故要吾金鉦耶。遂止。是夜有大星墜。元徽營中。明日果敗。元徽沈厚。有將帥材。善撫士卒。輕財好施。雖爵祿豐厚。而家無餘貲。旣而軍吏爲立廟。晉陽城西北隅。塑其像。歲時祀之。見者必掩泣。卷一萬八千一百三十七第二頁

鄭進

進。開封陽武人。身長七尺餘。饒勇多力。漢祖鎮并汾。以材官給事。累從征討有功。卽位。遷侍衛馬步軍都指揮使。鈞襲位。以先朝勳舊。賜予彌厚。進性慷慨。重然諾。好施家。無餘貲。繼元立。馬峯典機密。性鄙吝。與進不協。峯怒。悉奪其兵柄。進不堪辱。詬之於朝。繼元怒。翌日。送定襄安置。遣人殺之於路。卷一萬八千一百三十七第三頁

衛儔

儔吐渾族人。少事鈞爲蕃落小底。善騎射。驍勇絕倫。明書計。通六蕃語。鈞襲位。遷如京使。令專掌吐渾一軍。以從征討。所向多克捷。虜援兵每至。卽遣儔居前鋒。軍中凡布列烽燧。措置寨柵。皆儔爲之。繼元立。爲闡人。衛德貴所嫉。出爲遼州刺史。吐渾數千人遮道請留。繼元不許。自是一軍失帥。不復可用矣。儔少長蕃中。不樂爲郡。頗出怨言。繼元慮其爲變。潛遣人殺之。卷一萬八千一百三十七頁

李隱

隱雁門人。少以驍勇隸緣河十寨。善騎射。有膽略。鈞襲位。以軍功擢授馬步諸軍都引進使。累從征討。性純直。未嘗曲事權要。衛儔出知遼州。隱惜其忠勇。爲倖臣所逐。頗憤惋。形於言。德貴聞而惡之。白於繼元。卽日送嵐州安置。未幾殺之。卷一萬八千一百三十七頁



# 九國志卷九

南漢 唐天祐元年烈宗為廣州節度使至後主大寶十四年國滅  
凡六十七年斷自高祖乾亨元年為始凡四主實五十五年

## 世家

烈宗 姓劉名隱父謙為封州刺史有三子曰隱台嚴乾亨元年冬謙卒士民謀亂隱誅之嶺南節

度使劉崇龜表為封州刺史天祐元年朱全忠奏為清海軍節度使梁開平元年封大彭王

三年改封南平王四年進封南海王乾化元年三月丁亥薨

高祖 名襲初名嚴又名陟謙庶子乾化元年五月甲辰梁以爲清海軍節度使三年正月襲起南

隱曰烈宗乾亨二年八月十一日稱帝建國號曰漢凡改元乾亨九年白龍三年

殤帝 名玢襲第三子初名宏度封寶王改封秦王及嗣位更今名改大

中宗 名晟初名宏熙封晉王既弒玢遂嗣位改光天二年為應乾元年十一月丁亥改乾

後主 名銀晟長子初名繼興封衛王乾和十六年八月辛巳襲帝位改是年為大寶元年至十四年

## 列傳

劉洪操

劉洪杲

蘇章

吳懷恩

陳道庠



邵廷瑁

潘崇徹

郭崇岳

劉洪操

洪操字貞度。龔第九子。洪澤之母弟也。幼知書。及長。有識量。大有中封萬王。十一年。吳權攻交趾。皎公羨求救於龔。龔欲乘其亂而取之。遣大將梁克真率兵南下。龔自護其軍。以洪操爲靜海軍節度使。封交王。令統衆趨白藤。時吳權已殺公羨而據交趾。親率衆來逆戰。先於海口多植槎。悉銳其首。以鍬冒之。潮水方漲。權乘輕舟引兵挑戰。洪操逐之。須臾潮退。戰艦爲槎所絀。士卒皆覆溺。死者過半。遂擒洪操殺之。卷一萬八千一百三十七第六頁

劉洪杲

洪杲字日宣。龔第十子。母尙儀謝氏。名宜清。有寵。洪杲十歲封循王。好步鬪。復使弓馬。以膽勇聞。諸兄皆尙儒學。或勸令讀書。洪杲曰。我家立功立事。皆起馬上。獨使我老一經乎。龔以兵書教之。遂略通大義。光天初。循州賊張遇賢自稱中天八國王。擁衆數萬。攻下郡邑。洪杲請統衆討賊。玠以其尙幼。不許。洪杲曰。兵法尙變。不尙齒也。因令越王爲都統。洪杲副之。次錢帛館。軍士方食。賊衆奄至。洪杲率親信數百人。介甲躍馬。徑入賊中。殺數百人。賊爲之少卻。俄而越王領衆繼至。與賊大戰。自辰及午。賊衆益盛。圍我師數重。矢下如雨。軍人多死。洪杲矢盡。挺劍力戰。流血滿袖。裨將萬景忻等蒙以大楯翼二王。以出。賊解去。洪杲以戰功授桂州觀察使。未幾。與晉王同謀篡弒。應乾初。爲諸道兵馬副元帥。參政事。晟初。立國中。謗議騰沸。洪杲請歸罪於劉思潮等。晟不從。反爲思潮等所譖。以洪杲謀爲亂。晟遣思潮偵之。一日。洪杲與親

信飲酒第中思潮與譚令禪領衛兵排闥而入斬其首以徇。卷一萬八千一百三十七第五頁

### 蘇章

章封州人。少事隱爲牙將。性忠厚。有勇力。從征譚玘。盧瑒有功。辭王奏署衙內馬步軍都指揮使。從隱討盧延昌於韶州。隱率舟師出雙石。會天大霧。昏暝如夜。詔人四出。以鍊纜繫巨鉤。投隱舟中。士卒驚擣。章引弓射殺數人。以巨斧擊鉤。鉤皆斷折。纜不能施。詔人乃退。翌日進逼其城。城上望樓中有人罵隱。言頗穢褻。隱慙甚。不敢視左右。章伏舵樓中。引弓射罵者。應弦而斃。舟中皆鼓譟。時江水暴漲。自清遠峽以北。湍瀨尤惡。糧運不繼。會延昌父光倜自虔州擁兵來援。隱與戰屢敗。乃班師。詔人以兵襲我後。遂捨舟而走。士卒不成列。隱馬斃。章以所乘馬援隱。因徒行爲後殿。詔人不敢逼。以功遷封州刺史。充左右衛使。襲襲位。命章典禁衛諸軍。白龍中。楚人乘舟師來伐。圍封州。敗我師於賀江。溺死者千人。襲乃遣章領神弩軍三千人。戰艦百艘。援之。章至賀江。沈鍊索水中。兩岸設巨輪。以挽索。築連堤。以隱之。伏壯士堤中。章以輕舟逆戰。佯不利。楚人逐之。堤中挽輪舉索。楚艦不能進退。乃以強弩夾水射之。楚人殲焉。收戰船百艘。以歸。遂解封州之圍。以功遷團練使。章子五人。俱爲中郎將。豪俠任氣。所爲不軌。番禺號爲五郎將。章年老。不能教訓。會有告其謀叛者。逮捕下獄。悉斬之。章以功得不坐。慙悻成疾。大有十年卒。卷一萬八千一百三十七第三頁

### 吳懷恩

懷恩番禺人。事襲爲內府局丞。性謹愿。典宿衛二十餘年。未嘗有小過。玠襲位。遷內常侍。玠好宴樂。東西

兩教坊伶官千餘人常晝夜出入宮中懷恩屢言於玠曰今禁中自有簫韶府內樂工百餘皆善音律夜宴用此足矣焉用教坊若夜雜入禁中不拘闌籍恐姦人竊發不可不慎玠不聽未幾果爲陳道庠所弑晟襲位授宮闈諸衛押番乾和六年加開府儀同三司西北面招討使與指揮使吳珣領兵侵楚親冒矢石半歲間取梧州六州之地以功加濮陽縣公大寶中王師取郴州銀懼以懷恩爲桂州團練使令治戰艦懷恩馭下方嚴臨事精至每舟成必自臨視材有良窳不等及制度疏略不如法者必榜役工役者多怨之又造龍舟十以備銀親征舟成懷恩以綿幕其手徧捫鈎楯匠區彥希在側連斤斬之首墮船中左右皆驚走後數日擒彥希斬於市懷恩治兵嚴整所至輒有功及被害國人憂之

卷一萬八千一百三十七第五頁

陳道庠

道庠潁川人父璫唐末避亂於封州膂力絕人隱聞其忠勇召至帳下隨隱入廣州遷雄虎將軍卒道庠幼俊爽起家爲虎賁郎驍勇有父風大有未給事晉王府翼疾亟命以道庠爲元帥府馬步軍都指揮使光天初張遇賢起循州大掠郡邑道庠與萬景忻從越王循王東征遇賊錢帛館賊圍之數重自辰及午我師殆盡道庠與景忻奮劍大呼殺十餘人賊衆披靡於是掖二王而出玠旣立所爲不法疑羣弟圖己每宴集則令宦官守闈供奉將吏悉露索而後入及晟將爲亂謀於道庠玠好角抵於晉王府中道庠因引多力者劉思潮等數人習角抵於晉王府中玠聞而悅焉翌日大置酒長春宮召角抵與諸王觀之至夕玠大醉旣罷晟遣道庠等掖之因拉殺玠血濺寢門左右皆散走晟立以道庠爲功臣領英州刺史出入宮中賞賜優厚旣得志頗誅殺勳舊功臣劉思潮等皆相次被誅道庠不自安特進鄧仲與璫有舊嘗

遺道庠漢紀問其意伸叱曰。慙獠。此書有韓信彭越事。審讀之道庠大懼。遂謀亂。事未及發。而晨覺之。乃收道庠。伸下獄。翌日同斬於市。夷其族。卷一萬八千一百三十七第六頁

### 邵廷瑁

廷瑁。循州人。幼爲黃門給事。禁中言論峭直。與羣閣異。及長。有文武材幹。博覽書史。尤善騎射。玠讓位。爲內謁者。遷內府局令。總宿衛兵。軍務嚴整。尤重儒士。有自遠方來者。廷瑁必先見之。爲具貲糧。而後引薦。多被任用。大寶中。遷內常侍。時鑲春秋已長。而未知稼穡。荒於游宴。人心危惴。廷瑁每從容言曰。男兒十五奪父志。今宗社安危。繫於陛下。願加檢慎。鑲建禹餘宮。在城東南六十里。山水奇絕。鑲避暑多往焉。廷瑁雅所愛尚。因請解兵職。願爲宮使。鑲從之。而令典兵如故。廷瑁以諸戎器不甚犀利。弓弩不能及遠。甲鎧銷薄。不可以禦大敵。乃爲式親督工匠造之。累言於鑲曰。中國亂離久矣。我先朝乘其間。故有南越之地。五十年來。嶺表無事。師之耳目。不識旗鼓。今中國已有真主。陛下未嘗遣一介之使。馳咫尺之書。珠貝犀象。瑇瑁翠羽。積於內府。歲久而不可較。陛下未嘗以修聘。一旦兵至。何以禦之。鑲懵然不以爲慮。七年。王師克郴州。招討使暨彥鸞戰死。王師乘勝取連州。鑲始懼。乃加廷瑁開府儀同三司。東南面招討使。以舟師屯洸口。王師旣退。廷瑁撫循將士。招輯亡叛。境上肅然。稱爲良將。因繕治甲兵。親加訓練。將復郴連。會同列者嫉之。投匿名書。言廷瑁將圖不軌。鑲信之。遣使賜廷瑁死。士卒排軍門爭入。對使者哀訴。言廷瑁無反狀。請加考驗。弗許。軍民冤痛。爲立廟於洸口。至今祀之。卷一萬八千一百三十七第四頁

### 潘崇徹

崇徹南海人。事龔爲內侍省局丞。頗知書。有鈴略。乾和中。晟遣崇徹率兵攻郴州。時江南將邊鎬據湖南。發兵來援。相遇於宜章。崇徹令部將康崇保分兵爲兩翼以掩賊。江南兵大敗。遂克郴州。明年潭州節度使王逵率兵五萬來復郴州。晟遣崇徹領衆赴之。與逵遇於壕石。逵軍遠來。罷乏不成列。崇徹登壕而望。喜曰。此成擒也。乃縱兵擊之。潭人大敗。逵僅以身免。桂州吳懷恩爲部下所殺。遣崇徹代領其衆。加西北面招討使。歲餘以飛語見疑於銀。遣崇岳來覘其軍。戒之曰。崇徹果有異志。卽就誅之。崇岳至。崇徹知其意。悉以所部兵自衛。以見崇岳。不敢發。還以白銀曰。崇徹日夕領伶官百餘輩。並衣錦繡。吹玉笛爲長夜之飲。不恤軍政。銀方怒。會崇徹單騎來歸。束身請罪。銀釋而不問。但奪其兵柄。自是常怏怏。及王師圍賀州。刺史陳守忠告急於銀。召大臣議。皆請以崇徹領兵以拒王師。崇徹難之。辭以目疾。銀怒曰。何須崇徹。伍彥柔獨無方略耶。乃以彥柔代領其衆。彥柔至賀州。爲王師所擒。賀州陷。銀憂迫。計無所出。乃加崇徹內太師。馬步軍都統。領衆三萬屯賀江。會王師徑趨韶州。崇徹但擁衆自保。不爲之援。王師度馬徑。崇徹請降。從銀歸朝。太祖知其事。特赦崇徹以爲汝州別駕卒。

卷一萬八千一百三十七第四頁

郭崇岳

崇岳番禺人。宮媪梁鸞眞之養子也。幼爲闈人。以慧黠聞。乾和中。爲內侍監。銀襲位。遷內侍中。太微宮使。大寶十三年。王師來伐。都統李承渥以全師出韶陽。爲王師所敗。銀震駭。顧諸將無可使者。鸞眞卽薦其子可用。乃以爲招討使。與大將植廷曉統泉六萬守馬逕。去番禺裁百餘里。時王師已過瀧頭。翌日入馬逕。去我寨十里。游騎據雙女山。直瞰我軍。頻摩壘挑戰。崇岳本無將材。所統之衆皆韶英敗卒。絕無鬪志。

廷曉欲出戰。崇岳不從。但堅壁自守。晝夜禱祠鬼神而已。王師繼至。廷曉謂崇岳曰。北師乘席卷之勢。其鋒不易當也。吾士旅雖衆。然皆傷痍舊卒。今不驅策而前。將坐受其斃。亡無日矣。於是領前軍據水而陣。令崇岳殿後。禦其奔衝。既而王師濟水。廷曉力戰而死。崇岳奔入營。王師攻之。初一夕。南風甚厲。至是北風大起。王師縱火燒寨。崇岳大敗。死於亂尸之下。

卷一萬八千一百三十七第五頁



九國志卷十

閩司空以唐景福二年有泉汀五州地為節度使至  
天德帝天德三年滅於南唐歷七主凡五十二年  
世家

司空

姓王名潮字信臣光州固始人唐末為縣佐史與弟審邦審知以才氣知名號三龍屬者王緒聚眾自稱將軍署潮為軍正既誅緒眾推為主時光啓三年八月也至景福二年盡有泉汀五州之地九月戊戌唐以為福建觀察使三年九月庚辰升福建為威武軍拜節度使四年十二月丁未薨贈司空

太祖

名審知字信通潮季弟景福四年冬潮有疾託審知以大事既卒自為留後光化元年三月己丑受朝命十月癸卯授本軍節度使天祐元年四月封瑯琊王梁開平三年四月封閩王後唐同光二年十二月辛未薨在位二十九年年六十四諡曰忠懿龍啓初追諡昭武孝皇帝廟號太祖陵曰宣陵

嗣主

名延翰字逸審知長子初審知寢疾命權知軍府既卒自為留後同光四年三月辛酉唐授為節度使明宗天成元年十月己丑建國曰閩稱王十二月辛卯遇弒推為留後天成二年五月癸丑唐以為節度使封瑯琊王延稟審知養子也既與延鈞弒延翰推為留後帝改

惠宗

名麟初名延鈞審知次子建州刺史王延稟審知養子也既與延鈞弒延翰推為留後帝改元凡改元二年龍啓二年永和元年十月庚辰遇弒共在位十年諡曰齊肅明孝皇帝廟號惠宗

康宗

名繼鵬麟長子既弒麟明日辛巳即位更名昶既而稱節度使奉表於唐明年改元通文四年閏七月辛巳夜控辰控鶴二都兵作亂比明遇弒永隆諡曰聖神英睿文明廣武應道大

宏孝皇帝廟號康宗

景宗

名羲初名延羲審知第二十八子先是被幽私第及繼鵬遇弒控鶴軍使連重遇等迎立自稱節度使閩國王時通文四年閏七月壬午也是月改為永隆元年又奉表於晉在國仍用



天子制六年正月乙酉為朱文進連重遇等所弒諡曰睿文廣武明聖元德隆道大孝皇帝廟號景宗

天德帝

名延政延義弟也延義既立封為富沙王繼因延義肆為醜虐貽書切諫遂成讐敵久之自立為帝以建州開國號曰殷改永隆五年為天德元年二月三月朱文進弒延義延政討之十二月衆殺朱文進連重遇於天德三年正月迎延政為帝復號曰閩是年八月丁亥唐兵破建州出降時晉開運二年為唐保大三年也保大五年唐封為鄱陽王九年徙封光

山王未幾薨贈福王諡恭懿

列傳

黃仁諷

許文稹

王仁達

楊思恭

留從效

王忠順 黃思安

陳洪進

黃仁諷

仁諷建州浦城人少有武幹隸本城為鄉兵以陣敵立功累遷飛捷指揮使福州林仁翰殺連重遇送首於建安迎延政歸王閩中時唐兵壓境不果行遣仁諷護送從子繼昌入守閩中以仁諷為福州在城鎮遏使繼昌庸懦無馭下才人心不安會江南兵逼建安將吏知其必破上下思亂仁諷因之遂與李仁達陳繼珣等同謀殺繼昌而自立延政大怒收仁諷妻子戮於市發兵討之時仁達已推立卓儼明令仁諷為城西門軍帥以捍建兵仁諷知妻子已戮臨敵不顧出入奮擊建軍大敗退而謂繼珣曰忠信仁義士之所守舍此無以立吾頃在建安嘗攻伐今見利忘義不能慎守晚節是不忠也富沙託子於我曾不營救中道而變是無信也與建軍對敵所殺者皆鄉曲故人不仁不忠也富沙託子於我曾不營

沉九浮旦夕歸地下。何面目見之。因拊膺而哭。繼珣曰。大丈夫殺身徇名。何顧妻子。且置是事。無輕泄也。建軍既退。左右以其言白仁達。翌日擒斬之。并殺繼珣。卷一萬八千一百三十七第七頁

許文稹

文稹。泉州同安人。少事審知。爲給事使。累歷內職。昶襲位。遷文思院使。延義立。改金吾使。率兵屯臨汀。未幾授汀州刺史。朱文進竊位。以其黨黃紹頗守泉南。而臨汀亦叛。以應文進。留從效殺紹頗。以其首送建安。文稹懼。乃諭郡人歸欵於延政。加太尉兼侍中。爲治嚴整。賞罰必當。吏民畏而愛之。江南兵圍建州。遣將時厚卿分兵攻汀州。文稹率衆拒戰。擒厚卿。遣歸金陵。因上表謝罪。及建州陷。明年文稹率軍吏赴金陵。璟復以爲汀州刺史。未幾改蘄州。召歸授建州刺史。周顯德中。王師圍壽春。潘承祐薦文稹有武幹。璟令統兵數萬屯紫金山。爲周師所破。擒文稹。世宗釋不誅。璟割地歸欵。世宗放文稹歸。璟以其失律不用。歸同安。坎壈而卒。卷一萬八千一百三十七第八頁

王仁達

仁達。延鈞從子也。幼聰悟。博覽羣書。及長。魁梧有機略。善用鑊槩。每擐甲持槩上馬馳刺。觀者稱其妙。延鈞襲位。仁達爲樓船指揮使。王延稟叛。與其子繼雄領兵攻福州。仁達率舟師禦之。僞立白幟請降。繼雄登舟與語。因刺殺之。以首示延稟。大慟。士卒擾亂。遂擊破其軍。擒延稟。以獻。遷親從都指揮使。領台州刺史。性慷慨。自以功高。又居親衛。言事頗肆。曾臆延鈞忌之。一日延鈞宴羣臣。酒酣。顧謂仁達曰。趙高指鹿爲馬。以愚二世。其理安在。仁達對曰。秦二世幼冲。爲強臣所蔽。故有此弊。今朝中官吏不滿百人。長短美

惡。陛下皆見之。動息飲啄。陛下皆知之。敢有蒙蔽聰明。擅作威福。召族滅之禍者耶。延鈞大慙。因賜金帛以慰之。翌日加檢校太傅。自是延鈞每醉。卽欲殺仁達。私謂所親曰。仁達多智略。當吾之世。猶可駕馭。觀其詞氣。非幼主臣也。後竟誣以叛誅之。卷一萬八千一百三十七第七頁

楊思恭

思恭。建州建陽人。少俊爽好學。有心計。事昶爲同安尉。延政聞其名。辟爲節度巡官。及襲位。遷戶部尙書。時兵革屢興。國力空匱。命思恭爲僕射。錄國事。增山澤壙畝之稅。魚鹽蔬果。皆倍其算。道路側目。號楊剝皮。唐兵至建陽。延政遣統軍陳望帥衆拒之。列寨相屬。斥堠甚明。唐人不敢逼。凡月餘不戰。思恭遣使以延政之命詰責之。望對曰。江淮間多精兵將帥。練習戰事。未可輕敵。陛下不以臣不肖。舉國中之衆以屬於臣。安危之機。在此一決。今之曠師。非臣之怯也。且欲觀其變。爲萬全之策耳。思恭大怒。復遣讓之曰。淮兵侵陵。百姓叛逆。睡不交睫。食不知味。且彼之衆。不過數千。跋涉山川。師無停糧。將軍擁衆盈萬。兵精馬壯。今乘危授隙。與之角戰。是以石破卵也。若曠日持久。使其營壘堅固。芻粟豐備。復何望哉。將軍受國重恩。宜盡死力。立功立事。以報萬一。江淮懼而自退。將軍無血刃之勞。何面目見陛下乎。望不得已。乃引兵渡水。唐人張左右翼以擊我軍。大敗。溺死者尤衆。延政降。思恭遂歸金陵。斬於建康市。卷一萬八千一百三十七第七頁

留從效

從效。泉州桃林人。少隸本城爲衙兵。征臨汀。以功遷冗員。指揮使。朱文進殺延義。竊據福州。以其黨黃紹頗爲泉州刺史。從效與其裨校王忠順黃思安謀。同殺紹。頗迎立王繼勳爲刺史。從效自署爲平賊統軍。

俄而文進率兵來攻。從效開城門與戰。文進敗走。於是人心悉歸於從效。會江南兵已平建州。從效遂劫  
繼勳送於金陵。李璟以從效爲清源軍節度使。發兵屯郡中。一日從效謂屯將曰。此一方東漸於海。與福  
州世爲讎敵。南限廣州瘴癘之地。人使不通。西連鄞水。皆猿徑鳥道。近歲干戈屢動。三農廢業。冬征夏斂。  
僅足自贍。不煩大軍久駐於此。屯將皆不對。翌日置酒餞之郊外。屯將不得已。皆卷旗而去。從效遂有漳  
泉之地。李璟不能制。累授從效同平章事兼侍中。封晉江王。從效起自行陣。知人疾苦。勤儉養民。常衣布  
素。涉獵史傳。延納名士。部內清治。吏民愛之。王氏有二女。嫁爲郡人妻。從效每給其衣食。歲取進士明經。  
謂之秋堂。周世宗征淮南。從效遣衙將蔡仲興爲商人。以帛書置革帶中。由岳鄂送款內附。又請置邸京  
師。世宗以其素附江南。恐其非便。不許。宋朝建隆初。上表稱藩。李璟遷於洪州。從效遣使假道吳越入貢。  
太祖遣使賜詔書以慰之。未至而衙校張漢思陳洪進劫從效遷於東亭。漢思自稱留後。從效疽發背卒。

卷一萬八千一百  
三十七第八頁

### 王忠順黃思安

忠順泉州人。隸本城爲鄉軍。與從效同殺黃紹頗。遷爲軍校。江南兵逼建州。黃思安與忠順同領衆赴難。  
延政屯西門。數戰不利。延政諭之曰。孤以不德致寇。公等與從效首誅兇黨。克定泉南。踰越巖險。以兵來  
援。見公等之忠赤也。今當勉之。思安等俯伏對曰。臣以必死奉報。時城中衆心離散。或說以去就之計。思  
安曰。吾輩世爲王氏臣。今視其危而叛去。天下皆皆有容我者乎。衆感其言。遂無叛者。翌日城陷。忠順力  
戰死之。思安整衆歸泉州。追兵不敢逼。

卷一萬八千一百  
三十七第八頁

陳洪進

洪進、泉州仙游人。少材勇。選爲州兵。留從效殺紹頗。遷爲指揮使。從效將送紹頗首於建安。迎延政爲閩王。羣下以道阻賊盛。莫有肯行者。獨洪進請往。時尤溪賊數千衆遮道不得前。洪進神氣自若。語賊曰。朱福州已爲義師所襲殺之矣。爾輩更爲何人戍守。卽持紹頗首示之曰。我倍道兼行之。建州以逆嗣君返國。爾等無所歸矣。賊遂潰散。渠帥數人皆聽命。因從洪進至建州。延政大悅。擢洪進爲建州馬步軍都指揮使。及江南克建州。延政歸金陵。李璟以留從效爲清源軍節度使。洪進佐之。出戰入守。十五餘年。以功遷統軍使。從效卒。其子紹鋌使江南未復。小子紹鑑領留後事。月餘。吳越遣使來聘。紹鑑夜召其使與之宴。語洪進疑之。乃誣紹鑑謀叛。欲以其地入吳越。執之送於建康。推副使張漢思爲留後。自爲副使。漢思老且淳謹。事無巨細。皆決於洪進。漢思諸子患洪進之專。因大宴伏甲府署中。將殺洪進。酒數行。地忽大震。屋宇皆傾動。甲未及發。而同謀者告之。洪進遽起去。洪進子文顯文顯俱爲牙校。請以所部兵擊之。洪進不許。一日洪進置大鑊於袖。從容常服安步以入府中。漢思方處閣內。洪進自外鑊其中。使人叩門。謂漢思曰。郡中軍吏以公耄荒不能治。請洪進知郡事。衆情不可遏。望以郡印相授。漢思錯遑。不知所爲。乃以印與之。洪進出召將吏告之曰。漢思昏耄不能治事。以印見授矣。將吏皆賀。卽日置漢思於別館。以兵監守之。遣使如江南請命。李煜以洪進爲清源軍節度使。建隆初。太祖平李重進於揚州。江浙皆納款。洪進懼。乃遣牙校奉表。自稱副使。言張漢思請老歸第。以已領軍事。太祖賜詔書慰諭。乾德二年。制授平海軍節度使。仍鑄印以賜。開寶八年。江南平。洪進遣其子文顯來朝貢。因降詔洪進入覲。至建州聞太祖

崩。乃還鎮發哀。太宗卽位。加檢校太師。太平興國二年入朝。遂獻所管漳泉二州之地。願朝請加平章事。  
卒年七十二。贈中書令。諡曰忠順。卷一萬八千一百三十七第九頁



九國志卷十一

楚至後唐保大九年辛亥國滅凡五十七年

世家

武穆王

姓馬名殷字霸圖唐中和時孫儒劉建鋒戊蔡州殷隸軍中及儒敗死衆推建鋒爲帥殷爲先鋒建鋒殺衆推張佶佶讓於殷時乾寧三年五月也九月唐授殷潭州刺史光化元年三月命知武安軍留後未幾進本軍節度使梁開平元年四月辛未封楚王後唐天成元年六月封楚國王許自開國長興元年十一月己巳薨年七十九謚武穆葬於衡陽之上

漢

衡陽王

名希聲字若訥殷次子殷有子數十人嫡子希振長而賢次希聲與希範同日生以母寵得立長興元年十一月丙戌襲位去建國制十二月唐以爲節度使三年七月辛卯薨追封衡陽王

文昭王

名希範字寶規殷第四子希聲既沒長興三年八月辛酉襲位九月唐以爲節度使四年正月乙卯封扶風郡侯應順元年正月壬辰封楚王晉天福四年四月加天策上將軍十年九月開天策府開運四年五月壬辰薨年四十九謚文昭是年六月劉知遠改國號曰漢

廢王

名希廣希範同母弟希範病以希廣屬拓跋恆將佐以希萇爲長恆以勸希廣讓希萇指揮使劉彥瑫等不欲遂奉希廣權軍府事時越希範薨之四日乙未也七月甲午漢封爲楚王

恭孝王

名希萇殷第三子既害希廣遂自爲楚王時漢乾祐三年爲南唐保大八年十一月丁未也保大九年二月入質於唐三月唐以爲楚王九月戊寅同母弟希崇指揮使徐威作



亂執希萼幽於衡山縣希崇既襲位國人不附復立希萼為衡山王希崇求援於唐唐命邊  
鎬將兵趨長沙十月鎬入醴陵遂趣希崇入朝十一月辛酉盡遷於唐辛未鎬遣先鋒李承  
戩將兵如衡山趣希萼入唐十二月唐仍賜希萼爵楚王以希崇為  
節度使數年希萼薨於金陵諡恭孝希崇率兄弟十七人奔於周

列傳

張 佖

許德勳

鄧進忠

姚彥章

秦彥暉

王 環

王 贊

李 瓊

呂師周

廖光齊

彭 玕

劉昌魯

鄧處訥

龐巨昭

彭師鬲

劉 言

王 達

周行逢

何景真

張佖

佖京兆長安人少通經史咸通初以明經中第累遷宣州從事秦彥牧宣城陰養亡命將圖江淮而兇暴  
多忌不為吏民所信佖慮其害已乃辭疾去職將歸京師至汝陽值秦宗權阻兵佖往依之宗權與語大  
悅署為行軍司馬會宗權叛遣眾四出屢為梁祖所破佖謂劉建鋒曰今天下方亂英豪角逐吾觀秦公  
剛鷲猜忍終不能濟大事梁王軍政精明將士悉力一旦全師奄至吾等無類矣不如早自為謀建鋒孫  
儒俱從儒殺宗衡自領其眾以佖為行軍號令嚴肅眾皆憚之及破楊行密佖有力焉行密遂趙錙據宣  
州儒與建鋒領眾西上將討行密建鋒謂佖曰今與孫公權全軍為公刷恥於宣州如何佖唯唯謝之於  
是儒盡焚維揚積聚驅其民人大屯廣德將先平行密而後北渡及圍宣州糧道阻絕士卒大疫乃為行  
密所破佖與建鋒率餘眾據湖南推建鋒為帥建鋒多私狎每飲酒部曲間有長直兵陳瞻者其妻有殊

色。建鋒通之。瞻怒。以鐵搗置袖中。擊殺建鋒。建鋒將吏推佶爲帥。佶將入府。常所乘馬忽隄。嚙不止。正中佶。婢仆地不能起者久之。時殷征。蔣助於邵州。佶謂其將吏曰。吾非汝主。當迎馬公爲之。於是礫陳瞻於東市。遣姚彥章等迎殷。及殷至。佶乘肩輿入府。受其拜謁。訖命殷升廳。佶卽降階。率將吏拜賀。請代殷攻邵州。梁開平中。奏授佶朗州永平軍節度使。累遷檢校太保。同平章事。乾化初。移鎮桂林。卒於治所。子少敵。有武略。事殷爲軍校。希範襲位。遷永州刺史。天福中卒。卷一萬八千一百三十七第十頁

### 許德勳

德勳。蔡州朗山人。少爲縣吏。好讀書史。任氣不羣。秦宗權據淮西。德勳往依之。擢爲左軍判官。與殷同在帳下。有州里之舊。情好款洽。從孫儒討揚州。以德勳爲蹋白都指揮使。時淮上饑饉。德勳所至必先固圉。廩以待。儒謂左右曰。成吾事者。許蹋白也。自是軍中謀議。皆得預焉。及儒敗於宣城。與劉建鋒同入湖南。以軍功。奏授檢校太傅兼侍中。殷代立。以德勳爲內外馬步軍都指揮使。乾寧四年。淮南楊行密遣使來通好。以梁祖擅朝政。願與殷爲兄弟之國。以絕梁。殷欲許之。德勳諫曰。行密盜據淮甸。抗衡中國。明公義修職。貢於朝。爲附庸。一旦棄之。前功盡廢。他日朝廷問罪江表。以我爲同惡。卽王師先至湖上矣。不如拒絕之。乃心王室。久長之策也。殷從之。天復中。淮人攻鄂。杜洪求救於朝廷。詔發荆湖澧朗兵以援之。殷遣德勳與秦彥暉率舟師東下。時荆南成汭。知梁祖將篡。曲意事之。乃自擁衆乘巨艦直抵夏口。爲淮人所敗。汭溺死。德勳遂與朗州雷彥恭襲破荆南。盡俘其府實及士女。伶倫工巧之徒。凡數千人以歸。天祐二年。又領兵略地荆南。還經岳州。刺史鄧進忠以城歸附。遷岳州刺史。梁開平初。淮將冷業寇平江。以德勳

爲東面行營步軍都指揮使。去淮軍五里下營。業以遊騎偵邏。晝夜不絕。德勳選習水者五十人。斬木取其枝葉戴之。各持長刀。浮江而下。夜犯業營。令舉火爲號。俄而營中擾亂。自相蹂藉。火舉。德勳以勁兵奄至。大敗淮軍。斬首千餘級。擒業及裨將二十餘人。以歸。天咸中。淮將王彥章。苗倫等寇岳州。舟師萬餘人蔽江而下。屯君山側。殷遣德勳率艫艫戰艦千艘以禦之。德勳謂諸將曰。淮人遠來。掩吾不備。今若以全師臨之。必懼而遁矣。乃潛師屯角子湖。偃旗臥鼓。夜遣裨將王環以戰艦二百斷楊林浦。絕其歸路。淮人覺之。遲明。淮人移軍荊江口。將會荆南兵。合攻岳陽。德勳選輕艦三百。令裨將詹信先襲淮人。且行且戰。德勳擁艫艫自後而至。大戰荊江中。淮人大敗。斬首千餘級。溺死者甚衆。擒彥章及倫以歸。而行密遣使來行成。且請二將。殷以禮歸之。遣德勳餞彥章等。德勳謂之曰。楚國雖小。舊臣宿將尙在。願公此歸。勿以湖南爲念。若須得志。當待馬子爭草。然後可圖也。彥章等媿謝而去。是後馬氏諸子果爭立。爲江南所滅。人以德勳爲知言。天咸二年。殷建國。拜右相。卒年七十餘。子可瓊。

卷一萬八千一百三十七第十頁

### 鄧進忠

進忠。湘陰人。世爲土豪。兄進思。唐中和初。爲瀏陽鎮將。黃巢之亂。江湖荒饑。進思陰養死士千人。以防寇盜。會巢弟黃浩領惡少數千。剽劫江左。號浪宕軍。轉入湖外。大掠瀏陽。進思患之。乃與進忠謀。率壯士伏山塚間。候浩軍半過。橫出擊之。浩軍大敗。前後皆遁走。浩僅以身免。縣以事聞於州。奏授進思岳州刺史。天復中。進思卒。進忠襲位。天祐二年。許德勳襲荆南。回出戰。艦臨其城。進忠遣人獻牛酒。開門納德勳。大享將士。德勳諭以禍福。翌日舉族南歸長沙。賜進忠鞍馬。繒帛金銀器。令權知衡州軍州事。未幾。奏授刺

史同光中卒。卷一萬八千一百三十七第二十頁

### 姚彥章

彥章字繼徽。汝南人。少儻。有武略。乾符中。黃巢盜起。秦宗權召募豪俊。以彥章隸帳下。善用鐵槊。重百餘斤。每上馬盤辟。疾如旋風。觀者壯之。隨孫儒渡淮。拔廣陵。儒死宣城。隨劉建鋒入湖南。領廳直軍。最被親信。及建鋒遇害。張佶傷髀。不能視事。佶與彥章首議迎殷。遂遣彥章率所部逆殷於邵州。殷初疑之。猶豫未即還。彥章入白殷曰。劉龍驤張行軍。與足下同功一體之人也。不幸龍驤有不測之禍。行軍以髀病廢。是天意人望歸於足下。何遽疑也。殷釋然。遂令彥章統衆先歸。國內既定。翌日殷至。代立。以功遷長直都指揮使。彥章建議平嶺北七州。薦李瓊爲游奕使。桂州平。奏授靜江軍行軍司馬。監軍府事。遷檢校工部尙書。橫州刺史。容南龐巨昭歸款。彥章率兵迎之。遷寧遠軍節度副使。知容州事。殷建國。拜左相。遷昭順軍節度使。清泰中。加兼侍中卒。卷一萬八千一百三十七第十一頁

### 秦彥暉

彥暉上蔡人。宗權之族弟。父轍。仕郡爲牙校。彥暉少伉勇。有智略。宗權將敗。族人懼禍。彥暉請隨族兄宗衡討揚州。宗衡爲儒所害。彥暉從儒攻宣州。儒敗。又從劉建鋒入湖南。爲捉生指揮使。光化中。殷將平嶺北。以彥暉及李瓊爲七州游奕使。率兵平桂林。虜劉士政。以功奏遷檢校太保。天祐末。淮將劉存勳威鎮戰棹。攻湖南。殷以彥暉爲在城都指揮使。領兵三萬以禦之。彥暉潛艘艫於上流。以待淮人。又遣副指揮使黃璠分戰棹三百艘潛瀏陽口。存以舟師至。越隄。屢戰不利。乃遣使送書於殷。以請和。殷欲許之。彥暉

曰。淮人多詐。將緩我師而爲變。不可信也。使者回以其言白存。時彥暉與存對水爲陣。存登岸遙呼彥暉曰。我降矣。而公弗許。古人有言。殺降不祥。公豈不爲子孫計。彥暉怒曰。賊踞吾城下而不擊。奚顧子孫耶。乃鼓譟齊進。淮人遁走。黃璠自瀏陽口列戰艦橫絕大江。合擊之。淮人大敗。擒劉存。至夕。劉威以輕舸遁去。彥暉親戮其裨校百餘人。以功奏加檢校太傅。開平三年。領兵攻朗州。殺其將區景思。擒節度使雷彥恭。及其宗屬雷彥雄等七人。以歸朗州。平遷道州刺史。乾化中代歸卒。卷一萬八千一百三十七第十二頁

王環

環。許州人。少隸忠武軍。秦宗權據淮西。以環有勇力。召置帳下。後與劉建鋒從孫儒渡淮。儒死宣城。又隨建鋒入湖南。爲捉生指揮使。剽略郡邑。先登陷陣。衆推其果毅。建鋒死。殷代立。遷水軍都指揮使。略地上高。擒淮將劉靖。奏授檢校司徒。貞明初。徙岳州刺史。許德勳以舟師巡境上。夜中南風暴起。環乘風鼓棹。直抵齊安城中。纜四鼓矣。環挂繩梯登城。殺守卒十餘人。引戰士直入州廡。擒刺史馬鄴。遲明城中驚擾。德勳乃驅其官屬將吏。寘入舟中。大掠而歸。至纜口。德勳謂環曰。鄂人其邀我乎。環曰。我師入黃州。而鄂人不覺。今奄至城下。迅雷不及掩耳。當自救無暇。安能邀我。乃展旗鳴鼓。成列而行。鄂人不敢出。至岳陽。以所俘獻。殷大喜。奏以環領黃州刺史。天成初。史光憲自京師還。爲荆南高季昌所執。奪明宗所賜名馬妓女。殷遣環與袁詮。詹信率戰艦三百艘討之。大略於境上。季昌遣將屯劉郎汭。環進兵擊破之。奪戰艦百餘艘。遂逼荆渚。季昌懼請和。取光憲以歸。殷建國。以環爲左六軍副使。長興二年卒。環善治舟師。能以寡擊衆。布衣糲食。與士卒同甘苦。每戰罷。必盡索傷者扶至帳前。手自療治之。鍼鈎鈐夾。名膏上藥。常置

坐右殷每部分諸將使之出征士卒得隸環麾下者咸相賀曰吾輩不畏死但獲居王六軍隊伍中足矣其爲士卒所愛如此。卷一萬八千一百三十七第十二頁

### 王贇

贇事希範爲衡山指揮使時十五餘年境內無事但以所部營飾宮室剏修佛廟而已贇求自試乃以爲岳州刺史乾祐初希萼率兵攻湖南希廣以贇爲都部署率衆禦之敗朗軍於僕射洲奪戰艦三百艘希萼奔歸武陵密遣人以珍幣通好於贇贇拒而不答三年希萼復大舉兵攻長沙路由岳陽贇堅壁自守希萼不敢逼遣人謂贇曰比約與君同行今何異心也贇曰大王兄弟尙不相容何責將吏之異心也願大王入長沙無傷同氣臣守岳陽敢不盡臣節希萼感其言及篡位奏授贇永州防禦使淮將邊鎬據湖南有占者云王氏繼馬氏時議以贇有世功當應其識鎬白於李璟乃授贇鎮南軍節度使賜襲衣巾帶以毒冥巾帽中未幾贇腦裂而卒。卷一萬八千一百三十七第十二頁

### 李瓊

瓊蔡州汝陽人少以饒勇選隸秦宗權帳下後隨孫儒渡淮儒敗又從劉建鋒入湖南爲親從都裨校殷代立遷本軍指揮使時湖外初霸土宇未廣議者復請窺取嶺北七州之地乃命瓊與秦彥暉爲七州游奕使張國英李唐爲之副兵克永道郴連四州因水陸齊進屯全義嶺時桂州劉士政遣副使陳可璠營嶺下指揮使王建武營秦城以拒我師彥暉三戰不利會全義民請爲鄉導瓊詰之對曰此去西南有古路背嚴關抵秦裁五十里雖生荆棘可通單騎瓊乃白彥暉請以步卒三百騎兵六十以巨槊長劍銜枚

夜襲秦城。至建武營纔三鼓矣。時營中士卒不虞我師之至。皆熟寢。令騎兵分布柵外。自以牛革蒙柵門。踰入士卒隨之。營中亂。自相蹂躪。斬首百餘級。衆遁走。擒建武而歸。遲明至大寨。係建武以素練。示可璠。營中可璠不知我師已破秦城寨。猶鼓譟未信。乃斬建武。投首營中。士卒震駭。彥暉因其驚擾。以全軍擊破之。擒可璠。降其將吏二千餘人。欲部送歸湖南。瓊曰。我以七千人討桂林。若分兵以送降者。前有大敵。何以當之。此敗軍烏雜。其心不一。不如殺之。以全軍直趨桂林。此席卷之勢也。於是盡坑降兵。自秦城以南。猶有二十餘柵。皆迎風而潰。瓊以先鋒兵躡之。比至桂林。殺戮萬計。遂圍其城。九日而士政降。彥暉班師。殷以瓊爲桂州刺史。令經略嶺南。遂襲容州。降龐巨昭。明年又與呂師周克韶賀梧三州。瓊魁岸多力。每食肉十餘斤。踞案大嚼。眈眈然。軍中號曰李大蟲。先是桂林兒童聚戲衢路中。忽相驚走。曰。大蟲來。大蟲來。至是果應。瓊治桂州三年。招納逋遁。法令寬簡。吏民便之。開平中卒於治所。年六十八。卷一萬八千一百三十七

第十  
三頁

呂師周

師周。廣陵人。吳將蒙之裔孫也。父珂。少以勇敢隸楊行密帳下。累戰有功。遷黑雲都指揮使。師周少勇敢。任氣。隨父征討。臨陣未嘗介甲。金創被體。而談笑自若。衆皆服其果毅。珂卒。行密令代其父爲指揮使。天祐初。副指揮使綦母章以所部兵屯上高。與湖南爲敵境。累戰殺傷者萬餘人。遷袁州刺史。師周性豪率。頗通緯候及兵書。自言世將家子。不可保富貴。每恣爲杯酌。狎客常十餘。醉必起舞。或擊節狂歌。慷慨泣下。行密聞而疑之。密遣人偵其動靜。師周不自安。乃謀於綦母章曰。吾與湖南對壘有日矣。觀其營上雲。

氣常紛紛然未易敗也。馬公寬仁待士有禮。吾欲逃死焉。公以爲如何。章曰。公自圖之。章舌可斷而言不洩也。乃遣牙將呂蔚通款於我。開平初。以所部兵大獵境上。因歸於湖南。章縱其親隨之人。殷聞師周至。甚喜曰。吾方圖嶺表。得師周足矣。卽以爲步軍都指揮使。領袁州刺史。明年率兵攻韶賀梧象龔富等州。與劉隱兵十餘戰而克之。奏授韶州刺史。乾化中。領兵破飛山蠻。斬其帥潘全盛。諸蠻悉歸款。奏遷檢校太傅。清泰中卒。卷一萬八千一百三十七頁

### 廖光齊

光齊有武幹。事殷爲決勝副指揮使。天成末。從許德勳討荆南。屯兵沙頭。高季昌之子從嗣。爲雲猛指揮使。驍勇無敵。一日單騎薄德勳營。衆不敢出。光齊怒。言於德勳曰。此驍也。請爲公擒之。乃介馬援槍而出。與從嗣格鬪良久。光齊僞墮馬。從嗣奪搥以擊之。反爲光齊所擒。時季昌以數十騎觀於臺上。見其子被擒。亟令騎士來請。及入營。光齊已拉殺之矣。季昌大恟。翌日遣使請成。光齊以功遷決勝指揮使。性簡傲。使酒。因爭酒令。毆同列。黜爲邵州教練使。未幾復舊職。討溪州蠻。中流矢而卒。卷一萬八千一百三十七頁

### 彭玕

玕。吉州廬陵人。世居赤石洞。爲酋豪。黃巢之後。江表寇盜蜂起。玕於鄉里。保聚徒衆。得數千人。自爲首領。捕逐羣盜有功。本州補玕。永新制置使。玕雅好儒學。精左氏春秋。當兵荒之歲。所在饑饉。玕延接文士。曾無虛日。治具勤厚。人多歸之。廣陵筆工李鬱者。善爲詩什。玕嘗貽書於鬱。以白金十兩市一筆。又令鬱訪石本五經。卷以白金百兩爲直。廣陵人相謂曰。玕以十金易一筆。百金酬一卷。況得士乎。於是蕭謨等數



人咸往依之。鍾傅據江西。其裨將韓德師叛。傅令其弟瑊攻破之。斬獲甚衆。軍政嚴肅。樵採不犯。傅以瑊爲吉州刺史。未幾以玠代之。玠以傅爲輔車之勢。會傅死。楊行密將攻破豫章。虜鍾匡時。玠懼。將圖據湖南。先遣其黨敖瞻李緒來致書於殷。且覘殷之起居。殷勞之。翌日大宴府中。將吏畢集。以瞻爲上客。瞻等歸。以語玠曰。馬公龍髯鳳眸。大人之表。其將吏輯睦。少長有禮。未可圖也。玠默然。開平中。撫州危全諷率袁吉之兵。以復豫章。至象牙潭。淮將周本擊破之。玠乃以所部并其族千餘人歸款於我。殷發兵境上。援其輜重。至卽奏授郴州刺史。隴西郡公。以希範聘玠女。天成中。玠卒。年七十三。兄鄴。弟瑊。子繼英。繼勳。一卷

劉昌魯

昌魯。字安國。相州鄴縣人。唐末明經登第。釋褐項城主簿。累遷至尙書郎。乾符中。出爲高州刺史。黃巢寇嶺南。郡縣離析。昌魯使其居民據保障。以自守。一境獲安。就遷防禦使。劉隱入廣州。遣其弟襲領兵攻高州。昌魯率勵丁壯。逆戰於城外。大破襲軍。自以地小力寡。終慮爲隱所吞。開平初。乃致書於殷曰。僕昔占籍鄴中。受恩唐室。蒞高三歲。遏黃巢之亂。收合生齒。堡於涼山。因深爲塹。憑高作壘。攻苦食淡。以勸士卒。洎盜賊平定。一境獨全。高涼之民。至今相戴。而中原多故。嶺南不賓。劉隱亂常。僭興師律。舉蠻貊之衆。成吞噬之心。僕嘗訓勵甲兵。躬當矢石。掃壘一戰。劉巖遁走。雖仗義者必勝。恃力者必亡。然而山越之人。瘡痍衆多。殘民以逞。所不忍爲。昔古公去豳。寶融歸漢。千古之下。迭爲推美。僕雖顛愚。景慕前烈。竊惟明公負江湖之固。有桓文之業。土宇至廣。仁風素厚。願以所部歸款於執事。謹刺血染翰。上達誠悃。惟明公圖

之殷覽書甚喜。卽遣指揮使張球率兵迎之。昌魯盡輦其帑庫。及士卒千餘人。歸於湖南。奏授永順軍節度副使兼行軍司馬。天成中卒。卷一萬八千一百三十七頁第十五頁

### 鄧處訥

處訥。邵州龍潭人。少爲州兵。累遷至軍校。唐乾符中。從閔頊征蠻於安南。黃巢之亂。盜殺潭州觀察使李巢。城中無主。會頊自安南回。以所部兵駐郡中。傳檄諸州。同捍寇盜。境內以安。遣使奉表於朝。詔以頊爲檢校右僕射。欽化軍節度使。潭州刺史。處訥從頊久在安南。及是欲歸邵州。省其親族。頊回署處訥爲邵州兵馬留後。未幾衡州刺史周嶽舉兵襲頊。殺之。因據長沙。處訥縞素發哀。召集將吏諭之曰。閔僕射駐軍長沙。親捍寇盜。布衣糲食。以養士卒。救民於塗炭。恩德厚矣。不幸爲鼠輩所圖。今欲與諸軍問罪於周嶽。可乎。衆皆曰。留後爲善人。雪冤敢不從命。乃以精卒二千襲嶽。殺之。梟首於東市。遂據其城。慰撫將吏。中外胥悅。時景福二年也。旣而州人以狀聞於朝廷。詔以處訥爲湖南節度兵馬留後。乾寧元年。劉建鋒領衆自豫章至。處訥遣其鄉豪首蔣助等領步卒三千斷龍回關。殷先至關。召助等諭以禍福。仍許奏授官秩。助衆皆喜。是夕乃棄鎧甲。旗幟潰邵州。明日建鋒令前鋒兵盡被邵軍鎧甲。張旗幟直趨潭州。薄城東門。守陴者不之覺。且謂邵軍之回也。門啓。前鋒兵徑趨府中。將吏驚走。是日處訥內府宴集寮屬。而無備禦。裨將宋全節就擒。處訥斬於長史橋側。卷一萬八千一百三十七頁第十八頁

### 龐巨昭

巨昭。不知何許人。唐末爲容州觀察使。精天文緯候之學。黃巢入廣南。巨昭括部內諸蠻。得數千人。親自

選練分屯險隘。巢寇憚之。不敢犯其境。以功加寧遠軍節度使。開平初。高州劉昌魯率衆歸附。殷遣姚彥章。李瓊率兵迎之。長驅而南。前鋒至容州。巨昭將歸款於我。乃大享將士而謂之曰。李瓊甲馬雄盛。乘席卷之勢。必來侵我。何策以禦之。裨將莫彥昭對曰。瓊軍遠來。士卒疲乏。請盡徹儲糧。潛兵山谷。空城以待之。瓊至。當據吾城外。無救援。我以全師掩其不備。浹旬之間。瓊可擒也。巨昭曰。吾觀楚氛甚銳。未易破也。不如以牛酒犒其軍。爾輩不失爲富家翁足矣。彥昭不從。巨昭殺之。迎勞瓊。瓊以軍徑赴城中。俄而廣南劉隱率衆來。我師不能守。於是盡輦其府實。驅其人民以歸。巨昭挈其族數百口隨歸長沙。般久聞巨昭之名。遣使慰勞。卽日奏授檢校太傅。領容管經略使。巨昭在嶺南。嘗占翼軫間有善星。因謂所親曰。劉隱兄弟不道。殘害良善。吾終當逃難於長沙。至是果歸附。人或問湖南與淮南國祚長短。巨昭曰。吾入境來。聞童謠曰。三羊五馬。馬子離羣。羊子無舍。自今以往。馬氏當五主。楊氏當三主。後皆如其言。貞明中卒。

七十六

卷一萬八千一百三十七第十九頁

彭師嵩

師嵩。溪州人。世爲諸蠻酋長。父士愨。唐末溪州刺史。其地西接牂牁鬱林。南抵桂林象郡。東北控澧朗。方數千里。山水險惡。舟車不能通。其蠻有六種。盤氏爲大。卽槃瓠之種也。俗無文法。約束繫於酋長。當士愨之世。昆弟強力多積聚。故能誘脅諸蠻皆歸之。統兵萬餘人。春夏則營種。秋冬則暴掠。而長沙四境最被其惡。天福五年。士愨遣使通款於蜀。且請兵同寇澧朗辰三州。大掠縣邑。希範遣指揮使劉勅。勅劉全明率衡山步卒五千人以救之。勅等擊敗其兵。士愨遁去。遂進兵襲溪州。州在山頂爲堡。四面斗絕。勅選壯士

緣崖梯山縛棧道以圍守之士。愍夜舉烽火以集蠻軍。勅於溪澗中置毒。蠻軍至飲其水者皆病。嘔不能戰。死者甚衆。一日南風暴起。勅以火箭射堡中。盡焚其廬舍。蠻軍多死。士愍乃率所部夜踰絕險遁入獎州。遣師曷率諸蠻酋長田汧賀覃行方向存祐羅君富等。攜牌印納款於勅。勅班師。與師曷等歸長沙。釋其罪。厚賜而遣之。奏授士愍溪州刺史。兼溪洞招撫使。以師曷補武安軍牙校。師曷有勇力善射。累從諸將征討有功。遷衡山指揮使。希廣襲位。改強弩指揮使。領辰州刺史。希萼舉朗州之衆以攻湖南。列戰棹於水西。軍勢甚盛。師曷登城觀之。白希廣曰。朗人驕而輕。雜以蠻兵。其勢易破。請假臣步卒三千人。南自巴溪渡江。趨嶽麓。後夜擊之。請令許可瓊以舟師陣於山前。破之必矣。希廣因與可瓊謀。堅沮止之。翌日師曷見可瓊於軍門。坐談戰事。師曷瞋目叱之曰。汝反文在面。即日當投賊。何庸論戰耶。拂衣而去。乃白希廣。請誅可瓊。希廣不從。師曷退而歎曰。禍亂如此。王稔惡無斷。敗亡可待矣。及朗軍攻長樂門。可瓊果束甲以入於賊城。陷。師曷被擒。希萼命釋之。師曷溪洞人性獷直。不喜阿附。屢爲希萼以罪笞責。及希崇篡立。令師曷衛送希萼囚於衡山。欲使殺之於路。而師曷奉事彌謹。終以保全。因與指揮使廖偃同謀。立希萼爲衡山王。後隨希萼歸江南。李璟聞其忠節。擢爲殿直都指揮使。後卒於金陵。

卷一萬八千一百三十七第二十頁

### 劉言

言。吉州廬陵人。少事彭玕爲伍長。以勇悍聞。開平中。玕納款於湖南。言從歸長沙。希範卽玕之壻也。出鎮朗州。召言爲牙校。及希範襲位。溪洞酋長多求款附。乃以言知辰州軍事。以鎮撫諸蠻使之。未幾。奏授辰州刺史。希萼入湖南。百役繁興。靜江軍指揮使王逵周行逢叛歸朗州。初。希萼令其子光贊爲朗州留後。

達至廢之。以馬希振子光惠權軍州事。光惠庸懦。不能馭羣下。但酣鬻淫戲而已。將吏患之。達等懼亂。遂與行逢謀。遣人往辰州請言爲副使。言素知達等兇暴。謂其徒曰。南方禍亂方始。今若不往。必加於我矣。於是留書所部。以單騎行。達等遂廢光惠。推言權留後事。時周廣順元年也。言旣立。遣使詣闕上表。又遣使納款於李璟。求授節鉞。璟未之許也。會希崇逐希萼而自立。請援於江南。璟遣其將邊鎬率師入長沙。盡俘馬氏之族歸於金陵。二年冬。璟又下詔召言入覲。言不行。因令副使王逵行軍司馬何景真指揮使張傲。蒲公益。朱全琇。宇文瓊。周行逢。彭萬和。潘叔嗣。張文表等。號十指揮使。同率兵攻湖南。逐邊鎬。鎬奔歸江南。言乃以達權知潭州軍府事。遣使詣闕上表。且言逐江南賊軍。復馬氏土疆之意。周太祖遣使來宣慰。三年正月。言又遣使上表。以長沙經兵火焚毀。請就以朗州爲治所。周太祖下詔升朗州爲大都督府。在潭州桂州之上。以言爲檢校太師。同中書門下平章事。武平軍節度使。逵爲潭州刺史。武安軍節度使。景真爲桂州刺史。靜江軍節度使。指揮張傲而下。並領刺史爲節度副使。或行軍司馬。皆言奏請之也。是月。又遣牙校張崇嗣。置邸京師。歲時修貢。周祖下詔賜言。舊屬湖南在京及諸處莊宅邸店。時王逵爲節度使。周行逢爲行軍司馬。專制湖南。威雄漸盛。言懼其爲變。將圖之。逵與行逢謀。先六月。逵率所部兵入朗州。殺言部將鄭政。收言囚於別館。誣奏言與江南通。謀誘引淮賊并潭朗之地。以歸金陵。八月。周祖下詔奪言官。勒歸私第。委逵以便宜安置。復下詔令逵歸治潭州。乃以潘叔嗣權知朗州軍府事。未幾。令叔嗣殺言於武陵。初。民間謂爲劉黻牙。馬氏將亂。湖南有謠言曰。馬去也。不用鞭。黻牙過今年。及邊鎬入長沙。盡俘諸馬歸金陵。鎬尋爲王逵所逐。奔歸江南。是歲。言亦爲叔嗣所殺。皆其驗也。

王逵

逵朗州武陵人。或名進逵。少以驍勇選爲靜江兵。希萼入朗州。累遣討賊有功。遷本軍指揮使。乾祐三年。希萼攻湖南。令逵領戰棹爲前鋒。陷長沙。希萼旣立。逵有力焉。時剽掠之後。城中帑庫盡以焚毀。賞賜不足。又重構府署。執役者皆靜江士卒。相與怨憤。聚而謀亂。副指揮使周行逢聞之。以告逵曰。士卒怨懟深矣。不早爲計。難將及我。是夕乃擁其衆以長柯巨斧。斬關以出。遂歸武陵。時希萼方醉。遲明始遣裨將唐翥領兵追之不及。因徑趨朗州。士卒皆重趺。不復成列。逵先已入城。伏卒門下。翥至。逵縱兵擊之。翥軍大敗。追殺殆盡。翥僅以身免。逵乃逐留後馬光惠。請辰州刺史劉言爲帥。未幾長沙兵亂。指揮使徐威等廢希萼而立其弟希崇。囚希萼於衡山。行軍司馬廖偃與指揮使彭師鬪。共立希萼於衡山王。將納之。希崇懼。納款於江南。且請兵爲援。李璟遣其將邊鎬率師入長沙。盡遷馬氏之族歸於金陵。璟以鎬爲武安軍節度使。又遣將劉仁贍率師取岳州。鎬將圖朗州。密白璟請召言入覲。言不行。謀於逵曰。江南召我不往。必加兵於我矣。爲之奈何。逵曰。鎬之此來。以制置潭朗爲名。公如東行。正入其算。武陵負江湖之阻。帶甲萬衆。乃欲拱手臣異姓乎。鎬新至長沙。經略未定。乘人心憤怨。引兵攻鎬。可一鼓而擒也。言然之。乃遣與何景真等同起兵於武陵。號十指揮使。以攻邊鎬。逵率舟師南上。至長沙。邊鎬大駭。以所部奔歸江南。諸州屯守皆罷去。盡復湖外之地。時廣順二年冬也。逵遂據長沙。與劉言同遣使上表於朝。三年正月。周祖下詔褒諭。以逵爲武安軍節度使。逵出於行陣。本無鈴略。不能馭羣下。時諸指揮使受詔爲節度副使者。數人各留長沙。各置牙兵。分廳案事。軍政淆亂。將吏患之。每宴集府中。喧呶如市。逵莫能禁止。會廣兵乘

間盡取梧桂郴連之地。達率衆南征。敗於壕石而還。時何景真朱全琇同在武陵。與劉言不協。各謀爲亂。言又以達專制湖南。慮其難制。將并長沙之地。達大懼。因與周行逢謀。召景真全琇領兵討桂林。至皆殺之。又殺張傲於府中。景真之姻也。乃率所部兵襲武陵。幽言於別館。誣奏言欲併潭朗歸款於江南。周祖下詔委達以便宜處置。達旣殺言。遂移治武陵。時顯德元年也。世宗下詔以達爲武平武安等軍節度使。三年世宗征江南。詔達爲南面行營都統。以所部兵逼鄂州。攻其長山寨而還。復領衆逼宜春。道出長沙。耀兵金波亭。有蜜蜂集繖蓋中。占者以爲不利。遂留長沙。令行營副使毛立領兵南下。以潘叔嗣張大表爲前鋒。叔嗣怒。至澧陵擁衆而還。達聞兵叛。乃乘輕舸奔歸武陵。叔嗣追殺之於朗州城外。卷一萬八千一百三十七

第十  
六頁

周行逢

行逢。武陵人。少無賴。與王逵同里。俱爲靜江兵。事希萼爲小校。從希萼攻湖南。陷長沙。靜江軍叛。隨逵入朗州。破追兵於城門下。殺千餘人。逵攻邊錡。令行逢領步率趨益陽。拔其寨。殺江南兵二千餘人。擒其將李建期。逵平湖南。周祖下詔以行逢爲集州刺史。充武安軍節度使。行軍司馬。劉言將并潭朗。逵聞而憂之。以語行逢。行逢曰。言本江西反徒。景真全琇。今俱暴無職。相與爲亂必矣。會廣南兵寇全義。行逢乃與逵密謀。白於劉言。請以景真爲南面行營招討使。全琇爲先鋒。令會兵於湖南。比至皆殺之。逵攻劉言於武陵。以行逢權知潭州軍府事。顯德元年。世宗下詔以行逢爲武清軍節度。知潭州軍府事。逵奉詔領軍征宜春。至長沙不行。遣副使毛立潘叔嗣張文表統衆南伐。行逢久專湖南之務。頗任威刑。逵屢以言規

之行逢不悅。叔嗣又怒達卽安。而令已赴難。頗出怨言。叔嗣將行。行逢餞之。泣曰。吾不見師之入也。叔嗣懼。至澧陵。邑吏請以牛酒犒師。毛立不許。士卒皆怒。叔嗣乃與張文表械立送於行逢。明日擁衆回長沙。叔嗣旣殺達。乃迎行逢歸治朗州。行逢至。懲王達之亂。斬叔嗣以徇。遂自領兩鎮留後。遣使奉表。詔以行逢爲朗州大都督。武平軍節度。制置武安靜江等軍事。乃表宇文瓊爲武清節度使。張文表爲衡州刺史。領親衛都指揮使。彭萬和爲永州防禦使。觀察判官李觀象通判軍府事。釋毛立爲水軍都指揮使。行逢旣得志。恣行誅戮。達之子弟及門將吏死者百餘輩。性猜忌。每遣人伺察郡縣守宰。有聚飲偶語者。必逮捕下獄。以謀反誅。宇文瓊彭萬和與行逢族兄飲酒。疑其謀叛。夜遣甲士圍其第。盡擒殺之。麾下之人皆重足脅息。五年朝廷遣使儲魚鹽於境上。行逢懼。乃繕治戎器。增築城壁。閱諸州鄉兵。大修武備。皇朝建隆三年以疾卒。年四十六。葬武陵之肩山。子保權嗣。行逢性殘忍。然爲治嚴整。不徇私黨。躬履儉約。以率羣下。辟署官吏。必取廉介之士。條教簡約。民甚便之。有女壻求補吏。不許。給以耒耜而語之曰。吏所以治民也。汝才不能任職。豈敢私汝以祿。姑歸墾田。以自治也。其妻嚴氏不入府署。躬率奴僕耕織。以給賦調。人民化之。率務稼穡。四五年間。倉廩充實。尤崇信釋氏。常設大會齋。緇徒畢集。行逢徧拜之。捧旒執帔。親侍湔洗。因謂左右曰。吾殺人多矣。不假佛力。何以解其冤報乎。

卷一萬八千一百三十七第十七頁

### 何景真

景真。武陵人。少以強勇隸朗團軍。希萼入朗州。署步軍都指揮使。乾祐三年。希萼攻湖南。命景真率步騎三千出竹柵。屯兵楊柳橋。以逼其城。湖南指揮使韓禮率步騎五千陣於橋。而景真登橋望之。見旗幟不



整曰。此非我敵也。乃縱兵擊之。潭人大亂。奔入城中。禮被破傷。至其家而卒。明日城陷。希萼之攻長沙也。以其子光贊守武陵。至是既平湖南。乃以景真爲朗州衙內指揮使。以翊光贊。王逵周行逢叛於長沙。以所部兵奔歸朗州。廢光贊。奪其印綬。而立馬光惠。景真不能拒。後又與王逵同請劉言爲帥。會希崇逐希萼而自立。請援於江南。邊鎬率師入長沙。劉言王逵同謀逐鎬。乃結景真爲十指揮使。率舟師同攻湖南。鎬遁走。奏授景真檢校太尉。靜江軍節度使。景真求歸治所。言不許。留於長沙。與王逵不協。求歸朗州。許之時。劉言已爲使相。景真不能下之。每使酒悖慢。言不勝其忿。且意王逵等遣景真伺己也。將誅逵。景真亦欲殺言。以據朗州。事未及發。逵皆偵知之。因與周行逢密謀。將先誅景真。後圖劉言。會廣南兵入境。因僞召景真爲招討使。會兵於長沙。景真卽日以牙兵百餘人徑往湖南。逵迎勞於郊。相見甚歡。館於馬氏之故第。宴飲彌日。多選妓女。寢帳幄中。景真留連月餘。逵乃遣人僞自朗州來者。傳劉言之命。就詰景真曰。邊寇搶攘。委公以戎事。公耽淫縱酒。遲留不發。太師以公觀望。命械公歸西府。時景真已醉。恇恍不知所爲。乃俛首就縛。送朗州。殺之於路。

卷一萬八千一百三十七第七十八頁

九國志卷十二

北楚武信王於梁開平元年據有荊州旋得歸峽至  
宋乾德改元國除傳襲四世五帥凡五十七年

世家

武信王 姓高名季興字貽孫陝州硤石人本名季昌避後唐諱更名初隸朱友讓得見全忠復

亡入觀於後唐同光二年三月丙午封南平王天成二年因掠唐所部送蜀貨削官爵乾亨

二年六月稱藩於吳是年十二月丙辰薨年

文獻王 名從誨字遵聖季興長子既襲位吳以為節度使懼唐見討復修職貢時為嗣位之明年

渤海王應順元年正月改封南平王荆南介於吳楚自吳稱帝而南漢閩楚皆修貢中原假

道境上自季興以來常遊掠貨物諸道移書謂貴即復還之無慚色其後南漢與閩稱帝從

貞懿王 名保融字德長從誨第三子漢乾祐元年十二月丁丑漢以為荆南節度使周廣順元年

宋加諡

侍中 名保融字省躬從誨第十子保融同母弟也保融即世宋

侍中 名繼冲字成和保融長子保融既歿宋以為荆南節度使乾德元年二月宋師至納土

九國志 卷十二

列傳

李景威

李景威

景威。公安人。幼隸於軍。頗有智略。累以戰功遷雲猛指揮副使。保勗以爲衙內兵馬副使。繼冲嗣立。多委任之。初聞慕容延釗等伐張文表。景威乘間見繼冲曰。今王師雖稱假道以收湖湘。然觀其勢。恐因而襲我。景威欲效犬馬之力。願假兵三千人於荆門中道險隘處設伏。候其夜行發伏攻其上將。王師自必退却。回軍收張文表。以獻於朝廷。則公之功業大矣。不然則有搖尾求食之禍。繼冲曰。吾家世世貢奉朝廷。必無此事。爾無過慮。況爾非慕容延釗之敵也。景威又曰。俗傳江陵諸處有九十九洲。若滿一百。則有王者興。自武信王之初。江心深浪之中。忽生一洲。而滿百。昨此洲漂沒不存。茲亦可憂。繼冲又不聽。景威知計不行。自扼吭而死。及王師入城。繼冲悔不用其言。太祖聞景威之計。曰。彼忠其主也。命王仁贍厚恤其家。

卷一萬八千一百三十七  
第十七頁

# 九國志拾遺

行密以唐景福元年再入揚州。至晉天福二年爲李昇所篡。五代史吳世家注。

陳儒同安賊也。通鑑二百五十七注。

盧延昌歸命于吳。僞乞命于梁。舊五代史梁太祖紀注。

吳楊渭十二年冬十月。濬東塘之楊林。江水出火。可以燃燭。六帖七。

楊溥巡白沙。太學博士王穀上書請改白沙爲迎鑾。其略曰。日月所經。星辰盡爲黃道。鑾輿所止。井邑皆

爲赤縣。通鑑二百七十三注。

溥能委運壽終。不懼篡殺之禍。深于機者也。通鑑二百八十一考。

吳殷文圭舉進士。塗中遇一叟。目文圭久之。謂人曰。向者一人眉綠。拳必入口。神仙狀也。如學道。當沖虛。

不爾。有大名于天下。而文圭拳實入口。乾甯中擢第。六帖三十一。

徐溫嘗自迎鑾還。至百家灣。暴風起。舟人相顧失色。溫乃袒裼。以帛繫環首。顧謂妾御曰。吾善游。儻溺。不

暇相救。幸保此子。言訖。風浪漸息。六帖二。

景以保大十五年正月。改元交泰。是歲。盡獻淮南十四州。畫江爲界。五代史南唐世家注。

吳初。朝中大臣多蔬食。月爲十齋。齋之明日。太官具晚膳。始復常珍。謂之半堂食。至是果盡割淮南之地。

去唐土封疆之半。六帖十六。

楊璉拜陵。至竹篠口。維舟大醉。一夕而卒。通鑑二百八十二注。

吳越錢鏐少在軍中。未嘗寢。末年少倦。乃刻木爲枕。以自警。或命諸孫諷詩以達旦。晉天福中。契丹使至。朝廷以近侍李泳爲監伴使。虜有判官者。幽薊人。謂泳曰。吳越常不睡乎。泳詰其故。對曰。嘗聞五台山王

子大師言。浙中不睡龍。今已歸矣。訪所聞。乃長興壬辰之後也。六帖九十五。

吳越錢鏐嘗歲除夜宴。命諸子及諸孫鼓胡琴。一再行。邊止之曰。人將以我爲長夜之飲也。六帖六十二。

有胡僧以玉羊一獻于鏐。曰。得此當生貴子。元瓘果以丁未歲生。六帖九十六。

馬綽餘杭人。少與錢鏐俱事董昌。以女弟妻鏐。鏐復爲元瓘娶綽女。通鑑二百八十二注。

王建以唐大順二年入成都。爲西川節度使。天復七年九月。建號明年正月。改元武成。五代史前蜀世家注。

明宗出啓夏門。駐華嚴寺。晡晚出幸南山之莎城。駐于石門山之佛寺。通鑑二百六十注。

建將七夕出遊。先一日。元膺召諸軍使及諸王。晏飲邸第中。且議七夕從行之禮。而集王宗翰等不至。詰

朝。元膺入白建曰。潘峭。毛文錫。離間兄弟。將圖不軌。及聞唐襲徵兵。乃遣伶官安悉香。諭軍使全殊。率天

武甲士以自衛。明日。徐瑤常謙。與懷勝軍使嚴璘等。協謀以所部兵挾元膺以逐唐襲。元膺介馬帥卒。過

其兄宗賀之門。召與同進。宗賀曰。兵起無名。不敢聞命。建急召宗侃。宗賀及諸軍使。令以兵討寇。乃逐唐

襲至城西。斬之。盡殺屯營兵。又自大安門登陴。以入。攻瑤謙等。通鑑二百六十八考異。

蜀許寂少學劍。居四明。一夕。有村民夫婦。揭壺酒訪寂而飲。迭謠以歡。寂飲訖。聞室中憂憂有聲。視之。

有數劍飛躍。寂甚懼。夫婦顧寂笑曰。奉以薄技。佐酒。何懼也。及舉手叱劍。皆入指端。至夜分。乃去。明日。有

二僧至。寂以其事語之。僧曰：知君好劍術，欲來相教耳。願公無好學，神仙清淨事異於此。諸俠皆鬼，爲陰物。故婦人與僧尼皆學之。言訖，命水洗足，以淨水拭之，騰空而去。六帖三

蜀杜光庭，黃巢之亂，從宰興元。途次西縣，遇陳休復，有道術，與光庭憩于路左軍中，以拄杖掘地，得酒一

壺，酌之不竭。光庭因問車駕何時當還，答曰：五年後龍星動，卽歸矣。果如其言。六帖三

蜀林知元所居，有茂林修竹，爲山石之娛。嘗駕三輪車，命僮牽之，隨意所至。六帖十一

王處回積鉅萬計，蜀中富家罕與比。在太原，家甚貧，善相者周元豹每指謂知詳曰：此子寶精也。它日常

大富，果如所言。六帖二十一

王潛夜宴，盜入其家，盡取飲具，逮明方知，笑曰：亦好飲耶，竟不問。六帖十七

劉閔，乾祐七年閔卒，享年六十，子承鈞立。時年二十九，喪服三年，服除，改十年爲天會元年。五代史十國世家年譜注

劉崇之長子曰贊，少慧黠，高祖憐之，錄爲己子。通鑑二百八十九注

契丹古匈奴之種也，代居遼澤之中，潢水南岸，南距榆關一千一百里，榆關南距幽州七百里。通鑑二百六十六注

契丹宴犒漢使，必厚具酒肉，以示夸大。高祖鎮河東，嘗命韋曜北使，曜羸瘠不能飲酒，虜人強之，遂卒。通鑑二百九十九考異

二百九十九考異

南漢楊洞潛，泝水令梁愚堂，謝洞潛見之，謂同列曰：愚血脈貫眸子，行步矍鑠，類驚鷹者，當有風雷之厄

及愚至縣，未幾，颶風壞廨，壓死。六帖三十一

閩王氏七主，六十年審知同光元年卒，在位二十九年，麟在位十一年。五代史十國世家年譜注

馬殷以大中六年歲在壬申生。以長興元年卒。享年七十九。是歲子希聲立。長興三年卒。同上

唐閔蔡結皆以郡人聚兵據郡。陳彥謙桂陽人。殺刺史黃岳。據郴州。魯景仁從黃巢。以病留連州。遂拔之。

通鑑二百六十一注

光化二年。殷克桂州。通鑑二百六十二考異

乾祐三年辛亥。同上

楚馬希聲海商有鬻犀帶者。直數百萬。晝夜有光。洞照一室。希聲殺商而取之。逾月。光遂滅。六帖十二

馬希範十八學士。李鐸、潘起、曹悅、李莊、徐牧、彭繼英、裴頌、何仲舉、孟元暉、劉昭禹、鄧懿文、李宏節、蕭洙、彭

繼勳、拓拔恆、李宏皐、廖匡圖、徐仲雅。通鑑二百六十二注

楚馬希振天祐初。殷為娶洪川鍾傅女。資從甚厚。有玉腕照夜珠。希振以非人臣所玩。皆納之於殷。六帖七

楚廖光圖與伊岳道士伊用昌為林泉之交。母病思鱸。屬江水夏漲。魚不可得。用昌探懷出一木獺。長三

寸許。再三祝之。投於江中。須臾波浪沸。遂擒一巨鱗。出獺着魚背。堅不可脫。用昌舉之。木獺耳。因作鱸母

愈。六帖三十一

按宋路振九國志五十一卷。末二卷北楚。張唐英補撰。明焦竑國史經籍志箸錄四十九卷。不知何由誤

題為曾顏。然可見萬歷時振書猶未佚也。今傳鈔本十二卷。乃邵氏晉涵從永樂大典錄出。周氏夢棠重

為編次。凡列傳百三十六篇。邵氏編校舊五代史。嘗采取之。其世家全闕。周氏據歐史略注於卷首。檢十

國世家年譜注。間及九國志。不盡相合。而通鑑考異及注。孔氏六帖所引數條。亦此本所無。因掇錄附後。

中如柴再用傳昇牀事。王宗壽傳鐵鏡事。及陳休復伊用昌諸條。未免近小說家習氣。然大致質實。本末詳備。足補正史之漏略。惜吳志伊作十國春秋時。猶未及見此也。錢熙祚識。